

MESYUARAT PERTAMA, PENGGAL KEEMPAT  
PARLIMEN KEEMPAT BELAS  
2021

**HARI KHAMIS : 23 SEPTEMBER 2021**

**PEMBERITAHUAN PERTANYAAN JAWAB LISAN  
DEWAN RAKYAT MESYUARAT PERTAMA, PENGGAL KEEMPAT  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : YB DATUK MOHD. AZIS BIN JAMMAN  
[ SEPANGGAR ]**

**TARIKH : 23 SEPTEMBER 2021 (KHAMIS)**

**SOALAN NO. 4**

**DATUK MOHD. AZIS BIN JAMMAN [ SEPANGGAR ]** minta **MENTERI PEMBANGUNAN WANITA, KELUARGA DAN MASYARAKAT** menyatakan :-

- (a) jumlah perbelanjaan langsung Kerajaan bagi program bantuan bakul makanan (tidak mengambil kira sumbangan daripada GLC dan NGO) bagi tahun 2020 dan 2021; dan
- (b) jumlah isi rumah dan nilai bantuan bakul makanan yang diagihkan di Sabah dan Parlimen Sepanggar, serta mekanisme yang diguna pakai bagi menentukan golongan yang layak menerima bantuan.

**PERTANYAAN : JAWAB LISAN**

**DARIPADA : YB DATIN PADUKA DR. TAN YEE KEW  
[ WANGSA MAJU ]**

**TARIKH : 29 SEPTEMBER 2021 (RABU)**

**SOALAN NO. 43**

**DATIN PADUKA DR. TAN YEE KEW [ WANGSA MAJU ]** minta **MENTERI PEMBANGUNAN WANITA, KELUARGA DAN MASYARAKAT** menyatakan adakah Kerajaan berhasrat untuk meneruskan program bakul makanan untuk tempoh enam (6) bulan yang akan datang memandangkan ekonomi belum pulih sepenuhnya.

**PEMBERITAHUAN PERTANYAAN JAWAB LISAN  
DEWAN RAKYAT MESYUARAT PERTAMA, PENGGAL KEEMPAT  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : YB DATUK SERI DR. MUJAHID BIN YUSOF RAWA [ PARIT BUNTAR ]**

**TARIKH : 29 SEPTEMBER 2021 (RABU)**

**SOALAN NO. 45**

**DATUK SERI DR. MUJAHID BIN YUSOF RAWA [ PARIT BUNTAR ]** minta **MENTERI PEMBANGUNAN WANITA, KELUARGA DAN MASYARAKAT** menyatakan apakah bantuan yang diberikan kepada penduduk semasa menjalani tempoh kuarantin akibat COVID-19, memandangkan mereka tidak boleh keluar dari rumah untuk mendapatkan barangan keperluan dapur.

**PERTANYAAN : JAWAB LISAN**

**DARIPADA : YB TUAN MA'MUN BIN SULAIMAN [ KALABAKAN ]**

**TARIKH : 5 OKTOBER 2021 (SELASA)**

**SOALAN NO. 68**

**TUAN MA'MUN BIN SULAIMAN [ KALABAKAN ]** minta **MENTERI PEMBANGUNAN WANITA, KELUARGA DAN MASYARAKAT** menyatakan aspek-aspek yang sedang diteliti bagi menambah baik serta memperluas manfaat program Bakul Prihatin Negara (BPN) buat golongan miskin yang belum pernah direkodkan sebagai penerima bantuan Jabatan Kebajikan Masyarakat (JKM).

**JAWAPAN**

Tuan Yang di-Pertua,

Saya mohon izin untuk menjawab pertanyaan daripada YB Sepanggar, bersekali dengan pertanyaan YB Wangsa Maju dan YB Parit Buntar bertarikh 29 September 2021 serta YB Kalabakan bertarikh 5 Oktober 2021 kerana pertanyaan-pertanyaan tersebut saling berkait dan merujuk kepada program yang sama.

Kementerian Pembangunan Wanita, Keluarga dan Masyarakat (KPWKM) melalui Jabatan Kebajikan Masyarakat (JKM) telah dipertanggungjawabkan untuk menguruskan program penyampaian bakul makanan. Ia merupakan satu inisiatif prihatin Kerajaan bertujuan untuk memastikan rakyat yang terkesan, terjejas dan memerlukan bantuan sepanjang pandemik COVID-19 dibantu bagi memastikan rakyat dapat meneruskan kelangsungan hidup mereka.

Program ini dilaksanakan melalui pembekalan barang asas keperluan makanan yang diagihkan atau disampaikan oleh JKJ kepada mereka yang memohon melalui pelbagai mekanisme yang memudahkan rakyat seperti talian telefon Bilik Gerakan, Talian KASIH 15999, hadir terus ke pejabat dan media sosial rasmi Kementerian dan agensinya.

Sejumlah RM106.8 juta telah dibelanjakan sepanjang bulan Mac 2020 hingga Julai 2021 yang mana RM34.6 juta menggunakan Tabung COVID-19 manakala RM72.2 juta menggunakan peruntukan Kementerian Kewangan. Nilai bakul bagi agihan Fasa 1 iaitu pada Mac 2020 adalah berjumlah RM50 manakala nilai bakul bagi Fasa 2 dan seterusnya telah dinaikkan kepada RM100 dan sehingga kini telah memberi manfaat kepada 1,121,385 Ketua Isi Rumah (KIR).

Berhubung pertanyaan YB Sepanggar, bagi tempoh Mac 2020 hingga Julai 2021, Negeri Sabah menerima peruntukan berjumlah RM13,534,000 yang memberi manfaat kepada 138,340 KIR dengan pecahan RM7,184,400 pada tahun 2020 dan RM6,349,600 bagi tahun 2021. Bagi Parlimen Sepanggar, telah menerima peruntukan berjumlah RM126,900 pada tahun 2020 yang memberi manfaat kepada 1,410 KIR.

## SOALAN NO : 4

Manakala bagi 2021, Parlimen Sepanggar menerima peruntukan berjumlah RM628,900 dengan penerima manfaat berjumlah 6,289 KIR.

Untuk makluman YB Kalabakan pula, pemberian bakul ini juga tidak hanya kepada golongan miskin di bawah JKM tetapi juga diagihkan kepada rakyat yang terkesan, terjejas dan memerlukan bantuan sepanjang pandemik COVID-19.

Tuan Yang di-Pertua,

Selain daripada bantuan bakul makanan melalui KPWK, Kerajaan juga telah meluluskan pelbagai bentuk bantuan bakul makanan. Sebagai contohnya di bawah Pakej PEMULIH, Kerajaan bersetuju memperuntukkan sebanyak RM300 ribu setiap kawasan Parlimen kepada semua Ahli Parlimen untuk melaksanakan Bantuan Bakul Makanan kepada golongan yang terjejas di kawasan masing-masing dengan peruntukan sebanyak RM66.6 juta.

Untuk makluman YB Wangsa Maju, susulan dari kejayaan program bakul makanan ini, Kerajaan memutuskan untuk meneruskan program bakul makanan melalui Program Bakul Prihatin Negara (BPN) yang dilancarkan pada 15 Julai 2021. BPN merupakan satu program secara kerjasama pintar berkonsepkan "*Whole of Society*" antara Kerajaan, Syarikat Berkaitan Kerajaan, Syarikat Korporat dan Sukarelawan Skwad Prihatin Negara (SPN). Peruntukan untuk BPN adalah sepenuhnya sumbangan syarikat korporat seperti PETRONAS, AEON CO. (M) BHD., Pharmaniaga, Tenaga Nasional Berhad, Telekom Malaysia serta Yayasan Sime Darby.

Sejak BPN dilancarkan, dana yang terkumpul dan diuruskan oleh Kementerian melalui Yayasan Kebajikan Negara (YKN) berjumlah RM21 juta. Manakala sejumlah 466,216 permohonan BPN telah diterima sehingga 20 Ogos 2021 dan proses permohonan telah ditutup bagi tujuan Kementerian menyantuni semua permohonan berkenaan. Sehingga kini 252,792 KIR telah menerima bakul BPN manakala selebihnya dalam proses untuk disantuni dan dijangka selesai pada penghujung bulan September 2021.

Sekian, terima kasih.

## **KANDUNGAN**

**JAWAPAN-JAWAPAN BAGI PERTANYAAN-PERTANYAAN JAWAB**

**LISAN YANG TIDAK DIJAWAB DI DALAM DEWAN**

**( SOALAN NO. 5, 8 HINGGA NO. 74 )**

**[SOALAN NO 5 DIJAWAB BERSEKALI DENGAN  
SOALAN NO 11 DAN NO 69]**

**NOTA: [RUJUK PENYATA RASMI HARIAN (HANSARD)]**

**PEMBERITAHUAN PERTANYAAN  
DEWAN RAKYAT MESYUARAT PERTAMA, PENGGAL KETIGA,  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : DATUK HAJAH AZIZAH BINTI DATUK  
SERI PANGLIMA HAJI MOHD DUN  
[ BEAUFORT ]**

**TARIKH : 23 SEPTEMBER 2021 (KHAMIS)**

**SOALAN**

minta **MENTERI KOMUNIKASI DAN MULTIMEDIA** menyatakan apakah langkah yang akan diambil untuk memastikan capaian Internet kelajuan yang tinggi di Sabah khususnya di kawasan luar bandar.

**JAWAPAN**

Tuan Yang Dipertua,

Saya memahami soalan yang berkaitan dengan perkhidmatan jalur lebar ini nampaknya telah timbul beberapa kali, yang dibangkitkan ramai Ahli-ahli Yang Berhormat. Jadi izinkan saya untuk memberikan gambaran yang lebih menyeluruh agar Ahli-ahli Yang Berhormat beroleh maklumat yang terkini mengenai program-program yang dijalankan oleh Kerajaan.

Pertama sekali saya ingin mengulangi bahawasanya apabila kita sebutkan tentang Program Jalinan Digital Negara (JENDELA) rancangan itu adalah asalnya daripada sekarang ataupun 2020 hingga 2025 tetapi program itu kita *fast track* kan, iaitu kita bawa ke hadapan supaya kita lebih pantas dapat menyaingi perkembangan teknologi yang sedang kita terima sekarang. Jadi matlamat secara umumnya, saya sebutkannya di sini matlamatnya ialah untuk memastikan capaian 4G, atau yang biasa disebut sebagai capaian menggunakan LTE *Long-Term Evolution* ataupun 4G bagi menggantikan 2G dan khususnya 3G untuk sekurang-kurangnya 96.9% atau 97%, kemudian untuk mendapatkan *speed* daripada 25Mbps kepada 35Mbps, bukan sahaja *connectivity* tetapi *speed* juga adalah penting. Kemudian untuk memastikan sekurang-kurangnya dapat capai 7.5 juta premis daripada jumlah 9 juta premis dibanci, kemudian untuk memastikan menjelang hujung tahun ini 3G *face out* supaya kita dapat memberi tumpuan kepada perkhidmatan 4G.

Bagi aspirasi nasional di bawah JENDELA, pertama sasaran kita menumpukan pada 9 juta *premises passed*, *speed* apabila sebahagiannya telah mula melaksanakan 4G dan 5G boleh mencapai sehingga 100Mbps dan *coverage* 4G mestilah mencapai 100%. Itu sebahagian daripada indeks-indeks yang penting dalam merancang dan memperbaiki khidmat jalur lebar dan *service* Internet dalam negara kita.

Kedua, yang saya rasa perlu Ahli Yang Berhormat semua mendapat maklumat. Untuk menjayakan program ini, ia perlu dibiayai dengan sumber-sumber yang berbagai-bagai. Pertama, kita rujuk sebagai JENDELA yang dibiayai melalui USP *fund* di mana ia adalah *contribution*



## SOALAN NO : 5

daripada syarikat-syarikat telco, kira-kira 6% dalam satu dana yang dikendalikan oleh SKMM. Kedua, yang tidak kurang penting dalam meningkatkan prasarana-prasarana ini adalah yang disumbang *direct* oleh telcos yang disebut sebagai inisiatif komersial ataupun JENDELA *commercial*. Ketiga, *direct funding* daripada *consolidated fund* yakni daripada Kementerian Kewangan (MOF) melalui Kementerian terutama sekali yang sering kita rujuk isitlahnya, *Point of Presence* (POP) yang merujuk kepada program *fiberization*, memasang gentian optik di kawasan-kawasan luar bandar terutamanya.

Saya ingin menjelaskan bahawa dalam usaha ini, untuk Semenanjung, JENDELA+USP, jumlah peruntukan yang amat besar sekali, RM8.32 bilion untuk menjayakan program-program di bawah JENDELA. Untuk JENDELA+*Commercial* yang dibelanjakan oleh syarikat-syarikat telco bagi menjayakan program digital Nasional ini, kira-kira RM12.47 bilion. Sementara perkara utk *Point of Presence*, *fiberization* yang kebanyakan menumpu di sekolah-sekolah luar bandar bagi memastikan pembelajaran anak-anak menjadi lebih baik dan sebagainya, kira-kira RM440.9 juta.

Oleh kerana soalan ini dirujuk kepada komitmen Kerajaan terhadap Sabah dan Sarawak, kita ingin mengesahkan bahawasanya Wilayah Sabah dan Wilayah Sarawak sememangnya menjadi tumpuan paling utama dalam program JENDELA kerana tahap *coverage* dan kualiti untuk Sabah dan Sarawak, terutamanya di pedalaman dan juga kerana Sabah dan Sarawak luas negerinya, memerlukan satu bajet yang cukup besar supaya ianya *at par* seluruh negara.

Untuk itu bagi Sabah, di bawah JENDELA+USP (SKMM), RM1.75 bilion yang akan dilaksanakan. Bagi JENDELA+*Commercial* oleh syarikat-syarikat telco juga RM1.75 bilion dan bagi kategori *Point of Presence* melalui Kementerian sebanyak RM77 juta. Bagi Sarawak, JENDELA+USP, RM2.045 bilion dan bagi JENDELA+*Commercial* RM2.045 bilion dan untuk program-program *Point of Presence* di bawah kendalian Kementerian sebanyak RM80 juta. Ini menjadikan komitmen bagi menjayakan Program JENDELA sehingga tahun 2025 ialah bagi JENDELA+USP, RM12.1 bilion, bagi JENDELA+*Commercial* RM16.6

bilion dan bagi kategori *Point of Presence* kira-kira RM580 juta. Itu dari sudut *funding*.

Dari sudut pelaksanaan, apa yang dirancang pada fasa 2 JENDELA bersetuju untuk dipercepatkan, supaya pelaksanaannya dapat kita segerakan.

Soalan yang dikemukakan ini, izinkan untuk turut menjawab bukan hanya untuk YB Beaufort tetapi dengan **dua (2)** soalan lain kerana menyentuh perkara yang sama, iaitu :

- i. Soalan nombor 11 oleh YB Hulu Rajang bertarikh 23 September 2021 yang bertanya tentang rancangan Kementerian untuk menaiktaraf di kawasan Hulu Rajang ; dan
- ii. Soalan nombor 69 oleh YB Ledang bertarikh 23 September 2021 yang bertanyakan tentang perkembangan inisiatif JENDELA khususnya Sabah dan Sarawak.

Berdasarkan latarbelakang yang telah saya sebutkan tadi, kita ingin menjelaskan bahawasanya sememangnya Sabah dan Sarawak menjadi kawasan tumpuan tetapi oleh kerana banyak kawasan-kawasan di Sabah dan Sarawak juga di Semenanjung terutamanya perkampungan Orang Asli tidak dapat disampaikan melalui cara-cara biasa dengan pembinaan menara maka 839 lokasi di seluruh negara telah dikenalpasti untuk diberikan khidmat jalur lebar ini dengan menggunakan teknologi satelit. Agak mahal sedikit tapi kita wajib melaksanakannya.

Bagi liputan di seluruh negeri Sabah dan Sarawak, perancangan dan pencapaian JENDELA sehingga kini ialah sebanyak 1,295 stesen pemancar di Sabah dan 1,209 stesen pemancar di Sarawak akan dinaiktraf di bawah JENDELA. Manakala 382 menara baharu untuk Sabah dan 636 menara baharu untuk Sarawak dari sejumlah 1,661 menara baharu yang perlu dibina untuk menjayakan program ini.

Akhir sekali sebagai *round up*, saya ingin menyampaikan maklumat kepada Dewan yang mulia ini bahawasanya apabila kita berackap tentang

**SOALAN NO : 5**

usaha untuk meningkatkan *connectivity* dan memberikan *connectivity* yang berkualiti, ia antara lain meliputi pembinaan tapak menara baharu, menaik tarafkan stesen pemancar sedia ada di mana dah ada menara tetapi kualiti belum mencukupi, menyediakan premis dengan gentian optik supaya bekalan lebih stabil terutama sekali di kawasan luar bandar, dan bagi kawasan yang tidak dicapai semua ini menyediakan jalur lebar satelit jadi saya ingin memberikan *update* negeri Sabah dan Sarawak termasuk di Parlimen Beaufort dan Hulu Rajang adalah seperti berikut:

Inisiatif	Tapak Menara Baharu		Naik Taraf Stesen Pemancar		Premis Tersedia Gentian Optik		Jalur Lebar Satelit	
	Perancangan	Siap	Perancangan	Siap	Perancangan	Siap	Perancangan	Siap
Sabah	538	51	3,500	2,041	251,165	81,268	138	-
Sarawak	823	74	3,012	1,615	73,588	47,223	523	-
Beaufort	26	-	79	35	2,123	1,111	3	-
Hulu Rajang	59	-	50	10	118	-	125	-

Tuan Yang Dipertua, demikianlah gambaran secara menyeluruh apa yang saya boleh katakan komitmen untuk menjayakan ini adalah satu komitmen nasional yang besar, yang tidak dapat tidak perlu dijayakan selaras dengan konsep yang Kementerian anjurkan bahawasanya *Connectivity* adalah Hak Asasi Manusia.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK DR. HASAN BIN BAHROM [TAMPIN]**

**TARIKH : 23 SEPTEMBER 2021 (RABU)**

**SOALAN**

Minta **MENTERI PENGAJIAN TINGGI** menyatakan bagaimana latihan industri mahasiswa semasa pandemik. Apakah tindakan yang dilakukan oleh Kementerian bagi menyelesaikan masalah ini.

**JAWAPAN:**

Tuan Yang di-Pertua,

Kementerian Pengajian Tinggi (KPT) sangat prihatin akan situasi dan kekangan yang dihadapi oleh Pemberi Pendidikan Tinggi (PPT), pelajar dan pihak industri sepanjang tempoh pandemik COVID-19 khususnya dalam menjayakan program Latihan Industri. Oleh itu, KPT melalui Agensi Kelayakan Malaysia (MQA) telah memberikan fleksibiliti kepada PPT untuk mempertimbangkan penggantian Latihan Industri kepada kaedah alternatif yang bersesuaian seperti ***industry-based project, problem-based project, topical study*** atau ***research project***. Dalam hubungan ini, PPT boleh mempertimbangkan sama ada untuk menggantikan Latihan Industri dengan kaedah alternatif secara sepenuhnya atau sebagai pelengkap kepada Latihan Industri yang terpaksa dihentikan.

Bagi PPT yang mempunyai program dalam dua mod berbeza, iaitu kerja kursus dan industri seperti 2u2i atau Pembelajaran Berasaskan Kerja (*Work Based Learning*, WBL), mereka boleh mempertimbangkan untuk menukarkan program mod industri kepada mod kerja kursus. Fleksibiliti penggantian Latihan Industri kepada kaedah alternatif yang bersesuaian ini perlu dimanfaatkan dengan sebaiknya oleh PPT agar objektif utama pembelajaran tercapai dan pelajar mendapat pendedahan kepada elemen industri yang diperlukan sebagai persediaan memasuki alam pekerjaan. Selain itu, fleksibiliti yang diberikan ini juga adalah tertakluk kepada kesesuaian bidang pengajian dan pertimbangan badan-badan profesional yang berkaitan.

Untuk makluman Ahli Yang Berhormat, panduan berkaitan pelaksanaan Latihan Industri dalam tempoh pandemik turut diperincikan dalam beberapa siri *Advisory Note* MQA yang dikeluarkan sejak pelaksanaan Perintah Kawalan Pergerakan (PKP) pada bulan Mac 2020. Panduan ini boleh diakses di portal MQA ([www.mqa.gov.my](http://www.mqa.gov.my)).

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' HAJI MOHD FASIAH BIN HAJI  
MOHD FAKEH (SABAK BERNAM )**

**TARIKH : 23 SEPTEMBER 2021 (KHAMIS)**

**SOALAN:**

**DATO' HAJI MOHD FASIAH BIN HAJI MOHD FAKEH [ SABAK BERNAM ]** Minta **MENTERI PERTANIAN DAN INDUSTRI MAKANAN** menyatakan langkah Kementerian bagi terus menggalakkan aktiviti pertanian dijalankan semasa pandemik COVID-19 ini bagi memastikan bekalan makanan dalam negara mencukupi dan nyatakan langkah Kementerian bagi membantu pengusaha-pengusaha pertanian yang terjejas akibat dari pandemik COVID-19 ini.

**JAWAPAN:**

Tuan Yang Di Pertua,

Penularan pandemik COVID-19 dan pelaksanaan Perintah Kawalan Pergerakan (PKP) sememangnya telah memberi kesan kepada sektor agromakanan negara secara langsung dan tidak langsung di mana kelancaran rantai makanan terganggu antaranya pengeluaran, pengedaran, pemasaran dan peruncitan produk hasil pertanian dan industri makanan.

Berdasarkan Laporan Survei Khas Covid-19 Kepada Ekonomi dan Individu (Pusingan 1) yang dikeluarkan oleh Jabatan Perangkaan Malaysia (DOSM) pada Mac 2021, sektor pertanian mencatatkan peratusan kehilangan pekerjaan sebanyak 21.9%. Kesan pandemik COVID-19 kepada subsektor tanaman menyebabkan saiz penanaman ladang terpaksa dikecilkan, jadual penanaman disusun semula, penjualan hasil tuaian semakin berkurangan serta pertukaran kepada tanaman lain yang boleh memberikan pulangan segera kepada pengusaha. Subsektor ternakan turut terjejas akibat peningkatan kos input penternakan, pengurangan pengeluaran dan kebolehpasaran ternakan serta hasil ternakan. Manakala bagi subsektor perikanan pula, pengeluaran perikanan bagi tahun 2020 mengalami sedikit penurunan sebanyak 4.4% berbanding tahun 2019.

Bagi membantu golongan petani yang terjejas dan terus menggalakkan aktiviti pertanian dijalankan semasa pandemik, MAFI telah diperuntukkan Dana Jaminan Makanan (DJM) sebanyak RM1 bilion pada 27 Mac 2020. Jumlah ini tidak termasuk pelaksanaan Pakej Rangsangan Ekonomi (PRE) 2020 sebanyak RM50 juta yang merangkumi 918 perolehan dan projek kecil di seluruh negara bagi merangsang perniagaan kontraktor Bumiputera yang terkesan dengan kelembapan ekonomi yang disebabkan oleh kesan awal pandemik COVID-19 pada ketika itu.

Manakala DJM merangkumi pakej Pakej Rangsangan Ekonomi Prihatin Rakyat (PRIHATIN) dan Pelan Jana Semula Ekonomi Negara (PENJANA) dan juga sebahagian Projek Khas Belanjawan 2021.

Penyediaan DJM ini merupakan langkah intervensi untuk membantu pengusaha pertanian dengan segera, serta secara tidak langsung telah menyuntik dana untuk mengaktifkan kembali rantai ekonomi agromakanan bermula daripada pengeluar sehinggalah ke peringkat hiliran dan runcit.

Selain daripada bantuan-bantuan dan inisiatif menerusi Dana Jaminan Makanan dan Pakej Rangsangan Ekonomi yang diberikan, Kementerian ini melalui Jabatan dan agensi terlibat membantu kumpulan sasaran yang terjejas akibat dari pandemik COVID-19 ini seperti berikut:

- i. Program Bakul Makanan di bawah program MAFI Prihatin yang memberi sumbangan berbentuk makanan bagi meringankan beban golongan yang terjejas akibat pandemik COVID 19. Seramai 86,246 penerima di 326 lokasi seluruh negara telah menerima manfaat yang disampaikan melalui pelbagai jabatan dan agensi kementerian pada tahun ini sehingga Julai 2021;
- ii. Sebanyak 35,681 surat kelulusan kebenaran beroperasi telah dikeluarkan semasa tempoh pandemik bagi tempoh Januari hingga Ogos 2021 bagi memastikan pengeluaran hasil dan rantai nilai makanan tidak terjejas memandangkan aktiviti pertanian juga telah dikategorikan sebagai perkhidmatan penting negara (*essential services*) dan dibenarkan beroperasi sepanjang masa;
- iii. Sebanyak 48,281 latihan secara atas talian telah dibuat bagi meningkatkan kemahiran dan khidmat nasihat sama ada melalui panggilan telefon, panggilan video, webinar serta melalui platform media sosial seperti facebook dan aplikasi whatsapp yang melibatkan 50,182 petani dan 436,487 pengunjung melalui media sosial;
- iv. Platform pemasaran digital (e-dagang) bagi membantu meningkatkan ruang pemasaran para petani dan pengusaha melalui platform e-dagang seperti Agrobazaar Online dan NekmatBiz serta kerjasama strategik dengan platform e-dagang



## SOALAN NO.: 9

swasta seperti Shopee, Lazada, AirAsia Farm, Mukmin Mart, Grab dan Foodpanda;

- v. Projek Rezeki Ternak dengan jumlah RM1.94 juta telah dibelanjakan pada tahun 2020 melibatkan 1,398 penternak, manakala sejumlah RM0.96 juta diperuntukkan untuk tahun 2021;
- vi. Program Pembangunan Industri Ruminan (PROPER) yang melibatkan bantuan geran pepadanan 70% kerajaan dan 30% penternak dan berjaya mengagihkan 252 ekor bebiri kepada 12 orang penternak dan 286 ekor lembu kepada 13 orang penternak pada tahun 2020;
- vii. Program Peningkatan Pengeluaran Tenusu Negara berjumlah RM4.0 juta diperuntukkan secara geran pepadanan 30% Kerajaan dan 70% secara agihan lembu tenusu dara bunting kacukan Friesian dari Australia dan beserta peralatan;
- viii. Pemberian kadar bayaran sewaan premis kerajaan sebanyak 50% kepada pengusaha di semua kemudahan Ladang Satelit di Taman Kekal Pengeluaran Ruminan (TKPR) dan operator swasta di rumah sembelih serta program;
- ix. Memberikan penangguhan pembaharuan semua lesen vesel penangkapan ikan sehingga 1 Oktober 2021 serta meneruskan pemberian Elaun Sara Hidup Nelayan Laut dan Darat dengan kadar yang telah ditingkatkan;
- x. Memberikan pengecualian syarat minimum pendaratan ikan melalui Laporan Operasi Vesel (LOV) dan purata keaktifan Mobile Transducer Unit (MTU) untuk pembaharuan lesen vesel penangkapan ikan laut dalam Zon C2; dan
- xi. Program Geran Pepadanan *Change Upgrade Products* (CUP) bagi aktiviti ekonomi hiliran dalam sektor agromakanan yang memanfaatkan seramai 154 orang pengusaha industri asas tani

## **SOALAN NO.: 9**

pada tahun 2020 dengan peruntukan bernilai RM4 juta, manakala pada tahun 2021, sehingga kini seramai 141 pengusaha telah menerima manfaat dengan peruntukan bernilai RM4.4 juta.

Kementerian berharap agar inisiatif-inisiatif termasuk program dan projek serta bantuan khas yang dilaksanakan dapat membantu para petani, nelayan dan penternak serta pengusaha agromakanan yang terjejas disebabkan COVID-19 pandemik dalam meneruskan kelangsungan perusahaan masing-masing dan memberikan sumber pendapatan yang mampan. MAFI akan terus mengambil segala tindakan bagi memastikan kepentingan kumpulan sasar sektor agromakanan terus terjamin.

Sekian, terima kasih.

**PEMBERITAHUAN PERTANYAAN JAWAB LISAN  
DEWAN RAKYAT MESYUARAT PERTAMA, PENGGAL KEEMPAT  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : YB NOR AZRINA BINTI SURIP  
[ MERBOK ]**

**TARIKH : 23 SEPTEMBER 2021 (KHAMIS)**

**SOALAN**

**PUAN NOR AZRINA BINTI SURIP [ MERBOK ]** minta **MENTERI PEMBANGUNAN WANITA, KELUARGA DAN MASYARAKAT** menyatakan tujuan pelan tindakan dan perkembangan terkini mengenai Pembangunan Sistem Pendaftaran Warga Emas Nasional (e-WEN)

**JAWAPAN**

Tuan Yang di-Pertua,

Warga emas di Malaysia merujuk kepada individu yang berumur 60 tahun dan ke atas seperti yang diterima pakai oleh *United Nations World Assembly on Ageing* di Vienna, Austria yang diadakan pada tahun 1982. Berasaskan unjuran yang dibuat oleh Jabatan Perangkaan Malaysia, Malaysia dijangka mencapai status negara tua pada tahun 2030 apabila 15% daripada jumlah penduduk merupakan warga emas. Bagi persediaan ke arah '*ageing population*', cabaran yang perlu dihadapi adalah amat besar dan memerlukan strategi tindakan yang bersistematik.

Tuan Yang di-Pertua,

Pembangunan Sistem Pendaftaran Warga Emas Nasional (e-WEN) adalah usaha Kerajaan ke arah merealisasikan objektif yang digariskan dalam Dasar Warga Emas iaitu membentuk sistem penyampaian perkhidmatan warga emas yang berkesan dan bersepadu dan menggalakkan penggunaan hasil penyelidikan sebagai asas dalam perancangan, pemantauan dan penilaian program warga emas.

Sistem ini bertujuan untuk membangunkan pendaftaran digital dan pemetaan warga emas bagi menghasilkan data bersepadu. Pembangunan sistem ini juga adalah usaha Kerajaan yang merangkumi idea dan pelan untuk:

- i. Mewujudkan pendaftaran warga emas dengan penggunaan sistem secara *online* yang lebih cekap, pantas dan menghasilkan data bersepadu;
- ii. Memudahkan carian dan semakan warga emas mengikut lokaliti seperti negeri, daerah dan bandar;
- iii. Penyaluran maklumat dan perkongsian data berkaitan warga emas antara agensi kerajaan; dan

- iv. Meningkatkan proses padanan kerja, kemahiran dan kesihatan dalam kalangan warga emas.

Pembangunan dan pelaksanaan projek e-WEN mengambil tempoh masa 36 bulan bermula tahun 2021 dijangka selesai akhir tahun 2023. Skop pembangunan e-WEN meliputi:

- Pembangunan Sistem dan Integrasi;
- Perolehan Perkakasan & Perisian ICT;
- Latihan & *Transfer Of Technology*; dan
- Penyelenggaraan Serta Khidmat Sokongan.

Kini fasa pertama sistem telah pun dimulakan dengan proses kelulusan projek, pentauliahan vendor melalui proses tender dan dijangka pada penghujung tahun 2021, antara muka e-WEN akan terbina. Tahun kedua adalah fasa penting di mana perolehan dan pembekalan perkakasan & perisian ICT akan dilaksanakan dan pada waktu yang sama pembangunan, integrasi dan pengujian sistem akan berlaku. Sepanjang tahun 2023, dirancang sesi latihan dan TOT kepada kumpulan pelaksana yang bertanggungjawab dalam pengisian maklumat sistem ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KE EMPAT BELAS**

**PERTANYAAN : JAWAB LISAN**

**DARIPADA : YB PUAN VIVIAN WONG SHIR YEE  
(SANDAKAN)**

**TARIKH : 23 SEPTEMBER 2021 (KHAMIS)**

**SOALAN**

**PUAN VIVIAN WONG SHIR YEE [ SANDAKAN ] minta MENTERI PENGANGKUTAN** menyatakan apakah bantuan yang disediakan untuk pengendali bas awam di Sabah, seperti bas berhenti-henti dan bas mini, di mana mereka juga terpaksa beroperasi dengan mengurangkan kapasiti penumpang dan memendekkan masa operasi sepanjang pandemik.

**JAWAPAN**

**Tuan Yang di-Pertua,**

Pada masa ini tiada bantuan kewangan *one-off* yang disediakan khusus kepada pengusaha atau syarikat bas berhenti-henti di seluruh negara. Walau bagaimanapun, bantuan *one-off* yang disasarkan kepada individu yang tidak dapat bekerja atau kehilangan sumber pendapatan disebabkan oleh Perintah Kawalan Pergerakan (PKP) disediakan kepada individu yang bekerja sebagai pemandu teksi, bas pelancongan, bas sekolah dan pemandu e-hailing.

Kepada syarikat yang tergolong di bawah syarikat perusahaan kecil dan sederhana, bantuan telah disediakan di bawah program Geran Khas Prihatin (GKP) 3.0 dan 4.0 yang telah diumumkan Kerajaan pada Mac 2021 dan Jun 2021 berjumlah RM1,500 dan RM1,000 bagi mana-mana syarikat yang memenuhi syarat-syarat yang ditetapkan bolehlah memohon bantuan di bawah program berkenaan. Mana-mana pengusaha yang terjejas dan berkecukupan juga boleh memohon Program Subsidi Upah yang ditawarkan oleh Pertubuhan Keselamatan Sosial (PERKESO).

Pada masa sama, mengambil kira cabaran yang dihadapi oleh pihak syarikat dan pemilik kenderaan di dalam keadaan semasa, Kementerian Pengangkutan (MOT) telah memberi kebenaran khas kepada semua kenderaan perkhidmatan awam, tambahan dua (2) tahun secara automatik kepada had usia maksimum untuk didaftarkan atau penggantian, tertakluk kepada kelulusan pemeriksaan PUSPAKOM kenderaan tersebut.

Ini bermakna, mana-mana kenderaan perkhidmatan pengangkutan awam yang telah mencapai had usia maksimum untuk didaftarkan pada 1 Januari 2020 sehingga 31 Disember 2021 dan perlu diganti, akan diberikan tambahan satu tahun lagi secara automatik. Dengan pemberian tambahan had usia automatik satu tahun ini, semua pengusaha dan pemilik dapat menanggungkan penggantian kenderaan terbabit untuk dua (2) tahun lagi.

Rang Undang-undang (RUU) Langkah-Langkah Sementara Bagi Mengurangkan Kesan Penyakit Koronavirus 2019 (Covid-19) 2020 yang telah diluluskan juga telah dapat membantu semua pengusaha kenderaan pengangkutan awam dan barangan untuk menjana pendapatan tambahan dengan memberi kebenaran untuk menyediakan perkhidmatan lain seperti penghantaran barang/parcel sekiranya tidak membawa penumpang atau sebaliknya. Kelulusan sementara ini hanyalah untuk sepanjang tempoh PKP berkuatkuasa dan bertujuan mewujudkan ruang-ruang tambahan kepada pemandu terlibat untuk mendapatkan pendapatan mereka.

Kerajaan juga telah meneruskan inisiatif pemberian *Interim Stage Bus Support Fund* (ISBSF) di Sabah untuk tahun 2021 dan 2022 bagi pengendali sedia ada yang terlibat dalam program ini. Di bawah inisiatif ini kerajaan akan menanggung kerugian kos operasi pengendali bas berhenti-henti sedia ada bagi memastikan perkhidmatan kekal disediakan untuk kemudahan rakyat.

Perkhidmatan pengangkutan awam terutama perkhidmatan bas berhenti-henti dan bas mini masih terus beroperasi sepanjang tempoh PKP di Sabah walaupun terpaksa mematuhi SOP yang telah ditetapkan oleh Majlis Keselamatan Negera (MKN) iaitu dengan mengurangkan kapasiti penumpang.



**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KE-14**

**PERTANYAAN : LISAN**

**DARIPADA : TUAN AHMAD TARMIZI BIN SULAIMAN [SIK]**

**TARIKH : 23 SEPTEMBER 2021 (KHAMIS)**

**SOALAN**

**TUAN AHMAD TARMIZI BIN SULAIMAN [ SIK ]** minta **MENTERI KEWANGAN** menyatakan adakah Kerajaan bercadang untuk mempertimbangkan rebat/insentif pengecualian cukai korporat kepada agensi yang terlibat memajukan pembangunan tanah terbiar di luar bandar.

**JAWAPAN**

Tuan Yang di-Pertua,

1. Sebagai sebuah Kerajaan yang bertanggungjawab dan prihatin, pelbagai layanan cukai sama ada dalam bentuk insentif atau pengecualian cukai terus diberikan bagi memastikan kelangsungan pembangunan sosio-ekonomi secara inklusif dan seimbang merentasi wilayah di seluruh negara. Ini termasuklah inisiatif membangunkan tanah terbiar di kawasan luar bandar dan kurang membangun.
2. Untuk makluman Yang Berhormat, badan berkanun Kerajaan seperti Lembaga Penyatuan Dan Pemulihan Tanah (atau FELCRA), Lembaga Kemajuan Johor Tenggara (atau KEJORA) dan Lembaga Kemajuan Kelantan Selatan (atau KESEDAR) yang ditugaskan untuk membangunkan luar bandar telahpun menikmati pengecualian cukai ke atas pendapatan yang dibenarkan dikutip di bawah akta penubuhannya. Ini termasuklah pengecualian cukai ke atas yuran, ses, levi dan kompaun. Derma atau sumbangan dan sebarang geran yang diterima daripada Kerajaan juga dikecualikan daripada sebarang cukai. Selain itu, pelbagai jenis insentif dalam bentuk galakan cukai turut disediakan kepada koridor-koridor wilayah pembangunan seperti Wilayah Ekonomi Pantai Timur, Wilayah Ekonomi Koridor Utara, Koridor Pembangunan Tenaga Sarawak, Koridor Pembangunan Sabah dan Iskandar Malaysia.
3. Pada masa yang sama, Kerajaan terus bertindak secara proaktif untuk merencanakan kegiatan ekonomi masyarakat setempat dan menyumbang kepada kemakmuran negara. Kerajaan kini mengkaji sektor serta industri sedia ada dan baharu di mana pengecualian cukai pendapatan sehingga 100% untuk tempoh sehingga 15 tahun boleh dipertimbangkan untuk diberikan kepada pemaju atau pelabur yang memajukan kawasan kurang membangun yang ditentukan oleh Unit Perancang Ekonomi Negeri.

Sekian, terima kasih.

**PEMBERITAHUAN PERTANYAAN JAWAB LISAN  
DEWAN RAKYAT MESYUARAT PERTAMA, PENGGAL KEEMPAT  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : YB PUAN HANNAH YEOH TSEOW SUAN  
[ SEGAMBUT ]**

**TARIKH : 23 SEPTEMBER 2021 (KHAMIS)**

**SOALAN**

**PUAN HANNAH YEOH TSEOW SUAN [ SEGAMBUT ]** minta **MENTERI PEMBANGUNAN WANITA, KELUARGA DAN MASYARAKAT** menyatakan berapa kali Jawatankuasa Pemandu Pelan Strategi Kebangsaan bagi menangani punca perkahwinan bawah umur dan Jawatankuasa Menangani Keganasan Rumah Tangga telah bermesyuarat, jumlah kes dan hasil serta langkah mesyuarat tersebut.

**JAWAPAN**

Tuan Yang di-Pertua,

**Jawatankuasa Pemandu Pelan Strategi Kebangsaan Bagi Menangani Punca Perkahwinan Bawah Umur**

Pelan Strategi Kebangsaan Bagi Menangani Punca Perkahwinan Bawah Umur (Pelan) telah digubal untuk tempoh pelaksanaan enam (6) tahun iaitu bermula pada tahun 2020 hingga 2025. Jawatankuasa Pemandu telah bersidang buat pertama kali pada 24 Ogos 2020 dengan penglibatan daripada pelbagai Kementerian dan Agensi, ahli akademik dan NGO. Jawatankuasa ini berperanan untuk memantau pelaksanaan program bagi setiap strategi yang dirancang. Bagi tahun 2021 pula, mesyuarat Jawatankuasa Pemandu telah diadakan pada 3 September 2021. Selain daripada itu, Jawatankuasa Teknikal turut ditubuhkan di peringkat agensi peneraju.

Pada waktu yang sama, pemantauan program juga dilaksanakan melalui maklum balas secara bertulis daripada setiap agensi peneraju yang menerajui pelaksanaan program di bawah Pelan. Berdasarkan maklum balas yang diterima, daripada 58 program yang dirancang, sebanyak 41 program telah bermula, dan 17 lagi program sedang dalam perancangan. Pelaksanaan yang telah bermula dibuat sama ada melalui program sedia ada ataupun menambah baik program sedia ada.

Memandangkan pelaksanaan Pelan telah berada pada tahun kedua, maka Kerajaan akan memastikan supaya pelaksanaan program dan tindakan jangka masa pendek (2020-2021) dicapai sepenuhnya sebelum berakhir tahun 2021. Justeru, satu sesi *pre-council* telah diadakan pada 29 Julai 2021 sebagai platform untuk melaporkan pelaksanaan, isu dan cabaran, serta cadangan penambahbaikan terhadap setiap program.

Daripada keseluruhan 10 program jangka masa pendek yang dilaporkan, sebanyak 7 program telah pun bermula, manakala 3 lagi program sedang dalam perancangan. Isu dan cabaran serta cadangan penambahbaikan yang telah dibangkitkan diangkat untuk pertimbangan dan persetujuan ahli Jawatankuasa Pemandu.

Tren perkahwinan yang melibatkan bawah umur menunjukkan penurunan pada tahun 2019 berbanding tahun sebelumnya iaitu tahun 2017 dan 2018. Berdasarkan statistik oleh Jabatan Perangkaan Malaysia, sejumlah 322 kes telah direkodkan pada tahun 2019 berbanding 1856 kes pada tahun 2018 dan 2107 kes pada tahun 2017. Sebagai tambahan, pada 23 Jun 2021, Kementerian ini telah memohon statistik perkahwinan bawah umur yang telah direkodkan sewaktu tempoh pandemik yang bermula pada 18 Mac 2020 sehingga kini. Namun begitu, data ini sedang diselaras bersama agensi di peringkat negeri dan dijangka akan diterbitkan pada 30 November 2021.

Menyedari bahawa Pelan ini merupakan sebuah dokumen yang dinamik, maka saranan dan pandangan semua pihak amat dialu-alukan supaya pelan strategi ini sentiasa ditambah baik dan relevan untuk menangani punca perkahwinan bawah umur dengan lebih berkesan.

Justeru, saya menyeru sokongan dan komitmen berterusan daripada semua pihak termasuk di peringkat akar umbi bagi menjayakan pelaksanaan program dan tindakan di bawah Pelan ini.

Tuan Yang di-Pertua,

### **Jawatankuasa Menangani Keganasan Rumah Tangga**

Jawatankuasa Menangani Keganasan Rumah Tangga yang telah ditubuhkan pada tahun 2019 merupakan *platform* bagi menyelaraskan perkara dan isu berkaitan keganasan rumah tangga. Jawatankuasa ini telah bersidang sebanyak dua kali dengan penglibatan daripada agensi kerajaan dan badan bukan kerajaan (NGO). Namun demikian, beberapa mesyuarat sampingan berkaitan keganasan rumah tangga mengikut isu turut diadakan secara berterusan khususnya semasa pandemik Covid-19 dan tempoh Perintah Kawalan Pergerakan bagi memastikan penyelarasan inisiatif dan tindakan pelaksanaan antara agensi kerajaan dan NGO.

Bagi pertanyaan bilangan kes keganasan rumah tangga, sebanyak 1,793 panggilan dan aduan berkaitan keganasan rumah tangga diterima menerusi Talian Kasih 15999 manakala 644 kes di bawah Jabatan Kebajikan Masyarakat (JKM) telah direkodkan bagi tempoh bulan Januari hingga Jun 2021.

Antara tindakan utama yang telah dan sedang dilaksanakan di bawah Jawatankuasa ini khususnya semasa pandemik Covid-19 dan pelaksanaan Perintah Kawalan Pergerakan (PKP) adalah seperti berikut:

- a) membangunkan dan mengedarkan bahan promosi untuk meningkatkan kesedaran serta pemahaman mengenai isu, hak, perkhidmatan dan tindakan yang boleh diambil berkaitan keganasan rumah tangga. Antaranya ialah infografik berkaitan jenis keganasan, kumpulan yang dilindungi dan perkhidmatan yang disediakan di bawah Akta Keganasan Rumah Tangga 1994;

## SOALAN NO : 14

- b) memperluaskan hebahan mengenai bantuan dan perkhidmatan yang boleh diakses serta menggesa orang ramai tampil membuat laporan dengan bantuan pelbagai pihak termasuklah bekerjasama dengan badan-badan bukan kerajaan. KWPKM turut memanfaatkan platform sistem pesanan ringkas Majlis Keselamatan Negara (MKN) yang mempunyai capaian yang lebih luas untuk menggesa mangsa atau orang awam tampil melaporkan kejadian keganasan rumah tangga;
- c) membantu memastikan permohonan Perintah Perlindungan Kecemasan atau *Emergency Protection Order* (EPO) yang dikeluarkan oleh Jabatan Kebajikan Masyarakat (JKM) dapat diakses oleh mangsa untuk menghalang pelaku dari melakukan keganasan terhadap mangsa;
- d) mendapatkan kerjasama Mahkamah Persekutuan bagi membolehkan Perintah Perlindungan Interim - *Interim Protection Order* (IPO) dan Perintah Perlindungan - *Protection Order* (PO) dapat diakses oleh mangsa;
- e) mendapatkan kerjasama Polis DiRaja Malaysia (PDRM) bagi memudahkan pergerakan mangsa untuk membuat laporan atau aduan;
- f) menguar-uarkan khidmat psiko-sosial yang boleh diakses menerusi Talian Kasih 15999 KPWKM kepada mangsa atau mana-mana individu yang memerlukan; dan
- g) menambah baik prosedur dan garis panduan untuk rujukan agensi kerajaan dalam mengendalikan kes keganasan rumah tangga selaras dengan peruntukan di bawah Akta Keganasan Rumah Tangga 1994.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK SERI DR. SHAMSUL ANUAR BIN  
HAJI NASARAH [ LENGGONG ]**

**TARIKH : 23 SEPTEMBER 2021**

**SOALAN**

**DATUK SERI DR. SHAMSUL ANUAR BIN HAJI NASARAH** minta **MENTERI KANAN PENDIDIKAN** menyatakan apakah usaha yang telah dilaksanakan oleh Kementerian dalam menghadapi cabaran isu pengajaran dan pembelajaran dalam talian serta keberkesanan pedagogi digital yang dilakukan pada ketika ini.

**JAWAPAN**

**Tuan Yang di-Pertua,**

Kementerian Pendidikan Malaysia (KPM) menyedari bahawa pandemik COVID-19 telah memberi kesan kepada sistem persekolahan. Sesi pengajaran dan pembelajaran (PdP) secara bersemuka menjadi lebih singkat apabila sekolah ditutup bagi membendung penularan COVID-19. Dalam tempoh tersebut, KPM telah menyediakan akses pembelajaran kepada murid melalui kaedah pengajaran dan pembelajaran di rumah (PdPR) mengikut kesesuaian guru dan murid.

Bagi memantau penyertaan murid dalam PdPR, KPM telah membangunkan Sistem Pelaporan Pengajaran dan Pembelajaran di Rumah (SPdPR). Sistem ini membolehkan penyertaan murid dipantau secara *real-time*. Hal ini membolehkan pihak sekolah melaksanakan intervensi yang bersesuaian bagi memastikan keterlibatan murid adalah secara optimum.

## SOALAN NO: 15

Data pelaporan bermula 20 Januari hingga 30 Ogos 2021 menunjukkan peratus murid yang mengikuti PdPR meningkat. Pelibatan murid sekolah rendah meningkat sebanyak 12.1 peratus iaitu daripada 87.1 peratus kepada 99.2 peratus. Pelibatan murid sekolah menengah pula meningkat sebanyak 19.3 peratus iaitu daripada 78.0 peratus kepada 97.3 peratus.

KPM juga telah melaksanakan penjajaran kandungan kurikulum mata pelajaran. Penjajaran ini difokuskan kepada Kandungan Asas (KA) supaya murid dapat disediakan untuk pembelajaran peringkat seterusnya. Kandungan Tambahan (KT) dan Kandungan Pelengkap (KP) pula boleh dilaksanakan mengikut keupayaan murid.

Bagi memperkasakan pelaksanaan kurikulum tersebut, KPM turut memperkenalkan Program Pemerkasaan Pelaksanaan Kurikulum (KPMPerkasaKU). Program KPMPerkasaKU dirangka dengan tujuan memastikan pembelajaran pemulihan bagi murid yang belum menguasai literasi dan numerasi. Di samping itu juga, program ini menyediakan pelbagai sokongan bagi mengukuh dan memperkayakan penguasaan kandungan mata pelajaran. Bagi mengenal pasti tahap penguasaan murid, Pentaksiran Bilik Darjah (PBD) dilaksanakan secara berterusan dalam tempoh PdP dan PdPR.

Bagi membantu murid yang tidak mempunyai akses kepada talian internet dan alat peranti digital yang sesuai untuk pembelajaran, KPM terus memperkasakan siaran pendidikan di DidikTV KPM. Selain itu, siaran TV Pendidikan di TV Okey RTM dan Tutor TV Astro juga diteruskan.

KPM turut menyediakan pelantar pembelajaran *Digital Educational Learning Initiative* Malaysia (DELIMa) yang mengandungi pelbagai sumber pendidikan. Sehingga kini, 3,245 video kurikulum, 324 video pedagogi dan 1,761 video DidikTV telah dimuat naik di pelantar DELIMa. KPM juga telah menaik taraf dan menambah baik pelantar DELIMa (DELIMa 2.0) dengan fitur baharu yang memberi fokus kepada pengalaman pengguna, analitis data, kandungan dan pembelajaran diperibadikan.



## **SOALAN NO: 15**

Untuk makluman Ahli Yang Berhormat, KPM sentiasa memperkasa program latihan pembangunan profesionalisme berterusan (PPB) kepada guru. Ini termasuklah latihan yang memberi fokus kepada kemahiran digital, pedagogi dalam dan luar talian serta pentaksiran secara dalam talian dan luar talian. Sehingga 17 September 2021, sebanyak 12,048 aktiviti PPB berkaitan PdPR dan 1,949 PPB berkaitan Digital/ICT telah direkodkan.

KPM sentiasa komited untuk memastikan murid dapat meneruskan pembelajaran dalam keadaan yang selamat dan mendapat akses kepada pembelajaran yang berkualiti pada setiap masa.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**Pertanyaan : JAWAB LISAN**

**Daripada : TUAN SIM TZE TZIN [ BAYAN BARU ]**

**Tarikh : 23 SEPTEMBER 2021 (RABU)**

**SOALAN**

minta **MENTERI KOMUNIKASI DAN MULTIMEDIA** menyatakan apakah rancangan untuk menyiarkan info terbaru tentang COVID-19 dan *Variant of Concern* yang baru kepada rakyat Malaysia. Apakah semua usaha itu berkesan.

**JAWAPAN**

Tuan Yang Dipertua,

Untuk makluman Ahli Yang Berhormat, Kementerian Komunikasi dan Multimedia Malaysia (KKMM) sangat memahami keprihatinan rakyat tentang maklumat-maklumat terbaharu mengenai COVID-19 termasuklah berkaitan *Variant of Concern* (VOC) yang saban waktu diperkatakan di peringkat global. KKMM telah mengatur strategi penyampaian maklumat yang eksklusif dan inklusif dalam perkara ini. Pengaturan laporan-laporan berbentuk berita, temu-ramah, rancangan bual bicara, rencana dan sebagainya dimantapkan dengan pembentangan fakta-fakta klinikal, akademik dan bervariasi dihidangkan kepada khalayak. Bentuk persembahan juga dipelbagaikan dengan grafik, infografik, videografik menarik juga dihidangkan kepada penonton bagi menarik minat mereka akan fakta-fakta yang agak teknikal dan berbentuk saintifik.

KKMM melihat bukan sahaja isu VOC yang perlu diterangkan kepada masyarakat, tetapi sejak awal, KKMM turut membentangkan laporan dan maklumat-maklumat berkaitan epidemik dan pandemik Covid-19 seperti punca-punca penularan, kawalan dan pencegahan semasa pandemik, keperluan vaksinasi dan pencapaian negara ke arah *herd community*. Kini pendekatan KKMM akan juga terarah kepada isu transisi negara dari fasa pandemik ke fasa endemik bagi mendidik dan menyediakan masyarakat untuk membiasakan diri hidup bersama COVID-19. Fakta-fakta bahawa pematuhan SOP dan kehidupan dalam norma baharu juga perlu ditekankan bagi melengkapkan pemahaman rakyat tentang kepentingan kawalan sendiri dan masyarakat setempat berbanding dengan penguatkuasaan pihak berkuasa dalam fasa endemik bagi meningkatkan kualiti hidup masing-masing.

Jentera-jentera penyampaian KKMM akan digerakkan bagi memastikan maklumat yang tepat dapat disalurkan dengan pantas kepada semua peringkat masyarakat bagi mengelakkan rakyat terkeliru dengan perubahan-

perubahan yang diperkenalkan oleh kerajaan dalam menangani isu-isu di bawah fasa pandemik dan fasa endemik.

Sejak wabak ini bermula Jabatan Penyiaran Malaysia (RTM) menerusi segala platformnya sama ada menerusi tv, radio atau media sosial rasmi bertindak menyampaikan apa sahaja maklumat terkini berkaitan wabak itu. Malah RTM telah dilantik sebagai saluran rasmi yang menyebarkan isu mengenai COVID-19 dan bertindak menyiarkan perkembangan terkini atau pengumuman daripada kerajaan berkaitan situasi terkini COVID-19 di negara ini termasuk siaran langsung sidang media YAB Perdana Menteri dan Menteri-menteri Kanan mengenai wabak berkenaan .

Mengenai penyampaian maklumat kemunculan varian baru COVID-19, usaha berterusan dibuat oleh RTM melalui liputan berita TV, berita radio, Seksyen Ehwat Semasa, program tv dan radio berkaitan serta platform media sosial rasmi RTM untuk memberi kesedaran kepada orang ramai tentang kewujudan varian baru COVID-19 dan bahayanya. Berita TV dari semasa ke semasa menyiarkan laporan berkaitan varian Delta yang mula dikesan menular di negara ini pada awal Jun 2021. Berita Radio pula menyiarkan laporan tentang varian Delta menerusi pelaporan Berita Utamanya. Sebagai contoh pada 18 Ogos 2021, Berita Utama menyiarkan laporan berkaitan Penjagaan kesihatan yang optimum dengan pematuhan Prosedur Operasi Standard (SOP) penting dalam usaha negara mengendalikan pandemik COVID-19 terutama melibatkan varian Delta yang baharu.

Manakala, Jabatan Penerangan Malaysia (JAPEN) secara berterusan mempergiatkan penyampaian perkhidmatan dan usaha-usaha hebahan mengenai maklumat-maklumat berkaitan pandemik COVID-19 di pelbagai platform komunikasi seperti berikut:

Aktiviti hebahan unit bergerak menerusi program *Info on Wheels* (IOW) sebanyak 17,977 program di 88,105 lokasi bagi menyalurkan maklumat dan membuat hebahan terus kepada kumpulan sasar termasuk maklumat-maklumat terkini berkaitan COVID-19 di kawasan-kawasan pedalaman

menggunakan pelbagai bahasa dan dialek agar masyarakat mendapat maklumat yang tepat dan difahami.

Perkongsian maklumat sahih kenyataan media, liputan berita/video, infografik dan videografik di semua platform media sosial rasmi JaPen termasuk *Facebook*, *Twitter*, *Instagram* dan *Youtube* disampaikan secara *real-time*. Sehingga Ogos 2021, sebanyak 2,568 hantaran terdiri daripada infografik, videografik dan video daripada sumber rasmi disebarluas. JaPen turut menghasilkan kandungan kreatif digital iaitu 108 infografik dan 64 videografik termasuk kenyataan-kenyataan daripada Ketua Pengarah Kesihatan Malaysia berkenaan varian baharu bagi memperluas sebaran maklumat kerajaan di platform media sosial.

BERNAMA pula sentiasa mengutamakan melapor dan menghebahkan semua informasi tepat dan mutakhir berkaitan COVID-19 termasuk varian-varian terbaharu daripada sumber sahih yang diterima daripada pihak berkuasa dan agensi yang berkaitan dengan pengurusan pandemik COVID-19 menerusi pelbagai platform BERNAMA termasuk BERNAMA *Wires*, BERNAMA TV, BERNAMA Radio dan platform media sosial dalam pelbagai bentuk seperti liputan harian, laporan khas, rencana, program bual bicara dan klip video pendek, PSA, foto dan podcast.

**PEMBERITAHUAN PERTANYAAN JAWAB LISAN  
DEWAN RAKYAT MESYUARAT PERTAMA, PENGGAL KEEMPAT  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : YB DATO' SRI ABDUL AZEEZ BIN  
ABDUL RAHIM [ BALING ]**

**TARIKH : 23 SEPTEMBER 2021 (KHAMIS)**

**SOALAN**

**DATO' SRI ABDUL AZEEZ BIN ABDUL RAHIM [ BALING ]** minta **MENTERI PEMBANGUNAN WANITA, KELUARGA DAN MASYARAKAT** menyatakan perkembangan Bantuan Khas Wanita 2021 yang dilaksanakan khususnya kepada wanita luar bandar.

**JAWAPAN**

Tuan Yang di-Pertua,

Kementerian Pembangunan Wanita, Keluarga dan Masyarakat (KPWKM) tidak mempunyai Bantuan Khas Wanita 2021 khususnya kepada wanita luar bandar. Walau bagaimanapun KPWKM melalui Yayasan Kebajikan Negara (YKN) telah diberi tanggungjawab untuk melaksanakan Program MyKasih Kapital bagi menyokong pemerikasaan negara khususnya dalam fasa pemulihan akibat pandemik COVID-19. MyKasih Kapital merupakan insentif tambahan kerajaan yang telah diumumkan sempena Sambutan Hari Wanita pada 8 Mac 2021 sebagai suntikan modal perniagaan berbentuk keusahawanan khusus kepada golongan wanita.

Bantuan ini diberikan secara umum kepada wanita pencari nafkah keluarga yang sedang bergelut dengan masalah kewangan sepanjang tempoh COVID-19. Pemberian insentif melalui bantuan asas modal perniagaan ini diberikan secara *one-off* iaitu sebanyak RM500 sebagai

usaha permulaan kepada mereka untuk menjana semula ekonomi keluarga melalui perniagaan menggunakan *platform* e-dagang/*dropship*.

Peserta yang berkecayaan akan mengikuti kursus asas perniagaan yang dianjurkan melalui kerjasama pelbagai agensi dan syarikat sebelum bantuan disalurkan. Berdasarkan rekod sehingga Ogos 2021 sebanyak 1,424 orang wanita yang berkecayaan telah menerima bantuan ini dengan jumlah peruntukkan yang disalurkan berjumlah RM712,000.

Selain itu, KPWK melalui Jabatan Pembangunan Wanita (JPW) juga mempunyai pelbagai program untuk membantu wanita dan ibu tunggal semasa pandemik COVID-19. JPW mula menggunakan Model Pemerkasaan Wanita (Model 4K – Kewangan, Kemahiran, Keseimbangan, Kesaksamaan dan Kepimpinan Kendiri) sebagai panduan dalam melaksanakan program di seluruh negara. Bagi tempoh Januari hingga Julai 2021, sebanyak 1,036 program yang melibatkan 570,677 peserta telah berjaya dilaksanakan. Antara beberapa program yang telah dilaksanakan adalah seperti berikut :

- (i) Kolaborasi Strategik bersama Kementerian Pembangunan Usahawan dan Koperasi (MEDAC) - JPW telah melaksanakan program penajaan pendapatan wanita melalui keusahawanan dan telah mengumpulkan seramai 5,634 permohonan menerusi program seperti berikut :
  - a) Program Bantuan Pembiayaan Berkelompok TemanNita;
  - b) Program Successful Women Entrepreneurship Engagement Talent (SWEET); dan
  - c) Program INSKEN Bumiputera Business Coaching (IBBC);
- (ii) Kolaborasi Strategik JPW bersama TalentCorp - menyediakan peluang pekerjaan kepada wanita melalui Program Karnival Kerjaya dan Usahawan Wanita;

- (iii) Program Literasi Kewangan yang banyak dijalankan secara bersama dengan AKPK memberi manfaat kepada 43,283 wanita;
- (iv) Program Kemahiran - Sebanyak 447 program berbentuk kemahiran telah dilaksanakan bagi tempoh Januari hingga Julai 2021. Seramai 227,528 wanita telah menerima manfaat khususnya membantu wanita meningkatkan keupayaan sendiri dalam menguruskan kehidupan seharian termasuk kemahiran dalam bidang literasi digital dan *first aid*;
- (v) Program Pemerkasaan Ibu Waja dengan kerjasama Pejabat Pembangunan Wanita Negeri (PPWN) Wilayah Persekutuan dalam memberi pengetahuan dan meningkatkan keyakinan ibu tunggal untuk menuntut hak di mahkamah tanpa perlu mendapat khidmat peguam untuk mewakili diri mereka. Sebanyak 6 program yang melibatkan 57 orang peserta telah dijalankan dengan jayanya;
- (vi) Program Keseimbangan iaitu Skuad Waja, Masjid Sebagai Pusat Perlindungan Sementara Bagi Mangsa Keganasan Rumahtangga, Legal Clinic dan Advokasi Gangguan Seksual. Mulai Januari hingga Julai 2021, sebanyak 265 program keseimbangan melibatkan 189,456 peserta telah dilaksanakan.

Melalui bantuan ekonomi di bawah inisiatif PENJANA yang telah diumumkan pada 5 Jun 2020, sebanyak RM45 juta telah disalurkan kepada Kementerian melalui Bantuan Khas Ibu Tunggal (BKIT) iaitu pemberian tunai sebanyak RM300 seorang secara *one-off* kepada seramai 142,190 ibu tunggal yang berkecukupan.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KE-14**

**PERTANYAAN : LISAN**

**DARIPADA : TUAN SYED IBRAHIM BIN SYED NOH  
[LEDANG]**

**TARIKH : 23 SEPTEMBER 2021 (KHAMIS)**

**SOALAN**

**TUAN SYED IBRAHIM BIN SYED NOH [ LEDANG ]** minta **MENTERI KEWANGAN** menyatakan menjelaskan perkembangan perancangan Kementerian bagi memastikan kekurangan RM4 bilion dalam pembiayaan perdagangan untuk melaksanakan pelan komunikasi 5G fasa tahun 2021-2024.

**JAWAPAN**

Tuan Yang di-Pertua,

1. Untuk pelaksanaan rangkaian 5G bagi fasa tahun 2021 – 2024, Digital Nasional Berhad (DNB) dijangka mengalami kekurangan sebanyak RM4 bilion berikutan perbelanjaan modal yang tinggi berbanding unjuran pendapatan yang lebih rendah. DNB dijangka mencatat lebihan bagi fasa tahun 2025 – 2030 apabila unjuran pendapatan dijangka meningkat seiring dengan permintaan bagi perkhidmatan rangkaian 5G.

2. Berdasarkan model perniagaan dan kewangan DNB, kekurangan ini akan dibiayai oleh syarikat tanpa melibatkan sebarang peruntukan daripada Kerajaan melalui kaedah seperti berikut:

- i. kemudahan pembiayaan perdagangan berjumlah sehingga RM3 bilion;
- ii. kemudahan pembiayaan modal kerja daripada institusi kewangan tempatan berjumlah sehingga RM2 bilion; dan
- iii. terbitan sukuk dan kemudahan kredit jangka panjang daripada pasaran berjumlah sehingga RM5 bilion.

3. Kemudahan ini merupakan keseluruhan jumlah kemudahan pembiayaan yang dirancang sebagai sumber pembiayaan DNB bagi memenuhi keperluan keseluruhan pelaksanaan perkhidmatan rangkaian 5G daripada 2021 – 2030. Walau bagaimanapun, penggunaan kemudahan tersebut adalah tertakluk kepada aliran tunai sebenar syarikat yang mana bagi 2021 – 2024, DNB dijangka memerlukan pembiayaan sekitar RM4 bilion.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' SERI TIONG KING SING [ BINTULU ]**

**TARIKH : 23 SEPTEMBER 2021 (KHAMIS)**

**SOALAN**

**DATO' SERI TIONG KING SING** minta **MENTERI KANAN PENDIDIKAN** menyatakan:-

- (a) apakah langkah-langkah Kerajaan untuk menangani masalah telekomunikasi untuk Pengajaran dan Pembelajaran di Rumah (PdPR) untuk pelajar-pelajar di luar bandar yang terjejas akibat penularan wabak COVID-19 semenjak tahun 2020 ; dan
- (b) apakah sebab dewan-dewan sekolah tidak dibenarkan untuk digunakan sebagai pusat kuarantin COVID-19.

**JAWAPAN**

**Tuan Yang di-Pertua,**

Kementerian Pendidikan Malaysia (KPM) menyedari bahawa pandemik COVID-19 telah memberi kesan kepada sistem persekolahan. Sesi pengajaran dan pembelajaran (PdP) secara bersemuka menjadi lebih singkat apabila sekolah ditutup bagi membendung penularan COVID-19. Dalam tempoh tersebut, KPM telah menyediakan akses pembelajaran kepada murid melalui kaedah pengajaran dan pembelajaran di rumah (PdPR) mengikut kesesuaian guru dan murid. PdPR boleh dilaksanakan melalui tiga pendekatan iaitu secara dalam talian (online), luar talian (off-line) dan *off-site* mengikut kesesuaian guru dan murid.

KPM telah melaksanakan penjajaran kandungan kurikulum mata pelajaran. Penjajaran ini difokuskan kepada Kandungan Asas (KA) supaya murid dapat disediakan untuk pembelajaran peringkat seterusnya. Kandungan Tambahan (KT) dan Kandungan Pelengkap (KP) pula boleh dilaksanakan mengikut keupayaan murid.

Bagi memperkasakan pelaksanaan kurikulum tersebut, KPM turut memperkenalkan Program Pemerkasaan Pelaksanaan Kurikulum (KPMPerkasaKU). Program KPMPerkasaKU dirancang dengan tujuan memastikan pembelajaran pemulihan bagi murid yang belum menguasai literasi dan numerasi. Di samping itu juga, program ini menyediakan pelbagai sokongan bagi mengukuh dan memperkayakan penguasaan kandungan mata pelajaran. Bagi mengenal pasti tahap penguasaan murid, Pentaksiran Bilik Darjah (PBD) dilaksanakan secara berterusan dalam tempoh PdP dan PdPR.

Bagi membantu murid yang tidak mempunyai akses kepada talian internet dan alat peranti digital yang sesuai untuk pembelajaran, KPM terus memperkasakan siaran pendidikan di DidikTV KPM. Selain itu, siaran TV Pendidikan di TV Okey RTM dan Tutor TV Astro juga diteruskan.

KPM turut menyediakan pelantar pembelajaran *Digital Educational Learning Initiative* Malaysia (DELIMa) yang mengandungi pelbagai sumber pendidikan. Sehingga kini, 3,245 video kurikulum, 324 video pedagogi dan 1,761 video DidikTV telah dimuat naik di pelantar DELIMa. KPM juga telah menaik taraf dan menambah baik pelantar DELIMa (DELIMa 2.0) dengan fitur baharu yang memberi fokus kepada pengalaman pengguna, analitis data, kandungan dan pembelajaran diperibadikan.

Untuk makluman Ahli Yang Berhormat, penggunaan dewan sekolah sebagai pusat kuarantin COVID-19 adalah berdasarkan kepada permohonan yang dikemukakan kepada KPM oleh Kementerian Kesihatan Malaysia (KKM) dan Majlis Keselamatan Negara (MKN). KPM telah memberikan kebenaran untuk menggunakan 88 buah premis bawah KPM sebagai pusat kuarantin COVID-19. Kebenaran ini termasuk menggunakan dewan sekolah. Walau bagaimanapun, agensi berkenaan hendaklah mematuhi SOP yang ketat serta syarat yang telah ditetapkan KPM seperti berikut:

- i. tempoh penggunaan institusi pendidikan sebagai pusat kuarantin COVID-19 hendaklah tamat dua (2) minggu sebelum sekolah mula beroperasi;
- ii. KKM perlu memberi jaminan keselamatan terhadap warga sekolah tersebut yang hadir bertugas memandangkan pejabat pentadbiran masih beroperasi semasa tempoh fasa Pelan Pemulihan Negara (PPN); dan
- iii. KKM dan MKN perlu mematuhi Garis Panduan Penggunaan Institusi Pendidikan Kementerian Pendidikan Malaysia Sebagai Pusat Pengurusan Dan Pengoperasian COVID-19 atau Pusat Penempatan Sementara Mangsa Bencana.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : YB TENGKU ZULPURI BIN RAJA PUJI (RAUB)**

**TARIKH : 15 SEPTEMBER 2021 (RABU)**

**SOALAN**

**TENGKU ZULPURI BIN RAJA PUJI [ RAUB ]** minta **MENTERI PENGANGKUTAN** menyatakan bahawa ada cadangan memanjangkan lesen terhad jenis untuk sektor pertanian di bandar Raub. Di mana salah satu dorongan daripada Kerajaan menolong sektor pertanian di luar bandar.

**JAWAPAN**

**Tuan Yang di-Pertua,**

Kementerian Pengangkutan Malaysia tidak pernah mengeluarkan sebarang lesen terhadap sama ada Lesen Kenderaan Motor (LKM) atau Lesen Memandu Malaysia (LMM) untuk sektor pertanian secara khusus.

Namun, terdapat inisiatif atau kemudahan bagi Kenderaan *decontrolled* di Cameron Highlands, bagi mengangkut hasil agrotani dan barang-barang pertanian di sekitar Cameron Highlands, yang diberikan pengurangan kadar fi Lesen Kenderaan Motor (LKM). Hanya pemilik kenderaan yang mematuhi semua syarat yang telah ditetapkan oleh Jabatan Pengangkutan Jalan Malaysia sahaja dipertimbangan untuk penawaran inisiatif ini.

Pemilik yang layak dipertimbangan perlu mematuhi Garis Panduan yang telah ditetapkan dan pergerakan kenderaan tersebut juga adalah terkawal dan terbatas (limitasi) dalam kawasan operasi yang telah ditetapkan sahaja.

Pada masa ini, pihak Kementerian Pengangkutan Malaysia tiada sebarang perancangan untuk perluasan inisiatif atau kemudahan ini, namun terbuka untuk menerima dan mempertimbangkan sebarang permohonan serta cadangan daripada mana-mana pihak, tertakluk kepada justifikasi permohonan, dokumen sokongan yang disertakan dan pematuhan kepada syarat-syarat yang telah ditetapkan.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' SRI RICHARD RIOT ANAK JAEM  
[ SERIAN ]**

**TARIKH : 23 SEPTEMBER 2021 (KHAMIS)**

**SOALAN**

**DATO' SRI RICHARD RIOT ANAK JAEM** minta **MENTERI KANAN PENDIDIKAN** menyatakan adakah sekolah baru SK Sri Sadong di Serian, Sarawak boleh ditukar nama kepada SK St Teresa, Serian.

**JAWAPAN**

**Tuan Yang di-Pertua,**

Projek pembinaan sekolah kerajaan baharu iaitu Sekolah Kebangsaan (SK) Sri Sadong, Serian, Sarawak telah diluluskan dalam *Rolling Plan* 1 (Tahun 2016) Rancangan Malaysia Ke-11 (RMKe-11). Pembinaan sekolah tersebut adalah bagi memenuhi keperluan pendidikan dan pertambahan penduduk di kawasan Serian. Projek ini bukan gantian kepada SK St. Teresa. Ini kerana SK Sri Sadong merupakan sekolah yang dibina menggunakan peruntukan kerajaan sepenuhnya. Pertukaran nama SK Sri Sadong kepada SK St Teresa akan menimbulkan kekeliruan kerana sekolah tersebut adalah sekolah yang berstatus Sekolah Bantuan Kerajaan (SBK). Tambahan pula, SK St. Teresa telah dibatalkan pendaftarannya pada 25 Januari 2021 selaras dengan seksyen 87 Akta Pendidikan 1996 [Akta 550]. Oleh itu, pertukaran nama sekolah tersebut tidak dapat dipertimbangkan.



**PEMBERITAHUAN PERTANYAAN  
DEWAN RAKYAT MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : TUAN GOBIND SINGH DEO [ PUCHONG ]**

**TARIKH : 23 SEPTEMBER 2021 (KHAMIS)**

**SOALAN**

minta **MENTERI KOMUNIKASI DAN MULTIMEDIA** menyatakan sama ada harga Internet akan dikurangkan lagi dalam masa terdekat dan apakah tindakan diambil untuk memastikan Internet di negara ini berkualiti baik.

**JAWAPAN**

Tuan Yang Dipertua,

Untuk makluman Ahli Yang Berhormat, Kerajaan melalui Suruhanjaya Komunikasi dan Multimedia Malaysia (MCMC) sentiasa memantau pakej dan harga yang ditawarkan kepada pengguna bagi memastikan pengguna dapat menikmati Internet pada harga yang berpatutan. Terdapat pelbagai pilihan yang ditawarkan mengikut keperluan dan tahap kemampuan pengguna iaitu melalui jalur lebar tetap, jalur lebar mudah alih dan jalur lebar tetap tanpa wayar. Pakej asas jalur lebar mudah alih prabayar ditawarkan pada harga RM10 manakala harga pakej asas jalur lebar mudah alih pascabayar ditawarkan pada harga RM8. Secara umumnya, pengguna boleh menikmati perkhidmatan jalur lebar mudah alih dengan harga serendah **27 sen sehari**.

Selain daripada itu, di bawah Pakej Rangsangan Ekonomi Prihatin Rakyat (PRIHATIN) dan Pakej Perlindungan Rakyat dan Pemulihan Ekonomi (PEMULIH), pembekal perkhidmatan mudah alih utama juga menawarkan internet secara percuma sebanyak 1GB setiap hari (bersamaan 30GB data percuma setiap bulan) bermula dari 1 April 2020 sehingga akhir tahun 2021. Penggunaan data percuma 1GB ini boleh digunakan untuk aktiviti produktiviti dan khusus untuk tujuan pengajaran dan pembelajaran dalam talian.

Sejajar dengan penggunaan data yang semakin meluas, kebanyakan syarikat telekomunikasi mudah alih utama juga telah mula menawarkan pakej data tanpa had untuk pelan prabayar pada harga serendah RM30 mulai Jun 2020.

Manakala bagi perkhidmatan jalur lebar tetap berkelajuan tinggi, terdapat syarikat penyedia perkhidmatan yang menawarkan pakej asas 30Mbps pada harga RM80 sebulan. Bagi kawasan yang tidak ada liputan jalur lebar tetap berkelajuan tinggi, Telekom Malaysia (TM) menawarkan pakej Broadband Lite Package pada harga RM38 dengan data sebanyak 50GB, selain pakej-pakej yang lain. Memandangkan sasaran pakej jalur lebar talian tetap adalah kepada penggunaan isi rumah dan dengan mengambil kira laporan Jabatan Perangkaan Malaysia bahawa purata isi

rumah untuk tahun 2019 adalah seramai 4 orang, ini bermaksud harga jalur lebar talian tetap untuk setiap pengguna isi rumah adalah serendah **32 sen sehari**.

Bagi memastikan kualiti perkhidmatan Internet di Malaysia sentiasa ditambah baik, Kerajaan telah memperkenalkan Pelan Jalinan Digital Negara (JENDELA) pada 29 Ogos 2020. Inisiatif ini menjadi platform penambahbaikan komunikasi digital negara di bawah Rancangan Malaysia ke-12 (2021–2025) melalui peningkatan tahap kesalinghubungan serta pengalaman perkhidmatan komunikasi melalui pembangunan infrastruktur yang mampan. Pencapaian JENDELA sehingga suku kedua 2021 adalah seperti berikut:

- a. Penambahan sebanyak 1.1 juta premis daripada 4.95 juta premis yang menjadikan jumlah keseluruhan sebanyak 6.05 juta premis di seluruh negara telah disediakan dengan akses gentian optik;
- b. Kelajuan jalur lebar mudah alih meningkat daripada 25Mbps kepada 26.03Mbps;
- c. Peluasan liputan jalur lebar mudah alih 4G daripada 91.8% kepada 94.03% di kawasan berpenduduk; dan
- d. hampir 1 juta pelanggan 3G sedia ada telah beralih kepada 4G dan lebih 39,000 rangkaian 3G telah ditutup untuk menambahbaik liputan dan kualiti perkhidmatan teknologi 4G.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN LUKANISMAN BIN AWANG SAUNI  
[ SIBUTI ]**

**TARIKH : 23 SEPTEMBER 2021 (KHAMIS)**

**SOALAN**

**TUAN LUKANISMAN BIN AWANG SAUNI** minta **MENTERI KANAN PENDIDIKAN** menyatakan adakah pihak Kementerian mempunyai data terperinci mengenai jumlah 'pelajar hilang' atau pelajar yang tidak pernah menghadiri sesi Pengajaran dan Pembelajaran di Rumah (PdPR) dan apakah langkah Kementerian untuk membantu golongan tersebut.

**JAWAPAN**

**Tuan Yang di-Pertua,**

Kementerian Pendidikan Malaysia (KPM) menyedari bahawa pandemik COVID-19 telah memberi kesan kepada sistem persekolahan. Sesi pengajaran dan pembelajaran (PdP) secara bersemuka menjadi lebih singkat apabila sekolah ditutup bagi membendung penularan COVID-19. Dalam tempoh tersebut, KPM telah menyediakan akses pembelajaran kepada murid melalui kaedah pengajaran dan pembelajaran di rumah (PdPR) mengikut kesesuaian guru dan murid.

Bagi memantau penyertaan murid dalam PdPR, KPM telah membangunkan Sistem Pelaporan Pengajaran dan Pembelajaran di Rumah (SPdPR). Sistem ini membolehkan penyertaan murid dipantau secara *real-time*. Hal ini membolehkan pihak sekolah melaksanakan intervensi yang bersesuaian bagi memastikan keterlibatan murid adalah secara optimum.

Data pelaporan bermula 20 Januari hingga 30 Ogos 2021 menunjukkan peratus murid yang mengikuti PdPR meningkat. Pelibatan murid sekolah rendah meningkat sebanyak 12.1 peratus iaitu daripada 87.1 peratus kepada 99.2 peratus. Pelibatan murid sekolah menengah pula meningkat sebanyak 19.3 peratus iaitu daripada 78.0 peratus kepada 97.3 peratus.

Selain daripada itu, sewaktu sesi persekolahan dibuka semula sebelum ini, guru telah membuat pengesanan terhadap tahap penguasaan kemahiran murid. Ini membolehkan guru merancang dan melaksanakan intervensi yang bersesuaian.

KPM juga telah melaksanakan penjajaran kandungan kurikulum mata pelajaran. Penjajaran kurikulum mata pelajaran difokuskan kepada Kandungan Asas (KA) supaya murid dapat disediakan untuk pembelajaran peringkat seterusnya. Kandungan Tambahan (KT) dan Kandungan Pelengkap (KP) pula boleh dilaksanakan mengikut keupayaan murid.

Bagi memperkasakan pelaksanaan kurikulum, KPM juga menambah baik sokongan pembelajaran dengan memperkenalkan Program Pemerkasaan Pelaksanaan Kurikulum (KPMPerkasaKU). Program KPMPerkasaKU dirangka dengan tujuan memastikan pembelajaran pemulihan bagi murid yang belum menguasai literasi dan numerasi. Di samping itu juga, program ini menyediakan pelbagai sokongan bagi mengukuh dan memperkayakan penguasaan kandungan mata pelajaran. Program ini melibatkan murid sekolah rendah dan sekolah menengah.

Selain itu, KPM juga telah memperkenalkan semula siaran TV Pendidikan. Murid boleh mengikuti pelbagai rancangan TV Pendidikan melalui saluran DidikTV KPM, TV Okey RTM dan Tutor TV Astro. Kandungan yang disediakan adalah berdasarkan kepada kurikulum peringkat prasekolah hingga ke tingkatan enam. Di samping itu, kandungan rancangan TV Pendidikan turut memuatkan slot yang berkaitan kokurikulum.

KPM turut menambah lebih banyak bahan PdP melalui *Digital Educational Learning Initiative* Malaysia (DELIMa). Pelantar ini merupakan pusat rujukan sehenti yang mengandungi pelbagai aplikasi, perkhidmatan dan sumber pendidikan digital. Sehingga kini, 3,245 video kurikulum, 324 video pedagogi dan 1,761 video DidikTV telah dimuat naik di pelantar DELIMa.

Untuk makluman Ahli Yang Berhormat, KPM menyedari bahawa sesi persekolahan secara bersemuka untuk tahun 2020 dan tahun 2021 tidak dapat dilaksanakan sepertimana kebiasaan. Justeru, KPM telah membuat ketetapan untuk melanjutkan sesi persekolahan tahun 2021 sehingga bulan Februari 2022. Pelanjutan sesi ini membolehkan pihak sekolah merancang dan melaksanakan aktiviti pemulihan, pengukuhan dan pengayaan secara intensif bagi meningkatkan kesediaan murid untuk mengikuti tahun persekolahan berikutnya.

KPM yakin kerangka holistik yang dirancang dan dilaksanakan ini membolehkan murid mengikuti PdPR secara lebih berkesan. Pada masa yang sama, KPM telah merangka pelan pembukaan semula sekolah yang komprehensif untuk membawa murid kembali ke sekolah dalam keadaan teratur dan selamat.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KE-14**

**PERTANYAAN : LISAN**

**DARIPADA : DATO' SERI ANWAR BIN IBRAHIM  
[PORT DICKSON]**

**TARIKH : 23 SEPTEMBER 2021 (KHAMIS)**

**SOALAN**

**DATO' SERI ANWAR BIN IBRAHIM [ PORT DICKSON ]** minta **MENTERI KEWANGAN** menyatakan jumlah terkini wang yang telah dibelanjakan melalui Kumpulan Wang Disatukan semasa darurat 2021 dan bilakah Kerajaan bercadang untuk membentangnya di Dewan Rakyat.

**JAWAPAN**

Tuan Yang di-Pertua,

1. Untuk makluman Yang Berhormat, setakat 31 Ogos 2021, iaitu berakhirnya tempoh darurat, sejumlah 146.5 bilion ringgit telah dibelanjakan di bawah anggaran perbelanjaan mengurus (atau OE) Kerajaan Persekutuan, manakala sejumlah 40 bilion ringgit telah dibelanjakan di bawah anggaran perbelanjaan pembangunan (atau DE).
2. Kedua-dua perbelanjaan ini merupakan sebahagian daripada Belanjawan 2021 bernilai RM322.5 bilion dan dibuat berdasarkan kepada peruntukan yang telah diluluskan oleh Parlimen di bawah Anggaran Perbelanjaan Persekutuan bagi tahun 2021. Sehubungan itu, tiada perbelanjaan tambahan telah dibuat di bawah OE atau DE semasa tempoh darurat yang perlu dibentangkan di Dewan Rakyat kerana ianya menggunakan peruntukan semasa yang telah diluluskan bagi tahun 2021.
3. Selain itu, Kerajaan telah meluluskan ordinan semasa tempoh darurat yang membolehkan perbelanjaan tambahan dibuat oleh Kementerian Kewangan tanpa dibentangkan kepada Parlimen. Namun demikian, ordinan tersebut tidak digunakan untuk tahun 2021 tetapi hanya digunakan untuk meluluskan tambahan perbelanjaan bagi tahun 2020.
4. Di samping perbelanjaan OE dan DE, Kerajaan juga telah membiayai pakej rangsangan dan bantuan melalui Kumpulan Wang Covid-19 (atau KWC). Parlimen telah meluluskan pindaan siling KWC pada 31 Disember 2020 sehingga 65 bilion ringgit. Setakat 31 Ogos 2021, perbelanjaan KWC adalah berjumlah 58.8 bilion ringgit. Justeru, mengambil kira keperluan tambahan untuk membantu rakyat yang terjejas dan menyokong kelangsungan perniagaan, Kerajaan akan membentangkan ke Parlimen dalam penggal ini untuk meningkatkan siling KWC kepada RM110 bilion untuk membiayai bantuan dan sokongan tambahan bagi tahun 2021 dan selanjutnya.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN LUKANISMAN BIN AWANG SAUNI  
[ SIBUTI ]**

**TARIKH : 23 SEPTEMBER 2021 (KHAMIS)**

**SOALAN**

**TUAN LUKANISMAN BIN AWANG SAUNI** minta **MENTERI KANAN PENDIDIKAN** menyatakan adakah terdapat ruang/platform untuk belia terlibat dan mempunyai perbualan yang sukar dan perbalahan dengan Kerajaan mengenai topik-topik yang amat membimbangkan mereka dengan cara yang dipandu oleh pihak sekolah dan selamat apabila mengutarakan pandangan tanpa dikenakan tindakan undang-undang.

**JAWAPAN**

Tuan Yang di-Pertua,

Kementerian Pendidikan Malaysia (KPM) menyedari bahawa murid adalah sebahagian daripada belia. Sehubungan itu, KPM telah merangka program-program yang bersifat holistik dan memberi penekanan terhadap aspek perpaduan, patriotisme dan jati diri. Tiga aspek ini akan menjadi panduan kepada murid untuk menyuarakan pandangan dalam kelompok sosial masing-masing secara berpandu dengan menghormati nilai-nilai murni dalam masyarakat dan perundangan negara.

Dalam usaha memupuk nilai ketatanegaraan dan jati diri di peringkat sekolah, KPM bukan sahaja menerapkan elemen-elemen tersebut dalam sesi pengajaran dan pembelajaran (PdP) di bilik darjah, malah turut diterapkan dalam aktiviti luar bilik darjah iaitu ketika menjalankan aktiviti kokurikulum.

Aktiviti kokurikulum merupakan kegiatan secara berkumpulan yang dirancang lanjutan daripada proses PdP dalam bilik darjah yang memberi peluang untuk menambah, mengukuh dan mengamalkan pengetahuan, kemahiran serta nilai yang dipelajari di bilik darjah. Aktiviti yang disertai oleh murid adalah Pasukan Badan Beruniform, persatuan dan sukan/permainan. Apabila murid menyertai aktiviti kokurikulum ini, mereka boleh bertukar pandangan, idea dan minat serta berbincang mengenai isu semasa.

Selain itu, pertandingan pidato dan bahas di peringkat sekolah, daerah, negeri dan kebangsaan juga merupakan platform kepada murid untuk mengemukakan idea, pandangan dan kritikan mereka terhadap sesuatu tajuk. Dalam konteks ini, murid dipandu oleh guru penasihat masing-masing berkaitan etika dan kemahiran menyuarakan pandangan dengan bernas. Aktiviti pidato dan bahas dapat meningkatkan kemahiran berfikir secara kritis, memupuk keyakinan diri dan melatih penggunaan bahasa yang baik dan beretika.

**PEMBERITAHUAN PERTANYAAN JAWAB LISAN  
DEWAN RAKYAT MESYUARAT PERTAMA, PENGGAL KEEMPAT  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : YB DATO' SERI DR. WAN AZIZAH  
WAN ISMAIL [ PANDAN ]**

**TARIKH : 23 SEPTEMBER 2021 (KHAMIS)**

**SOALAN**

**DATO' SERI DR. WAN AZIZAH WAN ISMAIL [ PANDAN ]** minta **MENTERI PEMBANGUNAN WANITA, KELUARGA DAN MASYARAKAT** menyatakan apakah status terkini penggubalan Rang Undang-Undang Gangguan Seksual dan bilakah tarikh ia akan dibentangkan di Parlimen.

**JAWAPAN**

Tuan Yang di-Pertua,

Draf Rang Undang-Undang Anti-Gangguan Seksual (RUU AGS) telah digubal secara kolektif melalui sebuah pasukan projek khas dengan penyertaan pelbagai pihak daripada wakil-wakil kementerian dan agensi yang berkaitan, badan-badan bukan kerajaan serta ahli-ahli akademik. Saya mengambil kesempatan ini untuk menyampaikan penghargaan atas komitmen dan dedikasi semua pihak yang membantu menyediakan draf RUU AGS ini.

Beberapa sesi libat urus juga telah dan sedang dilaksanakan dengan pihak-pihak yang akan terkesan dengan pelaksanaannya. Draf ini telah melalui beberapa proses perbincangan dan rundingan dengan Jabatan Peguam Negara (AGC). Proses penggubalan rang undang-undang memerlukan semakan silang bersama banyak pihak bagi memastikan segala elemen yang dimasukkan adalah menyeluruh dan

boleh diterima di setiap peringkat di dalam semua sektor di Malaysia bagi melengkapi akta dan peraturan lain berkaitan gangguan seksual yang dinyatakan sebentar tadi.

Sehubungan dengan itu, proses ketekunan wajar, dengan izin, *due diligence* perlu dilaksanakan dengan teliti dan sememangnya memakan masa. Oleh itu, RUU Anti-Gangguan Seksual ini tidak boleh diluluskan semata-mata untuk memenuhi gesaan mana-mana pihak. Proses semakan, penambahbaikan dan sesi libat urus dengan pelbagai pihak berkepentingan sedang giat dilaksanakan untuk memurnikan lagi RUU ini sebelum ia dibentangkan di dalam Mesyuarat Jemaah Menteri seterusnya di Dewan Parlimen yang mulia ini.

Sementara menunggu RUU ini dibentangkan, kes-kes gangguan seksual ditangani melalui pelbagai Akta dan peraturan lain seperti:

- i. Kanun Keseksaan [Akta 574];
- ii. Akta Kerja 1995 [Akta 265];
- iii. Peraturan 4A, Peraturan-Peraturan Pegawai Awam (Kelakuan dan Tatatertib) 1993 [P.U (A) 395/1993];
- iv. Kod Amalan Untuk Mencegah dan Membasmi Gangguan Seksual di Tempat Kerja 1999; dan
- v. Pekeliling Perkhidmatan Bilangan 5 Tahun 2018 iaitu Garis Panduan Pengendalian Kes Gangguan Seksual di Tempat Kerja Dalam Perkhidmatan Awam.

Bagi kes dalam sektor swasta, Kementerian Sumber Manusia (KSM) melalui Jabatan Tenaga Kerja Semenanjung Malaysia (JTKSM) menguatkuasakan Akta Kerja 1955 [Akta 265] dengan mensyaratkan majikan menjalankan siasatan terhadap aduan gangguan seksual di tempat kerja yang dilaporkan oleh pekerja.

Bagi kes dalam sektor awam, Jabatan Perkhidmatan Awam (JPA) sedang membangunkan Modul Intervensi Gangguan Seksual Di Tempat Kerja

untuk kegunaan Pegawai Psikologi atau Kaunselor Organisasi dalam mengendalikan kes gangguan seksual di tempat kerja.

Bagi kes gangguan seksual terhadap kanak-kanak pula, ia turut ditangani secara khusus melalui Akta Kesalahan-Kesalahan Seksual Terhadap Kanak-Kanak 2017 [*Akta 792*].

Pada masa yang sama, Kementerian terutamanya melalui Jabatan Pembangunan Wanita (JPW) giat mengadakan program-program untuk meningkatkan kesedaran masyarakat tentang gangguan seksual supaya dapat mengelakkan perlakuan tersebut daripada terus berleluasa sama ada secara fizikal, visual ataupun lain-lain bentuk. Pada tahun ini sehingga Jun 2021, sebanyak 53 program telah dilaksanakan oleh JPW bertujuan untuk memberikan kesedaran mengenai perkara ini dengan penglibatan seramai 11,367 peserta di seluruh negeri.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

---

**PERTANYAAN : LISAN**

**DARIPADA : YB DATO' SRI BUNG MOKTAR BIN RADIN  
[ KINABATANGAN ]**

**TARIKH : 23 SEPTEMBER 2021 (KHAMIS)**

**SOALAN**

Minta **MENTERI PENGAJIAN TINGGI** menyatakan apakah Kementerian berhasrat untuk mengkaji semula yuran-yuran pengajian di institusi pengajian tinggi ataupun memberikan pengurangan atau pengecualian pembayaran yuran-yuran pengajian bagi membantu meringankan beban kewangan keluarga pelajar yang terjejas ekoran pandemik COVID-19.

**JAWAPAN**

Tuan Yang di-Pertua,

KPT sentiasa mendengar dan memahami keluh kesah pelajar dan keluarga mereka yang terkesan sepanjang lebih setahun pandemik COVID-19 ini melanda. Sehubungan itu, bagi meringankan bebanan mereka, Universiti Awam (UA) telah melaksanakan beberapa inisiatif, antaranya, melalui pengurangan Yuran Perkhidmatan, Yuran Asrama, Yuran Konvokesyen dan Yuran Aktiviti Kolej di antara purata 10% ke 15% pada Semester Kedua Sesi Akademik 2019/2020.

Pengurangan yuran bagi Semester Kedua Sesi Akademik 2019/2020 untuk semua pelajar warganegara Malaysia melibatkan peruntukan sebanyak RM75 juta yang mana RM20 juta merupakan peruntukan tambahan Kerajaan dan RM55 juta menggunakan sumber dalaman UA. Bagi Semester Pertama Sesi Akademik 2020/2021 pula, pengurangan yuran sebanyak RM70.2 juta telah diberikan oleh Universiti Awam. Manakala bagi Semester Kedua Sesi Akademik 2020/2021, pengurangan sebanyak RM40.5 juta telah diberikan. Inisiatif ini telah melibatkan implikasi kewangan yang dianggarkan berjumlah RM185.7 juta untuk manfaat 386,142 orang pelajar bagi ketiga-tiga semester.

Tuan Yang di-Pertua,

Bagi meneruskan usaha untuk membantu pelajar yang terkesan dengan pandemik COVID-19, terkini semua UA telah bersetuju untuk memberikan pengurangan yuran Semester Pertama Sesi Akademik 2021/2022 sebanyak 20% kepada semua pelajar warganegara Malaysia. Pengurangan ini melibatkan nilai berjumlah RM175 juta dan dapat memberi manfaat kepada lebih kurang 555,340 pelajar. Pengurangan yuran pelajar sebanyak 20% kali ini adalah lebih luas kerana ianya melibatkan pengurangan kepada semua jenis yuran yang dikenakan oleh UA.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK SERI DR. MUJAHID BIN YUSOF  
RAWA [ PARIT BUNTAR ]**

**TARIKH : 23 SEPTEMBER 2021 (KHAMIS)**

**SOALAN**

**DATUK SERI DR. MUJAHID BIN YUSOF RAWA** minta **MENTERI KANAN PENDIDIKAN** menyatakan berapakah jumlah murid yang tercicir daripada mengikuti kelas Pengajaran dan Pembelajaran di Rumah (PdPR) kerana masalah ketiadaan peranti serta talian dan data internet. Apakah usaha Kementerian menyelesaikan masalah ketiadaan peranti serta talian dan data internet bagi mengatasi keciciran pelajar daripada mengikuti kelas PdPR.

**JAWAPAN**

**Tuan Yang di-Pertua,**

Kementerian Pendidikan Malaysia (KPM) mendefinisikan keciciran daripada sistem pendidikan sebagai situasi dimana murid warganegara Malaysia yang berada dalam sistem pendidikan (bersekolah) tetapi keluar daripada sistem sebelum tamat/menghabiskan tempoh pendidikan.

Kadar murid cicir di Malaysia pada peringkat sekolah rendah menurun daripada 0.15 peratus pada tahun 2018 kepada 0.12 peratus pada tahun 2019. Manakala kadar murid cicir peringkat sekolah menengah menurun daripada 1.21 peratus pada tahun 2018 kepada 1.14 peratus pada tahun 2019. Data murid cicir tahun 2020 menunjukkan bahawa kadar murid cicir pada peringkat sekolah rendah adalah 0.10 peratus. Manakala kadar murid cicir pada peringkat sekolah menengah



adalah 1.13 peratus. Data keciciran bagi tahun 2021 akan dikeluarkan sebelum akhir tahun ini.

Untuk makluman Ahli Yang Berhormat, KPM menyedari bahawa pandemik COVID-19 memberi kesan kepada pembelajaran murid terutamanya apabila mereka tidak dapat hadir ke sekolah secara bersemuka. Oleh yang demikian, selain daripada keciciran daripada sistem pendidikan, KPM turut melihat keciciran dalam konteks penguasaan pembelajaran.

Bagi memastikan tiada murid yang tercicir dalam pembelajaran semasa penutupan sesi persekolahan bersemuka, KPM telah melaksanakan Pengajaran dan Pembelajaran di Rumah (PdPR). PdPR dilaksanakan melalui tiga pendekatan iaitu secara dalam talian (*online*), di luar talian (*off-line*) dan *off-site* mengikut kesesuaian guru dan murid.

KPM telah membangunkan satu kerangka holistik dalam memastikan PdP dapat terus dilaksanakan dengan berkesan. Di samping itu, KPM akan terus menambah baik pelaksanaan PdPR bagi memastikan keberkesanannya dapat ditingkatkan dari semasa ke semasa.

Bagi memantau penyertaan murid dalam PdPR, KPM telah membangunkan Sistem Pelaporan Pengajaran dan Pembelajaran di Rumah (SPdPR). Sistem ini membolehkan penyertaan murid dipantau secara *real-time*. Hal ini membolehkan pihak sekolah melaksanakan intervensi yang bersesuaian bagi memastikan keterlibatan murid adalah secara optimum.

Data pelaporan bermula 20 Januari hingga 30 Ogos 2021 menunjukkan peratus murid yang mengikuti PdPR meningkat. Pelibatan murid sekolah rendah meningkat sebanyak 12.1 peratus iaitu daripada 87.1 peratus kepada 99.2 peratus. Pelibatan murid sekolah menengah pula meningkat sebanyak 19.3 peratus iaitu daripada 78.0 peratus kepada 97.3 peratus.

Bagi membantu murid yang tidak mempunyai akses kepada talian internet dan alat peranti digital yang sesuai untuk pembelajaran, KPM

terus memperkasakan siaran pendidikan di DidikTV KPM. Selain itu, siaran TV Pendidikan di TV Okey RTM dan Tutor TV Astro juga diteruskan.

KPM turut menyediakan pelantar pembelajaran *Digital Educational Learning Initiative* Malaysia (DELIMa) yang mengandungi pelbagai sumber pendidikan. Sehingga kini, 3,245 video kurikulum, 324 video pedagogi dan 1,761 video DidikTV telah dimuat naik di pelantar DELIMa. KPM juga telah menaik taraf dan menambah baik pelantar DELIMa (DELIMa 2.0) dengan fitur baharu yang memberi fokus kepada pengalaman pengguna, analitis data, kandungan dan pembelajaran diperibadikan.

Untuk makluman Ahli Yang Berhormat, KPM terus komited untuk memastikan murid terutama dalam kalangan B40 di seluruh negara tidak ketinggalan dan dapat mengikuti pembelajaran secara maya dengan pemberian peranti digital di bawah Inisiatif Tabung Cerdik. Seperti yang diluluskan dalam Belanjawan 2021, Inisiatif Tabung Cerdik adalah satu inisiatif pemberian peranti digital kepada 150,000 orang murid B40 yang dilaksanakan oleh Yayasan Hasanah, sebuah yayasan di bawah Khazanah Nasional. CERDIK merupakan satu inisiatif tanggung jawab sosial korporat (CSR) oleh syarikat berkaitan kerajaan (GLC) dan syarikat pelaburan berkaitan kerajaan (GLIC) bertujuan menyediakan peranti digital dan pelan data kepada murid B40 yang dikenal pasti.

Yayasan Hasanah menguruskan sumbangan peranti digital termasuk pelan data daripada GLC dan GLIC serta menyelaras penghantaran peranti berkenaan ke Pejabat Pendidikan Daerah (PPD). Peranti digital yang diterima oleh KPM akan terus diagihkan kepada murid B40 yang telah dikenal pasti.

KPM yakin kerangka holistik yang dirancang dan dilaksanakan ini membolehkan murid mengikuti PdP secara berkesan, seterusnya dapat menangani keciciran murid dan memastikan mereka kekal dalam sistem pendidikan negara.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' SERI HAJI IDRIS BIN JUSOH (BESUT)**

**TARIKH : 23 SEPTEMBER 2021 (KHAMIS)**

**SOALAN**

**DATO' SERI HAJI IDRIS BIN JUSOH [ BESUT ]** minta **MENTERI PERTANIAN DAN INDUSTRI MAKANAN** menyatakan usaha yang diambil bagi mempertingkatkan tarikan di kawasan-kawasan pelancongan agro khasnya di Parlimen Besut apabila sektor pelancongan dibuka sepenuhnya nanti.

**JAWAPAN**

**Tuan Yang Di pertua,**

Kementerian Pertanian dan Industri Makanan (MAFI) sentiasa komited dalam memajukan sektor agropelancongan di seluruh Malaysia. Bagi mengukuhkan penjenamaan dan pembangunan pelancongan di Terengganu, Kerajaan Negeri Terengganu telah meletakkan Besut sebagai salah satu hub agropelancongan yang akan dibangunkan di bawah Rancangan Struktur Negeri Terengganu 2050 (Kajian Semula). Berdasarkan Rancangan tersebut, pembangunan di kawasan Besut telah dimasukkan sebagai salah satu zon pengkhususan pelancongan Negeri Terengganu memberi fokus kepada hub agropelancongan desa dan marin.

Melalui penglibatan pelbagai Jabatan/Agensi di bawah MAFI, pusat-pusat agropelancongan yang telah dibangunkan di sekitar Terengganu adalah seperti berikut:

- i. Peladang Setiu Agro Resort, Setiu;
- ii. Laguna Setiu, Setiu;
- iii. Nelayan Resort PNK Setiu, Rhu 10;
- iv. Medan Ikan Bakar PNK Setiu, Rhu10;
- v. Pusat Agropelancongan LPNM Sg. Tong, Setiu;
- vi. Taman Pertanian Negeri Sekayu, Kuala Berang;
- vii. Pusat Apiari Sekayu, Kuala Berang ;
- viii. Galeri Spesis-Spesis Marin Terancam, Dungun;
- ix. Pusat konservasi dan Penerangan Penyu, Rantau Abang;
- x. Bukit Besi Agro-Exotic Farm, Dungun; dan
- xi. Ombak Kapas Island Beach Resort Sdn Bhd, Marang.

MAFI juga telah melaksanakan beberapa inisiatif untuk memperhebatkan lagi sektor agropelancongan khususnya dalam menarik kunjungan pelancong di seluruh Malaysia termasuk di Parlimen Besut seperti berikut:

- i. Geran membina dan menaiktaraf infrastruktur serta kualiti perkhidmatan di pusat agropelancongan.

Program ini bertujuan untuk memperkasakan aktiviti ekonomi dan keusahawanan masyarakat tani dengan mempelbagaikan sumber pendapatan mereka serta membuka peluang pekerjaan baru kepada penduduk setempat. Sepanjang Rancangan Malaysia Ke-11 (RMKe-11), Kerajaan menyediakan sebanyak RM20 juta bantuan/geran membina dan menaiktaraf infrastruktur kepada pusat-pusat pelancongan yang diusahakan oleh golongan sasar bagi meningkatkan jumlah kutipan hasil, pendapatan serta jumlah pengunjung ke pusat berkenaan. Bagi tahun 2020, sejumlah RM3,366,090.00 geran telah disalurkan kepada 35 pusat agropelancongan manakala pada tahun 2019 sejumlah RM3,396,200.00 telah disalurkan kepada 56 pusat agropelancongan. Inisiatif ini diteruskan oleh MAFI dalam Rancangan Malaysia Ke-12 (RMKe-12) juga.

**ii. Khidmat nasihat dan bimbingan jabatan dan agensi, MAFI**

MAFI bersama jabatan dan agensi di bawahnya dari semasa ke semasa turut memberikan khidmat nasihat kepada petani dan penternak yang berminat untuk memajukan kawasan pertanian mereka untuk dikembangkan menjadi pusat agropelancongan. Seiring dengan itu juga, satu garis panduan telah disediakan untuk menjelaskan kaedah dan tatacara pelaksanaan geran membina dan menaiktaraf infrastruktur pusat agropelancongan di bawah MAFI. Garis panduan tersebut boleh dicapai di laman sesawang rasmi MAFI.

**iii. Mempergiat aktiviti promosi**

Salah satu usaha MAFI untuk mempergiatkan promosi pada tahun ini adalah dengan memperkasakan elemen pemasaran produk dan perkhidmatan di pusat

## SOALAN NO: 29

agropelancongan secara digital. MAFI melalui Lembaga Kemajuan Pertanian Muda (MADA) sedang menyediakan program perintis pemerikasaan industri agropelancongan melalui transformasi digital kepada pengusaha pusat agropelancongan di bawah setiap Jabatan dan Agensi MAFI. Program ini bertujuan memanfaatkan penggunaan platform digital secara kreatif dan meluas melalui media sosial serta memperluaskan kebolehcapaian kepada produk serta perkhidmatan di pusat agropelancongan seterusnya dijangka mampu menjana pendapatan tambahan kepada golongan sasar.

Dalam Dasar Agromakanan Negara 2.0 (2021-2030), MAFI akan terus memberi perhatian kepada industri agropelancongan negara. MAFI melalui Jabatan dan Agensi menjadi penggerak utama kepada inisiatif pembangunan industri agropelancongan dari segi meningkatkan kualiti kemudahan, mempelbagaikan produk pelancongan, mempergiatkan promosi dan mempertingkatkan aspek keselamatan di pusat agropelancongan.

Sekian, terima kasih.

**PEMBERITAHUAN PERTANYAAN  
DEWAN RAKYAT MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : TUAN LIM LIP ENG [ KEPONG]**

**TARIKH : 23 SEPTEMBER 2021 (KHAMIS)**

**SOALAN**

minta **MENTERI KOMUNIKASI DAN MULTIMEDIA** menyatakan jumlah kes penipuan dalam talian pada tahun 2020 dan 2021, langkah-langkah proaktif Kerajaan bagi menangani kes penipuan tersebut yang meningkat tatkala Perintah Kawalan Pergerakan COVID-19. Apakah boleh status jenayah ini ditukar dari jenayah Komersial kepada jenayah terancang.

**JAWAPAN**

Tuan Yang di-Pertua,

Untuk makluman Ahli Yang Berhormat, kegiatan penipuan ataupun *scam* sama ada secara dalam talian (*online*) ataupun luar talian (*offline*) adalah tertakluk di bawah bidang kuasa pihak Polis Diraja Malaysia (PDRM), Kementerian Perdagangan Dalam Negeri dan Hal Ehwal Pengguna (KPDNHEP), Suruhanjaya Sekuriti (SC), Bank Negara Malaysia (BNM) atau agensi-agensi berkenaan; tertakluk kepada bentuk-bentuk penipuan yang dijalankan.

Bagi tahun 2020 hingga 31 Julai 2021, pihak Suruhanjaya Komunikasi dan Multimedia Malaysia (MCMC) telah menerima **3,398** aduan awam berkaitan aktiviti berunsur penipuan. Kesemua aduan akan dirujuk kepada agensi-agensi penguatkuasaan yang berkaitan untuk perhatian dan tindakan lanjut di bawah bidang kuasa mereka.

Di samping itu, antara langkah proaktif yang diambil oleh MCMC adalah dengan menyekat akses kepada laman palsu yang dikenali sebagai laman *phishing*. Bagi tahun 2020 hingga 31 Julai 2021, sebanyak **960** laman berbentuk *phishing* telah disekat di bawah Akta Komunikasi dan Multimedia 1998 [Akta 558]. Sekatan ini dibuat berdasarkan aduan awam yang diterima serta usahasama pemantauan institusi-institusi perbankan yang terlibat melalui Internet Banking Task Force (IBTF) yang diketuai oleh BNM.

MCMC juga menjalankan audit pengesahan data dengan Jabatan Pendaftaran Negara (JPN) untuk mengesahkan integriti pangkalan data pelanggan talian telefon prabayar bagi memastikan semua nombor yang aktif disahkan dengan sewajarnya dan mengelakkan ianya disalahguna oleh pihak yang tidak bertanggungjawab untuk tujuan penipuan dan seumpamanya. Sehingga Ogos 2021, sebanyak **1,488,092** talian prabayar yang didaftar secara meragukan telah dikesan. Daripada jumlah tersebut, sebanyak 989,071 (66%) talian telah ditamatkan perkhidmatannya, sejumlah 488,847 (33%) telah dikemaskini dengan



maklumat yang sah dan 10,174 (1%) dalam proses penamatan perkhidmatan.

Selain itu, pihak PDRM juga turut membangunkan aplikasi SemakMule selain laman web yang sama untuk memudahkan masyarakat membuat semakan awal terhadap akaun bank dan nombor telefon yang digunakan oleh sindiket penipuan, sebelum melakukan sebarang transaksi. Satu akaun Facebook iaitu *Cyber Crime Alert Royal Malaysia Police* juga telah diwujudkan bagi berkongsi dan memberi amaran kepada orang ramai mengenai ancaman penipuan atau jenayah siber dalam usaha bagi membanteras kes penipuan dalam talian ini.

Bagi persoalan apakah boleh status jenayah ini ditukar dari jenayah komersial kepada jenayah terancang, pihak Kementerian Dalam Negeri (KDN) memaklumkan bahawa jenayah komersil tidak boleh dikategorikan sebagai jenayah terancang kerana tidak menepati peruntukan di bawah Kanun Keseksaan.

Bab 6B Seksyen 130U Kanun Keseksaan mentakrifkan jenayah terancang adalah terdiri dari jenayah secara berkumpulan yang dikenali pasti siapa perlakunya dengan melakukan jenayah yang lebih serius serta menggunakan senjata bagi mendapatkan sesuatu secara langsung atau tidak langsung. Jenayah terancang lebih kepada jenayah kekerasan yang disiasat oleh Jabatan Siasatan Jenayah manakala jenayah dalam talian adalah jenayah penipuan yang disiasat di bawah Seksyen 420 Kanun Keseksaan yang dilakukan oleh individu atau bersindiket (berkumpulan) melalui medium elektronik.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' HAJI MOHD FASIAH BIN HAJI MOHD  
FAKEH [ SABAK BERNAM ]**

**TARIKH : 23 SEPTEMBER 2021 (KHAMIS)**

**SOALAN**

**DATO' HAJI MOHD FASIAH BIN HAJI MOHD FAKEH** minta **MENTERI KANAN PENDIDIKAN** menyatakan setakat manakah keberkesanan, prestasi dan pencapaian pendidikan secara atas talian (*online*) yang dijalankan secara mengikut pendekatan Pengajaran dan Pembelajaran di Rumah (PdPR) di sekolah rendah dan menengah semenjak pelaksanaan Perintah Kawalan Pergerakan (PKP) akibat dari pandemik COVID-19.

**JAWAPAN**

**Tuan Yang di-Pertua,**

Pengajaran dan Pembelajaran (PdP) dalam talian merupakan satu pendekatan Pengajaran dan Pembelajaran di Rumah (PdPR) yang dilaksanakan mengikut kesesuaian. Pihak sekolah dan guru mengatur strategi untuk memastikan PdPR dilaksanakan secara optimum berdasarkan pertimbangan tiga prinsip asas iaitu tiada murid tercicir dalam pembelajaran, keperluan asas pembelajaran dipenuhi dan kesejahteraan murid diutamakan.

Bagi menilai tahap keberkesanan PdP semasa tempoh penutupan sekolah, KPM telah melaksanakan Kajian Keberkesanan Pelaksanaan *Home-based Learning* yang ditadbir secara dalam talian. Kajian ini memfokuskan kepada PdPR semasa Perintah Kawalan Pergerakan (PKP). Skop kajian meliputi aspek pelaksanaan PdPR dalam tempoh Mac hingga Julai tahun 2020 yang merangkumi pendekatan, kaedah, strategi, aplikasi dan peralatan yang digunakan dalam pelaksanaan PdPR. Selain itu, kajian tersebut juga melihat kepada penjadualan PdPR, penyusunan semula Rancangan Pelajaran Tahunan (RPT) dan pentaksiran. Kajian ini melibatkan 13,156 orang pentadbir sekolah, 39,967 orang guru, 52,413 orang murid dan 59,624 orang ibu bapa/penjaga. Dapatan kajian menunjukkan pelibatan murid di bandar dalam PdPR secara dalam talian adalah sebanyak 59.3 peratus berbanding 51.4 peratus bagi murid di luar bandar. Bagi RPT pula, 46.2 peratus guru di bandar mencapai sasaran pelaksanaan berbanding dengan 39.1 peratus guru di luar bandar.

Dapatan kajian ini juga menunjukkan tahap keberkesanan PdPR adalah pada tahap sederhana. Sebanyak 34.1 peratus murid menyatakan hasil pembelajaran di rumah adalah tidak seperti yang diperolehi di sekolah dan merupakan punca pembelajaran kurang berkesan.

Selain itu, 51.2 peratus murid berasa tertekan semasa pembelajaran di rumah. Daripada kumpulan tersebut, 48.9 peratus murid menyatakan sebab tertekan adalah kerana interaksi yang terhad dengan guru, manakala 55.0 peratus murid tertekan disebabkan interaksi terhad

dengan rakan-rakan. Sebanyak 53.4 peratus murid pula tertekan disebabkan kurang bimbingan dalam sesi pembelajaran.

Sebaliknya, terdapat murid menganggap PdPR merupakan suatu pengalaman baharu. Sebanyak 56.6 peratus murid berjaya melibatkan diri secara aktif semasa sesi pembelajaran di rumah dan 49.7 peratus murid berasa seronok semasa mengikuti PdPR. Sebanyak 57.5 peratus murid berjaya menyiapkan tugas atau latihan yang diberikan oleh guru dalam masa yang ditetapkan. Dapatan kajian juga menunjukkan sebanyak 36.0 peratus murid boleh belajar sendiri menggunakan bahan pembelajaran di rumah dalam tempoh PKP.

Selain daripada pelaksanaan kajian tersebut, pada suku tahun pertama 2021, KPM telah menjalankan Tinjauan Pelaksanaan PdPR yang melibatkan 500 buah sekolah melalui pemerhatian terhadap PdPR yang dilaksanakan dalam talian atau gabungan dalam dan luar talian. Pemerhatian dilaksanakan melalui kehadiran Nazir Sekolah dalam kelas PdPR secara dalam talian. Pemerhatian ini dimaklumkan lebih awal kepada guru yang terlibat.

Sebanyak 1,053 pemerhatian dilaksanakan ke atas PdP guru. Tinjauan mendapati 98.7 peratus guru dapat mengelola isi pelajaran yang diajar mengikut peruntukan masa yang ditetapkan. Sebanyak 97.4 peratus guru berjaya membimbing murid untuk memahami dan menguasai isi, konsep dan fakta berkaitan pelajaran. Sementara itu, 96.7 peratus guru berjaya menarik perhatian murid untuk memberi respons terhadap pembelajaran dan memastikan keterlibatan murid semasa PdPR secara *real-time*.

Hasil tinjauan juga mendapati murid memberi respons positif terhadap tugas yang diberikan oleh guru dalam 97.5 peratus PdPR yang diperhatikan. Murid juga dapat melengkap dan menghantar tugas dengan pelbagai cara antaranya, melalui rakaman video, slaid pembentangan dan *voice call*.

Rumusan daripada tinjauan ini menunjukkan bahawa guru berupaya merangsang murid berfikir dan berkomunikasi dalam PdPR.

Guru juga dapat melaksanakan aktiviti pembelajaran yang menyeronokkan dan menarik minat murid untuk belajar.

Untuk makluman Ahli Yang Berhormat, dalam memastikan semua murid mengikuti PdPR, KPM telah membangunkan Sistem Pelaporan Pengajaran dan Pembelajaran di Rumah (SPdPR). Sistem ini membolehkan penyertaan murid dipantau secara *real-time*. Hal ini membolehkan pihak sekolah melaksanakan intervensi yang bersesuaian bagi memastikan keterlibatan murid adalah secara optimum.

Data pelaporan bermula 20 Januari hingga 30 Ogos 2021 menunjukkan peratus murid yang mengikuti PdPR meningkat. Pelibatan murid sekolah rendah meningkat sebanyak 12.1 peratus iaitu daripada 87.1 peratus kepada 99.2 peratus. Pelibatan murid sekolah menengah pula meningkat sebanyak 19.3 peratus iaitu daripada 78.0 peratus kepada 97.3 peratus.

Secara kesimpulannya, dapatan kajian menunjukkan pelaksanaan PdPR berhadapan dengan pelbagai cabaran dan kekangan pada peringkat awal. Namun, intervensi yang dilaksanakan oleh KPM telah membantu murid mengikuti PdPR dengan lebih baik. KPM sentiasa komited untuk memastikan murid dapat meneruskan pembelajaran dalam keadaan yang selamat dan mendapat akses kepada pembelajaran yang berkualiti pada setiap masa.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT  
PARLIMEN KE-EMPAT BELAS**

**PERTANYAAN : JAWAB LISAN**

**DARIPADA : YB TUAN CHAN FOONG HIN  
(KOTA KINABALU)**

**TARIKH : 23 SEPTEMBER 2021 (KHAMIS)**

**SOALAN**

**TUAN CHAN FOONG HIN [ KOTA KINABALU ]** minta **MENTERI PENGANGKUTAN** menyatakan sama ada Kerajaan bersetuju dengan cadangan Gabungan Persatuan-Persatuan Pengguna Malaysia (FOMCA) yang mencadangkan moratorium pembaharuan lesen kenderaan motor (LKM) dan lesen memandu Malaysia (LLM) dilanjutkan sekurang-kurangnya hingga akhir tahun ini? Apakah alasan Kerajaan bagi menafikan ataupun bersetuju dengan cadangan tersebut.

**JAWAPAN**

**Tuan Yang di-Pertua,**

Kementerian Pengangkutan Malaysia (MOT) amat peka dengan maklum balas dan kesukaran orang ramai baru-baru ini dalam menggunakan perkhidmatan agensi-agensi di bawahnya seperti Jabatan Pengangkutan Jalan (JPJ) ketika negara dilanda pandemik COVID-19.

Sehubungan itu, Kementerian ini telah memutuskan untuk memberi pelanjutan terhadap tempoh pembaharuan Lesen Kenderaan Motor (LKM) dan Lesen Memandu Malaysia (LMM) sehingga 31 Disember 2021. Selaras dengan keputusan ini, mana-mana pemilik LKM dan LMM yang telah tamat tempoh sah tidak akan dikenakan tindakan penguatkuasaan dan pematuhan oleh pihak JPJ serta Polis Diraja Malaysia (PDRM) sehingga 31 Disember 2021.

Pemilik LKM yang telah tamat tempoh sah perlu memastikan kenderaan masing-masing dilindungi insurans yang sah. Sijil Perlindungan Insurans (*e-cover note*) yang sah perlu dipaparkan dan ditunjukkan bagi tujuan pemeriksaan.

Orang ramai digalakkan menggunakan perkhidmatan dalam talian menerusi portal mySIKAP JPJ atau melalui portal dalam talian rakan-rakan strategik JPJ yang lain seperti Pos Malaysia Berhad, MyEG dan PUSPAKOM, untuk membuat apa-apa transaksi JPJ yang berkaitan. Ini bertujuan mengelakkan kesesakan di kaunter JPJ serta memberi kemudahan dan kesenangan kepada orang ramai dalam membuat transaksi pembaharuan LKM dan LMM.

Kementerian Pengangkutan ingin mengingatkan orang ramai supaya sentiasa mematuhi prosedur operasi standard (SOP) yang ditetapkan ketika berurusan di mana-mana kaunter JPJ termasuk memakai pelitup separuh muka, menggunakan cecair pembasmi kuman atau '*hand sanitizer*', mengamalkan penjarakan fizikal dan mendaftar masuk atau '*check-in*' menggunakan aplikasi MySejahtera.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN SHAHARIZUKIRNAIN BIN ABD. KADIR  
[ SETIU ]**

**TARIKH : 23 SEPTEMBER 2021 (KHAMIS)**

**SOALAN**

**TUAN SHAHARIZUKIRNAIN BIN ABD. KADIR** minta **MENTERI KANAN PENDIDIKAN** menyatakan rangka pelan strategik yang berkesan dalam pelaksanaan Program Minda Sihat (PMS) bagi membendung isu kesihatan mental dalam kalangan murid sekolah yang semakin kritikal.



**JAWAPAN**

**Tuan Yang di-Pertua,**

Kementerian Pendidikan Malaysia (KPM) menyedari pandemik COVID-19 telah memberi kesan kepada keseluruhan ekosistem pendidikan. KPM sentiasa prihatin dan peka terhadap kebajikan serta kesejahteraan murid dalam tempoh pelaksanaan Pengajaran dan Pembelajaran di Rumah (PdPR).

Dalam hal ini, KPM melaksanakan Program Minda Sihat Dalam Kebiasaan Baharu Tahun 2021. Program ini selari dengan Pelan Strategik Kebangsaan Kesihatan Mental Tahun 2020 - 2025 Kementerian Kesihatan Malaysia (KKM).

Berdasarkan Pelan Strategik ini, KPM menyediakan panduan pelaksanaan Program Minda Sihat Dalam Kebiasaan Baharu Tahun 2021 sebagai rujukan kepada sekolah dalam melaksanakan program tersebut dengan terancang, sistematik dan bersesuaian dengan situasi semasa norma baharu.

Dua strategi utama program ini ialah meningkatkan kesedaran kepentingan kesejahteraan mental serta melaksanakan saringan dan intervensi minda sihat.

Strategi-strategi ini bertujuan meningkatkan kesedaran kepentingan penjagaan kesejahteraan diri, mengenal pasti gejala awal yang memberi kesan kepada minda akibat krisis yang berlaku, meningkatkan kemahiran gaya daya tindak murid dalam mengendalikan masalah emosi dan tingkah laku serta merujuk murid kepada klinik atau hospital dengan prosedur yang telah ditetapkan.

Melalui saringan minda sihat, Guru Bimbingan dan Kaunseling menyediakan profil murid yang dikenal pasti. Murid yang menunjukkan tanda amaran awal gangguan emosi atau 'red flag' seperti dipaparkan dalam Sistem Perkhidmatan Kaunseling Murid (SePKM) diberi bantuan segera oleh Guru Bimbingan dan Kaunseling.

Bagi murid yang menunjukkan tanda kecelaruan emosi seperti kemurungan dan kebimbangan yang teruk, pihak sekolah akan berbincang bersama-sama ibu bapa/penjaga untuk merujuk murid berkenaan kepada pakar perubatan di klinik kesihatan atau hospital berdekatan.

Selain itu, Program Pembimbing Rakan Sebaya (PRS) juga digunakan sebagai satu pendekatan dalam membantu meningkatkan kesejahteraan psikososial dan emosi murid. PRS ialah murid yang dilatih kemahiran asas komunikasi dan kaunseling serta berfungsi sebagai rakan sebaya yang bersedia membantu mereka yang memerlukan pertolongan. Antara aktiviti yang dilaksanakan oleh PRS ialah bertanya khabar rakan, menyampaikan maklumat berkaitan serta membantu Guru Bimbingan dan Kaunseling menghulurkan bantuan kepada rakan yang terkesan akibat pandemik COVID-19. Usaha ini adalah seiring dengan falsafah PRS iaitu “Bantu Diri Untuk Bantu Orang Lain”.

KPM yakin Program Minda Sihat Dalam Kebiasaan Baharu ini dapat menyokong setiap murid dalam mengurus emosi dengan baik seterusnya dapat meningkatkan kesejahteraan minda dalam kalangan murid.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : PUAN TEO NIE CHING [ KULAI ]**

**TARIKH : 23 SEPTEMBER 2021 (KHAMIS)**

**SOALAN**

**PUAN TEO NIE CHING** minta **MENTERI KANAN PENDIDIKAN** menyatakan peruntukan yang telah disalurkan kepada SJKC Poay Chai, Johor, SJKC Kuek Ho Yao, Johor, SJKC Too Joon Hing, Selangor; dan SJKC Kuang Yu, Penang untuk dana pembinaan sejak tahun 2020 dan senarai sekolah yang telah menerima dana pembinaan dari KPM sejak tahun 2020.

**JAWAPAN**

Tuan Yang di-Pertua,

Kementerian Pendidikan Malaysia (KPM) pada dasarnya tidak menyediakan sebarang peruntukan bagi tujuan pembinaan mana-mana sekolah yang berstatus sekolah bantuan kerajaan (SBK). Sehubungan dengan itu, bagi sekolah yang berstatus SBK, urusan untuk menyediakan dana pembinaan adalah di bawah tanggungjawab pihak Lembaga Pengelola Sekolah (LPS) sepenuhnya.

Untuk makluman Ahli Yang Berhormat, ingin dijelaskan bahawa pembinaan sesebuah sekolah kerajaan baharu adalah berdasarkan kepada faktor keperluan, kesediaan tapak atau tanah, kesesuaian lokasi, jarak dengan sekolah berdekatan dan kepadatan sekolah sedia ada. Jika syarat-syarat tersebut telah dipenuhi, permohonan pembinaan bagi sekolah kerajaan baharu tersebut akan disenaraikan dalam *Rolling Plan* di bawah Rancangan Malaysia Lima Tahun (RMLT) tertakluk kepada pertimbangan agensi pusat dan kemampuan kewangan semasa kerajaan.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN BARU BIAN [ SELANGAU ]**

**TARIKH : 23 SEPTEMBER 2021 (RABU)**

**SOALAN**

Minta **MENTERI PENGAJIAN TINGGI** menyatakan Parlimen Selangau adalah satu-satunya kawasan Parlimen yang belum mempunyai Kolej Komuniti di Sarawak. Adakah Kementerian merancang untuk membina sebuah Kolej Komuniti di kawasan tersebut.

**JAWAPAN**

Tuan Yang di-Pertua,

Pewujudan sesebuah Institusi Pendidikan Tinggi (IPT) amat penting bagi melahirkan modal insan yang seimbang serta menjadi pemangkin kepada pembangunan ekonomi setempat. Dalam hal ini, sebelum sesebuah IPT seperti Politeknik atau Kolej Komuniti dibangunkan, pelbagai aspek seperti pertumbuhan ekonomi, strategi pembangunan negara dan wilayah, keperluan guna tenaga dan kedudukan semasa kewangan kerajaan perlu dipertimbangkan.

Dalam konteks Wilayah Sarawak, pada masa ini terdapat tiga (3) buah Politeknik, iaitu Politeknik Mukah; Politeknik Kuching; dan Politeknik METRO Betong, serta tujuh (7) buah Kolej Komuniti, iaitu Kolej Komuniti Kuching; Kolej Komuniti Mas Gading; Kolej Komuniti Miri; Kolej Komuniti

Sarikei; Kolej Komuniti Santubong; Kolej Komuniti Betong; Kolej Komuniti Cawangan Sibu, sedang beroperasi.

Kesemua institusi ini menawarkan pelbagai bidang pengajian Latihan Teknikal dan Vokasional (TVET) di peringkat sijil dan diploma merangkumi program-program akademik yang berdaya saing, iaitu bidang Fesyen dan Pakaian; Teknologi Maklumat; Sistem Komputer dan Rangkaian; Kulinari; Pengembaraan Pelancongan; Teknologi Elektrik; Penyenggaraan Industri; Teknologi Seni Bina; Kejuruteraan Awam; Kejuruteraan Mekanikal; Kejuruteraan Elektrik; Ukur Bahan; Akauntasi; Pengajian Perniagaan; serta Landskap dan Reka Bentuk Dalaman.

Jemaah Menteri dalam mesyuaratnya pada 8 September 2004 bersetuju bahawa pembangunan kolej-kolej komuniti hendaklah berdasarkan keperluan di sesebuah kawasan dan bukannya berdasarkan di setiap daerah atau Parlimen, memandangkan terdapat kawasan yang mempunyai kepadatan rendah. Berdasarkan MyCensus2020, kepadatan penduduk Parlimen Selangau dikategorikan masih rendah, iaitu 7 orang bagi setiap 1 kilometer persegi berbanding purata kepadatan penduduk Sarawak, iaitu seramai 225 orang bagi setiap 1 kilometer persegi.

KPT mengambil maklum dan memberi perhatian terhadap cadangan pembinaan kolej komuniti di Parlimen Selangau seperti yang dicadangkan oleh YB Selangau. Walau bagaimanapun, analisis lanjut tentang keperluan pembinaan kolej komuniti ini termasuk keupayaan kewangan kerajaan serta pertimbangan terhadap aspek-aspek lain seperti yang saya nyatakan tadi akan dibuat terlebih dahulu oleh KPT. Tidak terhad kepada perkara ini, pihak KPT akan dari semasa ke semasa mengambil langkah untuk memperluas akses Pendidikan serta Latihan Teknikal dan Vokasional (TVET) yang secara tidak langsung menyumbang kepada kemajuan sosioekonomi masyarakat di Parlimen Selangau.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' DR. XAVIER JAYAKUMAR  
A/L ARULANANDAM [KUALA LANGAT]**

**TARIKH : 23 SEPTEMBER 2021 (KHAMIS)**

**SOALAN**

**DATO' DR. XAVIER JAYAKUMAR A/L ARULANANDAM [ KUALA LANGAT ]** minta **MENTERI KEWANGAN** menyatakan status terkini serta kos keseluruhan LRT3. Bila projek dijangka siap dan anggaran pelangan yang akan menggunakan perkhidmatan ini.

**JAWAPAN**

Tuan Yang di-Pertua,

1. Projek LRT3 ataupun LRT Laluan Shah Alam adalah merupakan laluan ketiga dalam sistem LRT Lembah Klang. Laluan sepanjang 37.8 km ini akan menghubungkan Bandar Utama di Damansara ke Johan Setia di Klang. Sebanyak 20 stesen akan dibina manakala 5 buah stesen *provisional* telah dirancang dalam projek ini untuk dibina pada masa akan datang. Projek yang bermula pada November 2015 ini telah dikaji semula dan diteruskan dengan kos keseluruhan dijimatkan kepada RM16.63 bilion berbanding RM31.65 bilion sebelum ini. Projek LRT3 ini dijangka akan siap sepenuhnya menjelang Februari 2024.

2. Sehingga 31 Julai 2021, kemajuan keseluruhan projek adalah sebanyak 58.59%. Dianggarkan purata 67,000 orang sehari akan menggunakan LRT3 pada tahun 2024 dan dijangka terus meningkat kepada 126,000 orang sehari menjelang tahun 2030.

Tuan Yang di-Pertua,

3. Seperti yang kita semua sedia maklum, penularan wabak COVID-19 yang melanda dunia pada ketika ini telah memberi kesan kepada semua sektor dan industri termasuklah sektor pembinaan infra. Hal ini sedikit sebanyak telah menjejaskan kemajuan projek-projek rel ini. Namun begitu, pelaksanaan Projek LRT3 akan terus dipantau bagi memastikan ianya dapat disiapkan mengikut perancangan dan mematuhi piawaian-piawaian yang telah ditetapkan serta selamat digunakan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN AHMAD TARMIZI BIN SULAIMAN  
[SIK]**

**TARIKH : 23 SEPTEMBER 2021 (KHAMIS)**

**SOALAN**

Minta **MENTERI PENGAJIAN TINGGI** menyatakan adakah Kementerian bercadang untuk menyemak tempoh pemberian biasiswa pasca siswazah yang berdasarkan minimum tempoh pengajian setiap bidang dan bukan hanya 3 tahun seperti yang dilaksanakan ketika ini.



**JAWAPAN**

Tuan Yang di-Pertua,

Konsep penajaan pengajian berdasarkan tempoh pengajian minimum bukanlah cadangan baharu tetapi telah sedia dilaksanakan oleh Kementerian Pengajian Tinggi (KPT). Penetapan tempoh penajaan ini adalah berdasarkan kepada tempoh pengajian minimum sesuatu program pengajian di universiti seperti yang ditetapkan oleh Agensi Kelayakan Malaysia (MQA). Pendekatan ini juga turut diguna pakai oleh penaja pendidikan tinggi lain seperti Jabatan Perkhidmatan Awam (JPA) dan Majlis Amanah Rakyat (MARA).

Umumnya, bagi pengajian peringkat Sarjana, tempoh pengajian adalah antara 18 hingga 24 bulan. Manakala bagi pengajian di peringkat PhD pula, tempoh penajaan lazimnya ditetapkan selama tiga (3) tahun atau 36 bulan. Walau bagaimanapun, terdapat situasi tertentu yang membolehkan pelajar diberikan tempoh penajaan melebihi tiga (3) tahun. Contohnya pengajian Sarjana Kedoktoran/Sarjana Kepakaran yang mana tempoh minimum pengajian adalah empat (4) tahun atau 48 bulan. Tempoh penajaan selama empat (4) tahun turut diberikan kepada pengajian di peringkat PhD yang mana struktur programnya memerlukan pelajar lulus *comprehensive exam* (CE) terlebih dahulu sebelum memulakan penyelidikan seperti yang lazimnya dilaksanakan oleh universiti-universiti di Amerika Syarikat.

Sekian, terima kasih

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN MUHAMMAD BAKHTIAR BIN WAN  
CHIK [ BALIK PULAU ]**

**TARIKH : 23 SEPTEMBER 2021 (KHAMIS)**

**SOALAN**

**TUAN MUHAMMAD BAKHTIAR BIN WAN CHIK** minta **MENTERI KANAN PENDIDIKAN** menyatakan tindakan Kementerian berkenaan lambakan sekurang-kurangnya 1.5 juta pelajar tercicir sepanjang tempoh COVID-19 berikutan kegagalan akses pada pembelajaran digital.

**JAWAPAN**

**Tuan Yang di-Pertua,**

Kementerian Pendidikan Malaysia (KPM) mendefinisikan keciciran daripada sistem pendidikan sebagai situasi dimana murid warganegara Malaysia yang berada dalam sistem pendidikan (bersekolah) tetapi keluar daripada sistem sebelum tamat/menghabiskan tempoh pendidikan.

Kadar murid cicir di Malaysia pada peringkat sekolah rendah menurun daripada 0.15 peratus pada tahun 2018 kepada 0.12 peratus pada tahun 2019. Manakala kadar murid cicir peringkat sekolah menengah menurun daripada 1.21 peratus pada tahun 2018 kepada 1.14 peratus pada tahun 2019. Data murid cicir tahun 2020 menunjukkan bahawa kadar murid cicir pada peringkat sekolah rendah adalah 0.10 peratus. Manakala kadar murid cicir pada peringkat sekolah menengah adalah 1.13 peratus. Data keciciran bagi tahun 2021 akan dikeluarkan sebelum akhir tahun ini.

Untuk makluman Ahli Yang Berhormat, KPM menyedari bahawa pandemik COVID-19 memberi kesan kepada pembelajaran murid terutamanya apabila mereka tidak dapat hadir ke sekolah secara bersemuka. Oleh yang demikian, selain daripada keciciran daripada sistem pendidikan, KPM turut melihat keciciran dalam konteks penguasaan pembelajaran.

Bagi memastikan tiada murid yang tercicir dalam pembelajaran semasa penutupan sesi persekolahan bersemuka, KPM telah membangunkan satu kerangka holistik dalam memastikan PdP dapat terus dilaksanakan dengan berkesan. Di samping itu, KPM akan terus menambah baik pelaksanaan PdPR bagi memastikan keberkesanannya dapat ditingkatkan dari semasa ke semasa.

Bagi memantau penyertaan murid dalam PdPR, KPM telah membangunkan Sistem Pelaporan Pengajaran dan Pembelajaran di Rumah (SPdPR). Sistem ini membolehkan penyertaan murid dipantau secara *real-time*. Hal ini membolehkan pihak sekolah melaksanakan

intervensi yang bersesuaian bagi memastikan keterlibatan murid adalah secara optimum.

Data pelaporan bermula 20 Januari hingga 30 Ogos 2021 menunjukkan peratus murid yang mengikuti PdPR meningkat. Pelibatan murid sekolah rendah meningkat sebanyak 12.1 peratus iaitu daripada 87.1 peratus kepada 99.2 peratus. Pelibatan murid sekolah menengah pula meningkat sebanyak 19.3 peratus iaitu daripada 78.0 peratus kepada 97.3 peratus.

Selain daripada itu, sewaktu sesi persekolahan dibuka semula sebelum ini, guru telah membuat pengesanan terhadap tahap penguasaan kemahiran murid. Ini membolehkan guru merancang dan melaksanakan intervensi yang bersesuaian.

KPM juga telah melaksanakan penjajaran kandungan kurikulum mata pelajaran. Penjajaran kurikulum mata pelajaran difokuskan kepada Kandungan Asas (KA) supaya murid dapat disediakan untuk pembelajaran peringkat seterusnya. Kandungan Tambahan (KT) dan Kandungan Pelengkap (KP) pula boleh dilaksanakan mengikut keupayaan murid.

Bagi memperkasakan pelaksanaan kurikulum, KPM juga menambah baik sokongan pembelajaran dengan memperkenalkan Program Pemerksaan Pelaksanaan Kurikulum (KPMPerkasaKU). Program KPMPerkasaKU dirangka dengan tujuan memastikan pembelajaran pemulihan bagi murid yang belum menguasai literasi dan numerasi. Di samping itu juga, program ini menyediakan pelbagai sokongan bagi mengukuh dan memperkayakan penguasaan kandungan mata pelajaran. Program ini melibatkan murid sekolah rendah dan sekolah menengah.

Selain itu, KPM juga telah memperkenalkan semula siaran TV Pendidikan. Murid boleh mengikuti pelbagai rancangan TV Pendidikan melalui saluran DidikTV KPM, TV Okey RTM dan Tutor TV Astro. Kandungan yang disediakan adalah berdasarkan kepada kurikulum peringkat prasekolah hingga ke tingkatan enam. Di samping itu,

kandungan rancangan TV Pendidikan turut memuatkan slot yang berkaitan kokurikulum.

KPM turut menambah lebih banyak bahan PdP melalui *Digital Educational Learning Initiative* Malaysia (DELIMa). Pelantar ini merupakan pusat rujukan sehenti yang mengandungi pelbagai aplikasi, perkhidmatan dan sumber pendidikan digital. Sehingga kini, 3,245 video kurikulum, 324 video pedagogi dan 1,761 video DidikTV telah dimuat naik di pelantar DELIMa.

Untuk makluman Ahli Yang Berhormat, KPM menyedari bahawa sesi persekolahan secara bersemuka untuk tahun 2020 dan tahun 2021 tidak dapat dilaksanakan sepertimana kebiasaan. Justeru, KPM telah membuat ketetapan untuk melanjutkan sesi persekolahan tahun 2021 sehingga bulan Februari 2022. Pelanjutan sesi ini membolehkan pihak sekolah merancang dan melaksanakan aktiviti pemulihan, pengukuhan dan pengayaan secara intensif bagi meningkatkan kesediaan murid untuk mengikuti tahun persekolahan berikutnya.

KPM yakin kerangka holistik yang dirancang dan dilaksanakan ini membolehkan murid mengikuti PdP secara berkesan, seterusnya dapat menangani keciciran murid dan memastikan mereka kekal dalam sistem pendidikan negara.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN NIK MOHAMAD ABDUH BIN NIK  
ABDUL AZIZ [ BACHOK ]**

**TARIKH : 23 SEPTEMBER 2021 (KHAMIS)**

**SOALAN**

**TUAN NIK MOHAMAD ABDUH BIN NIK ABDUL AZIZ** minta **MENTERI KANAN PENDIDIKAN** menyatakan perancangan Kementerian untuk menyediakan pelan pemulihan pendidikan negara secara komprehensif berdepan dengan impak pandemik COVID-19.

**JAWAPAN**

**Tuan Yang di-Pertua,**

Kementerian Pendidikan Malaysia (KPM) telah merangka satu pelan komprehensif pembukaan semula sekolah telah disediakan bagi memastikan murid dapat kembali belajar secara bersemuka di sekolah dalam keadaan selamat. Dalam merangka pelan ini, KPM telah mengadakan sesi libat urus yang menyeluruh bagi mendapatkan input, pandangan serta cadangan daripada semua pihak berkepentingan.

Pada masa yang sama, KPM telah membuat analisis terperinci mengenai amalan terbaik pembukaan semula sekolah di negara-negara lain bagi meneliti pendekatan yang berkesan untuk memastikan pengoperasian sekolah secara bersemuka dapat dilaksanakan dalam keadaan yang selamat.

Semua input serta dapatan analisis daripada sesi libat urus tersebut telah dipertimbangkan oleh KPM dalam menyediakan pelan komprehensif pembukaan semula sekolah. Pelan ini kemudiannya diperincikan bersama-sama KKM dan MKN serta diselarikan dengan PPN.

Untuk makluman Ahli Yang Berhormat, pembukaan sekolah akan dibuat secara berperingkat mengikut fasa PPN. Bagi negeri Fasa 1 PPN, semua murid masih meneruskan PdPR. Hanya tadika swasta dibenarkan beroperasi bagi anak-anak yang ibu bapa atau penjaga mereka bekerja.

Bagi negeri Fasa 2 PPN, PdP secara bersemuka dibenarkan untuk murid kelas peperiksaan awam dan antarabangsa yang akan menduduki peperiksaan dalam tempoh terdekat. Murid Berkeperluan Khas di Sekolah Pendidikan Khas dan Program Pendidikan Khas Integrasi (PPKI) juga boleh hadir secara bersemuka. Tadika swasta dibenarkan untuk terus beroperasi bagi anak-anak yang ibu bapa atau penjaga mereka bekerja. Murid lain akan mengikuti PdPR.

Bagi negeri di Fasa 3 PPN, murid yang akan hadir ke sekolah adalah sama seperti kumpulan murid di Fasa 2. Selain itu, murid kelas

peperiksaan awam dan peperiksaan antarabangsa yang lain akan hadir. Prasekolah juga akan mula beroperasi. Murid lain akan mengikuti PdPR.

Bagi negeri di Fasa 4 PPN, murid yang akan hadir ke sekolah adalah sama seperti kumpulan murid di Fasa 3. Kemasukan murid lain akan dilaksanakan secara berperingkat.

Berdasarkan Pelan Komprehensif Pembukaan Semula Sekolah, KPM telah menetapkan supaya kapasiti murid di sekolah dihadkan pada kadar 50 peratus enrolmen keseluruhan. Bagi tujuan tersebut, kaedah yang digunakan adalah dengan mengehadkan kapasiti murid di dalam kelas kepada 50 peratus daripada jumlah murid dalam kelas tersebut.

Justeru, sistem penggiliran murid hadir ke sekolah mengikut minggu akan dilaksanakan. Kaedah ini diguna pakai untuk semua kelas kecuali bagi kumpulan murid tertentu seperti yang disenaraikan di portal KPM. Kaedah penggiliran ini membolehkan penjarakan fizikal dalam kelas yang lebih baik dan memudahkan pemantauan guru ke atas murid. Ini juga bagi mengurangkan kesesakan sewaktu pergerakan masuk dan penyuraian di sekolah.

Bagi memastikan kelancaran pengoperasian sekolah, KPM telah menyediakan Garis Panduan Pengurusan dan Pengoperasian Sekolah 3.0 sebagai rujukan kepada jabatan pendidikan negeri (JPN), pejabat pendidikan daerah (PPD) dan pentadbir serta guru. Garis panduan ini turut menekankan aspek pengudaraan yang baik di dalam kelas dan mewajibkan pemakaian pelitup muka kepada semua warga sekolah. Untuk memastikan keselamatan di sekolah, murid yang bergejala tidak dibenarkan hadir ke sekolah bagi mengelakkan risiko jangkitan dalam kawasan sekolah.

Kerangka pelan pembukaan sekolah ini adalah satu perancangan komprehensif KPM bagi memastikan pengoperasian sekolah secara bersemuka berjalan dengan teratur dan selamat.



**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : PUAN TEO NIE CHING [ KULAI ]**

**TARIKH : 23 SEPTEMBER 2021**

**SOALAN**

**PUAN TEO NIE CHING** minta **MENTERI KANAN PENDIDIKAN** menyatakan keputusan terkini selepas mengkaji semula kelulusan Pembukaan Institusi Baharu (PIB) bagi SMJK Heng Ee 2, Pulau Pinang yang telah diluluskan oleh Jemaah Menteri Kerajaan Pakatan Harapan (PH).

**JAWAPAN**

**Tuan Yang Di-Pertua,**

Kementerian Pendidikan Malaysia (KPM) mengambil maklum bahawa Mesyuarat Jemaah Menteri pada 22 Januari 2020 telah meluluskan permohonan pembukaan institusi baharu (PIB) bagi premis SMK Heng Ee, Bayan Baru, Pulau Pinang dengan pentadbiran tersendiri. Walau bagaimanapun, keputusan tersebut hanya dibuat di bawah agenda hal-hal lain di mana tiada memorandum yang memperincikan perkara ini dibentangkan kepada Jemaah Menteri.

Setelah mengkaji perkara ini berpandukan perundangan dan dasar sedia ada serta mengambil kira implikasi terhadap KPM susulan kelulusan tersebut, KPM mendapati bahawa ianya memerlukan penelitian yang lebih mendalam dan menyeluruh sebelum sebarang cadangan dikemukakan untuk pertimbangan Jemaah Menteri.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN MUHAMMAD BAKHTIAR BIN WAN  
CHIK [ BALIK PULAU ]**

**TARIKH : 23 SEPTEMBER 2021 (KHAMIS)**

**SOALAN**

**TUAN MUHAMMAD BAKHTIAR BIN WAN CHIK** minta **MENTERI  
KANAN PENDIDIKAN** menyatakan:-

- (a) apakah pelan strategik yang jelas dan kukuh berkenaan pembukaan sesi persekolahan pada 3 Oktober 2021 ini; dan
- (b) setakat ini, berapa ramai kakitangan yang terlibat di insititusi pendidikan termasuk guru dan pekerja am yang masih belum mendapatkan suntikan vaksin.

**JAWAPAN**

**Tuan Yang di-Pertua,**

Kementerian Pendidikan Malaysia (KPM) telah merangka satu pelan komprehensif pembukaan semula sekolah telah disediakan bagi memastikan murid dapat kembali belajar secara bersemuka di sekolah dalam keadaan selamat. Dalam merangka pelan ini, KPM telah mengadakan sesi libat urus yang menyeluruh bagi mendapatkan input, pandangan serta cadangan daripada semua pihak berkepentingan.

Pada masa yang sama, KPM telah membuat analisis terperinci mengenai amalan terbaik pembukaan semula sekolah di negara-negara lain bagi meneliti pendekatan yang berkesan untuk memastikan

pengoperasian sekolah secara bersemuka dapat dilaksanakan dalam keadaan yang selamat.

Semua input serta dapatan analisis daripada sesi libat urus tersebut telah dipertimbangkan oleh KPM dalam menyediakan pelan komprehensif pembukaan semula sekolah. Pelan ini kemudiannya diperincikan bersama-sama KKM dan MKN serta diselarikan dengan PPN.

Untuk makluman Ahli Yang Berhormat, pembukaan sekolah akan dibuat secara berperingkat mengikut fasa PPN. Bagi negeri Fasa 1 PPN, semua murid masih meneruskan PdPR. Hanya tadika swasta dibenarkan beroperasi bagi anak-anak yang ibu bapa atau penjaga mereka bekerja.

Bagi negeri Fasa 2 PPN, PdP secara bersemuka dibenarkan untuk murid kelas peperiksaan awam dan antarabangsa yang akan menduduki peperiksaan dalam tempoh terdekat. Murid Berkeperluan Khas di Sekolah Pendidikan Khas dan Program Pendidikan Khas Integrasi (PPKI) juga boleh hadir secara bersemuka. Tadika swasta dibenarkan untuk terus beroperasi bagi anak-anak yang ibu bapa atau penjaga mereka bekerja. Murid lain akan mengikuti PdPR.

Bagi negeri di Fasa 3 PPN, murid yang akan hadir ke sekolah adalah sama seperti kumpulan murid di Fasa 2. Selain itu, murid kelas peperiksaan awam dan peperiksaan antarabangsa yang lain akan hadir. Prasekolah juga akan mula beroperasi. Murid lain akan mengikuti PdPR.

Bagi negeri di Fasa 4 PPN, murid yang akan hadir ke sekolah adalah sama seperti kumpulan murid di Fasa 3. Kemasukan murid lain akan dilaksanakan secara berperingkat.

Berdasarkan pelan komprehensif pembukaan semula sekolah, KPM telah menetapkan supaya kapasiti murid di sekolah dihadkan pada kadar 50 peratus enrolmen keseluruhan. Bagi tujuan tersebut, kaedah yang digunakan adalah dengan mengehadkan kapasiti murid di dalam kelas kepada 50 peratus daripada jumlah murid dalam kelas tersebut.

Justeru, sistem penggiliran murid hadir ke sekolah mengikut minggu akan dilaksanakan. Kaedah ini diguna pakai untuk semua kelas kecuali bagi kumpulan murid tertentu seperti yang disenaraikan di portal KPM. Kaedah penggiliran ini membolehkan penjarakan fizikal dalam kelas yang lebih baik dan memudahkan pemantauan guru ke atas murid. Ini juga bagi mengurangkan kesesakan sewaktu pergerakan masuk dan penyuraian di sekolah.

Bagi memastikan kelancaran pengoperasian sekolah, KPM telah menyediakan Garis Panduan Pengurusan dan Pengoperasian Sekolah 3.0 sebagai rujukan kepada jabatan pendidikan negeri (JPN), pejabat pendidikan daerah (PPD) dan pentadbir serta guru. Garis panduan ini turut menekankan aspek pengudaraan yang baik di dalam kelas dan mewajibkan pemakaian pelitup muka kepada semua warga sekolah. Untuk memastikan keselamatan di sekolah, murid yang bergejala tidak dibenarkan hadir ke sekolah bagi mengelakkan risiko jangkitan dalam kawasan sekolah.

Untuk makluman Ahli yang Berhormat, KPM memantau rapi kadar vaksinasi warga sekolah yang layak divaksin. Sehingga 20 September 2021, 90.5 peratus guru, 85.8 peratus AKP, dan 79.2 peratus pekerja perkhidmatan sokongan telah lengkap divaksin. Pada masa ini, 7.2 peratus guru, 11.4 peratus AKP dan 15.1 peratus pekerja perkhidmatan sokongan sedang menunggu suntikan dos kedua. KPM sentiasa bekerjasama rapat dengan Pasukan Petugas Khas Imunisasi COVID-19 (CITF) bagi memastikan kadar vaksinasi dalam kalangan guru, AKP dan pekerja perkhidmatan sokongan dapat terus ditingkatkan.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN SANISVARA NETHAJI RAYER A/L  
RAJAJI [ JELUTONG ]**

**TARIKH : 23 SEPTEMBER 2021 (KHAMIS)**

**SOALAN**

**TUAN SANISVARA NETHAJI RAYER A/L RAJAJI** minta **MENTERI KANAN PENDIDIKAN** menyatakan daripada jumlah 150,000 unit komputer riba untuk pelajar yang diumumkan oleh Menteri Kewangan dalam Belanjawan 2021, berapa unit komputer riba yang telah diedarkan untuk kegunaan pelajar-pelajar sehingga sekarang.

**JAWAPAN**

**Tuan Yang di-Pertua,**

Untuk makluman Ahli Yang Berhormat, inisiatif Tabung CERDIK seperti yang diluluskan dalam Belanjawan 2021 adalah satu inisiatif pemberian peranti digital kepada 150,000 orang murid B40 yang dilaksanakan oleh Yayasan Hasanah, sebuah yayasan di bawah Khazanah Nasional. CERDIK merupakan satu inisiatif tanggung jawab sosial korporat (CSR) oleh syarikat berkaitan kerajaan (GLC) dan syarikat pelaburan berkaitan kerajaan (GLIC) bertujuan menyediakan peranti digital dan pelan data kepada murid B40 yang dikenal pasti.

Yayasan Hasanah menguruskan sumbangan peranti digital termasuk pelan data daripada GLC dan GLIC serta menyelaras penghantaran peranti berkenaan ke Pejabat Pendidikan Daerah (PPD), Kementerian Pendidikan Malaysia (KPM).

Peranti digital yang diterima oleh KPM akan terus diagihkan kepada murid B40 yang telah dikenal pasti. Sehingga 20 September 2021, sebanyak 112, 356 unit peranti digital dilengkapi dengan pelan data telah diserahkan kepada murid B40 di 910 sekolah seluruh negara. Manakala, 16, 577 unit telah diterima daripada Yayasan Hasanah dan akan diagihkan kepada murid dalam masa terdekat. Baki 21, 067 unit lagi akan diagihkan sebaik sahaja diterima daripada Yayasan Hasanah.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN LIM KIT SIANG [ ISKANDAR PUTERI ]**

**TARIKH : 23 SEPTEMBER 2021 (KHAMIS)**

**SOALAN**

**TUAN LIM KIT SIANG [ ISKANDAR PUTERI ]** minta **MENTERI KANAN PENDIDIKAN** menyatakan tidak ada sebarang perubahan kepada silibus pengajaran dan pembelajaran yang disesuaikan untuk pelaksanaan Pembelajaran dan Pengajaran di Rumah (PdPR) dalam tempoh PKP sebelum ini.

**JAWAPAN**

**Tuan Yang di-Pertua,**

Kementerian Pendidikan Malaysia (KPM) komited untuk memastikan semua murid tidak ketinggalan dan dapat mengikuti pembelajaran secara berterusan dalam keadaan selamat sepanjang tempoh Perintah Kawalan Pergerakan (PKP).

Perubahan kurikulum memerlukan kajian yang terperinci dan mendalam agar ianya tidak memberi kesan jangka panjang terhadap perkembangan pembelajaran dan pendidikan murid secara keseluruhan pada masa depan.

KPM telah melaksanakan penjajaran kandungan kurikulum mata pelajaran. Penjajaran ini difokuskan kepada Kandungan Asas (KA) supaya murid dapat disediakan untuk pembelajaran peringkat seterusnya. Kandungan Tambahan (KT) dan Kandungan Pelengkap (KP) pula boleh dilaksanakan mengikut keupayaan murid.

Bagi memperkasakan pelaksanaan kurikulum tersebut, KPM turut memperkenalkan Program Pemerkasaan Pelaksanaan Kurikulum (KPMPerkasaKU). Program KPMPerkasaKU dirangka dengan tujuan memastikan pembelajaran pemulihan bagi murid yang belum menguasai literasi dan numerasi. Di samping itu juga, program ini menyediakan pelbagai sokongan bagi mengukuh dan memperkayakan penguasaan kandungan mata pelajaran. Bagi mengenal pasti tahap penguasaan murid, Pentaksiran Bilik Darjah (PBD) dilaksanakan secara berterusan dalam tempoh PdP dan PdPR.



**PEMBERITAHUAN PERTANYAAN JAWAB LISAN  
DEWAN RAKYAT MESYUARAT PERTAMA, PENGGAL KEEMPAT  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : YB PUAN MARIA CHIN BINTI ABDULLAH  
[ PETALING JAYA ]**

**TARIKH : 23 SEPTEMBER 2021 (KHAMIS)**

**SOALAN**

**PUAN MARIA CHIN BINTI ABDULLAH [ PETALING JAYA ]** minta **MENTERI PEMBANGUNAN WANITA, KELUARGA DAN MASYARAKAT** menyatakan langkah-langkah (selain daripada memberi dana/ wang tunai) untuk membantu wanita dan kanak kanak untuk :

- a) mengelakkan peningkatan mendadak isu keganasan domestik dan gangguan seksual atas talian sejak bermulanya *lockdown* dan mengelakkan kehilangan pekerjaan dan sumber kewangan terjejas serta peningkatan beban kerja tidak bergaji seperti menjaga ahli keluarga akibat *lockdown*; dan
- b) apakah tindakan konkrit, selain daripada undang-undang, yang telah/akan diambil untuk memberi sokongan terhadap mangsa gangguan seksual serta pelan/agenda nasional untuk memastikan kes gangguan seksual tidak berulang di masa hadapan.

**JAWAPAN**

Tuan Yang di-Pertua,

Kementerian Pembangunan Wanita, Keluarga dan Masyarakat (KPWKM) memandang serius peningkatan panggilan dan aduan berkaitan keganasan rumah tangga serta beberapa pelaporan media massa mengenai kejadian gangguan seksual atas talian. Bagi menangani isu ini, KPWKM telah melaksanakan pelbagai inisiatif seperti berikut :

- a) memperbanyakkan program advokasi berkaitan keganasan rumah tangga dan gangguan seksual;
- b) memperluaskan promosi perkhidmatan Talian Kasih 15999;
- c) menggubal Rang Undang-Undang Anti-Gangguan Seksual;
- d) menawarkan program pembangunan kapasiti untuk meningkatkan kemahiran bagi menjana pendapatan;
- e) menubuhkan Skuad Wanita Anti Jenayah (WAJA) bagi memperkasa komuniti melalui program bimbingan psikososial dan aktiviti dalam komuniti khususnya wanita; dan
- f) memastikan perkhidmatan perlindungan seperti Tempat Selamat serta Perintah Perlindungan Kecemasan (EPO) dapat diakses oleh mangsa.

KPWKM telah menggandakan program advokasi dan hebahan berkaitan keganasan rumah tangga dengan kerjasama badan bukan kerajaan termasuk Sistem Pesanan Ringkas Majlis Keselamatan Negara (MKN) agar mangsa keganasan rumah tangga atau orang awam tampil melaporkan kejadian yang berlaku. Tambahan itu, KPWKM turut sentiasa memastikan perkhidmatan perlindungan seperti Tempat Selamat serta Perintah Perlindungan Kecemasan (EPO) dapat diakses oleh mangsa keganasan rumah tangga bagi menjarakkan mangsa daripada pelaku untuk mengelakkan kejadian tersebut terus berlaku.

Selain itu, KPWKM melalui Jabatan Pembangunan Wanita (JPW) giat mengadakan program-program untuk meningkatkan kesedaran masyarakat tentang gangguan seksual supaya dapat mengelakkan perlakuan tersebut daripada terus berleluasa sama ada secara fizikal, visual dan lain-lain bentuk. Dengan norma baharu yang rata-ratanya melibatkan urusan secara dalam talian akan turut mendedahkan pelbagai pihak dengan risiko gangguan seksual secara maya. Pada tahun ini, sehingga Jun 2021, sebanyak 53 program telah dilaksanakan oleh JPW bertujuan untuk memberikan kesedaran mengenai perkara ini dengan penglibatan seramai 11,367 peserta di seluruh negara.

Merujuk kepada perlakuan gangguan seksual, KPWKM turut menekankan aspek dengan izin Tuan Yang di-Pertua "*structural reform*" iaitu melalui proses pengukuhan dan penambahbaikan polisi dan perundangan sedia ada melalui penggubalan suatu akta khusus mengenainya iaitu Rang Undang-Undang Anti-Gangguan Seksual. Perkara ini turut telah dijadikan sebagai salah satu program bagi Teras Memperkasakan Wanita di bawah Pelan Strategik Kementerian bagi tahun 2021-2025.

Bagi membantu wanita yang terjejas pendapatan, KPWKM melalui Jabatan Pembangunan Wanita turut bekerjasama dengan pelbagai pihak seperti Kementerian Pembangunan Usahawan dan Koperasi (MEDAC) untuk menawarkan program-program kemahiran khususnya dalam bidang keusahawanan serta menjadi penghubung kepada pelbagai industri melalui karnival kerjaya yang pada masa ini telah melibatkan 5,885 peluang pekerjaan. Selain itu, wanita daripada kategori B40 dan Ibu Tunggal juga berpeluang untuk menjana pendapatan dan menceburi bidang asuhan dan jagaan kerana Institut Sosial Malaysia turut menawarkan Kursus Asuhan dan Didikan Awal Kanak-kanak PERMATA secara percuma. Pada tahun 2020, seramai 180 orang peserta telah mengikuti kursus tersebut manakala 90 orang disasarkan bagi tahun 2021.

Sering kali mangsa keganasan rumah tangga dan gangguan seksual tidak mempunyai keberanian untuk membuat laporan ataupun tidak pasti apakah tindakan terbaik yang perlu diambil mereka.

## **SOALAN NO : 44**

Sehubungan itu, KPWKM telah melipatgandakan usaha mempromosikan perkhidmatan “Talian Kasih 15999”, talian bebas tol yang beroperasi 24 jam sehari dan aplikasi WhatsApp 019-26 15999 bagi membantu khususnya wanita dan kanak-kanak mengemukakan aduan, mendapatkan khidmat nasihat serta mengakses bantuan dan sokongan seperti perkhidmatan psiko-sosial.

Penubuhan Skuad Waja memainkan peranan dalam memberi panduan kepada masyarakat tentang pentingnya usaha menghentikan sebarang bentuk keganasan terhadap wanita. Skuad Waja ini juga akan membantu mereka yang menjadi mangsa untuk merujuk kes kepada pihak yang berwajib dan mendapatkan pertolongan profesional. Program ini dilihat dapat membantu komuniti dalam memberi kesedaran mengenai kepentingan kesihatan mental dan menangani isu-isu jenayah selain menjadikan komuniti lebih berdaya saing serta mampu menjana pendapatan dengan kemahiran yang akan diberikan oleh Skuad Waja dalam komuniti.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN WONG KAH WHO [IPOH TIMUR]**

**TARIKH : 23 SEPTEMBER 2021 (KHAMIS)**

**SOALAN**

**TUAN WONG KAH WOH [ IPOH TIMUR ]** minta **MENTERI KEWANGAN** menyatakan jumlah pinjaman Kerajaan secara pengeluaran bon dengan Bank Negara Malaysia (BNM) selaku Ejen Fasiliti atau dengan mana-mana cara lain dari bulan Julai sehingga sekarang. Nyatakan tujuan dan keperluan pinjaman tersebut dengan mengambil kira kedudukan kewangan negara yang sedia ada.

**JAWAPAN**

Tuan Yang di-Pertua,

1. Program pinjaman Kerajaan Persekutuan adalah berdasarkan kepada keperluan untuk membiayai semula hutang yang matang dan defisit fiskal tahunan. Secara amnya, Kerajaan memperoleh pinjaman melalui terbitan bon atau sukuk di pasaran domestik atau luar negara. Dalam hal ini, jumlah pinjaman kasar Kerajaan Persekutuan sehingga Ogos 2021 adalah sebanyak 150.8 bilion ringgit. Ia diperoleh melalui terbitan instrumen Sekuriti Kerajaan Malaysia (atau MGS) sebanyak 56.5 bilion ringgit, Terbitan Pelaburan Kerajaan Malaysia (atau MGII) sebanyak 52.5 bilion ringgit, bil perbendaharaan sebanyak 36.5 bilion ringgit dan pinjaman luar pesisir melalui terbitan Sukuk Global 2021 sebanyak 5.3 bilion ringgit.

2. Daripada jumlah tersebut, sejumlah 65.5 bilion ringgit adalah untuk membiayai semula (atau *refinance*, dengan izin) hutang terdahulu yang matang dan 85.3 bilion ringgit untuk membiayai defisit fiskal termasuk, dengan izin *prefund* hutang yang akan matang dalam tahun semasa.

3. Dalam membiayai defisit fiskal ini, terimaan pinjaman sebanyak 40 bilion ringgit digunakan untuk perbelanjaan pembangunan dan sebanyak 20.8 bilion ringgit untuk Kumpulan Wang COVID-19 (atau KWC). Perbelanjaan di bawah KWC merangkumi Bantuan Prihatin Rakyat, Bantuan Prihatin Nasional, Program Subsidi Upah, Geran Khas Prihatin, perbelanjaan berkaitan COVID-19, sokongan bantuan sosial untuk golongan mudah terjejas dan projek berskala kecil.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN FONG KUI LUN [ BUKIT BINTANG ]**

**TARIKH : 23 SEPTEMBER 2021 (KHAMIS)**

**SOALAN**

**TUAN FONG KUI LUN** minta **MENTERI KANAN PENDIDIKAN** menyatakan sejauh mana pengajaran dan pembelajaran menerusi PdPR yang berjalan sepanjang tempoh PKP mampu melahirkan pelajar yang menguasai ilmu pengetahuan secara bersemuka.

**JAWAPAN**

**Tuan Yang di-Pertua,**

Kementerian Pendidikan Malaysia (KPM) menyedari bahawa pandemik COVID-19 telah memberi kesan kepada sistem persekolahan. Sesi pengajaran dan pembelajaran (PdP) secara bersemuka menjadi lebih singkat apabila sekolah ditutup bagi membendung penularan COVID-19. Dalam tempoh tersebut, KPM telah menyediakan akses pembelajaran kepada murid melalui kaedah pengajaran dan pembelajaran di rumah (PdPR) mengikut kesesuaian guru dan murid.

Bagi menilai tahap keberkesanan PdP semasa tempoh penutupan sekolah, KPM telah melaksanakan Kajian Keberkesanan Pelaksanaan *Home-based Learning* yang ditadbir secara dalam talian. Kajian ini memfokuskan kepada PdPR semasa Perintah Kawalan Pergerakan (PKP). Skop kajian meliputi aspek pelaksanaan PdPR dalam tempoh Mac hingga Julai tahun 2020 yang merangkumi pendekatan, kaedah, strategi, aplikasi dan peralatan yang digunakan dalam pelaksanaan PdPR. Selain itu, kajian tersebut juga melihat kepada penjadualan PdPR, penyusunan semula Rancangan Pelajaran Tahunan (RPT) dan pentaksiran. Kajian ini

melibatkan 13,156 orang pentadbir sekolah, 39,967 orang guru, 52,413 orang murid dan 59,624 orang ibu bapa/penjaga. Dapatan kajian menunjukkan pelibatan murid di bandar dalam PdPR secara dalam talian adalah sebanyak 59.3 peratus berbanding 51.4 peratus bagi murid di luar bandar. Bagi RPT pula, 46.2 peratus guru di bandar mencapai sasaran pelaksanaan berbanding dengan 39.1 peratus guru di luar bandar.

Dapatan kajian ini juga menunjukkan tahap keberkesanan PdPR adalah pada tahap sederhana. Sebanyak 34.1 peratus murid menyatakan hasil pembelajaran di rumah adalah tidak seperti yang diperolehi di sekolah dan merupakan punca pembelajaran kurang berkesan.

Selain itu, 51.2 peratus murid berasa tertekan semasa pembelajaran di rumah. Daripada kumpulan tersebut, 48.9 peratus murid menyatakan sebab tertekan adalah kerana interaksi yang terhad dengan guru, manakala 55.0 peratus murid tertekan disebabkan interaksi terhad dengan rakan-rakan. Sebanyak 53.4 peratus murid pula tertekan disebabkan kurang bimbingan dalam sesi pembelajaran.

Sebaliknya, terdapat murid menganggap PdPR merupakan suatu pengalaman baharu. Sebanyak 56.6 peratus murid berjaya melibatkan diri secara aktif semasa sesi pembelajaran di rumah dan 49.7 peratus murid berasa seronok semasa mengikuti PdPR. Sebanyak 57.5 peratus murid berjaya menyiapkan tugas atau latihan yang diberikan oleh guru dalam masa yang ditetapkan. Dapatan kajian juga menunjukkan sebanyak 36.0 peratus murid boleh belajar sendiri menggunakan bahan pembelajaran di rumah dalam tempoh PKP.

Selain daripada pelaksanaan kajian tersebut, pada suku tahun pertama 2021, KPM telah menjalankan Tinjauan Pelaksanaan PdPR yang melibatkan 500 buah sekolah melalui pemerhatian terhadap PdPR yang dilaksanakan dalam talian atau gabungan dalam dan luar talian. Pemerhatian dilaksanakan melalui kehadiran Nazir Sekolah dalam kelas PdPR secara dalam talian. Pemerhatian ini dimaklumkan lebih awal kepada guru yang terlibat.

Sebanyak 1,053 pemerhatian dilaksanakan ke atas PdP guru. Tinjauan mendapati 98.7 peratus guru dapat mengelola isi pelajaran yang



diajar mengikut peruntukan masa yang ditetapkan. Sebanyak 97.4 peratus guru berjaya membimbing murid untuk memahami dan menguasai isi, konsep dan fakta berkaitan pelajaran. Sementara itu, 96.7 peratus guru berjaya menarik perhatian murid untuk memberi respons terhadap pembelajaran dan memastikan keterlibatan murid semasa PdPR secara *real-time*.

Hasil tinjauan juga mendapati murid memberi respons positif terhadap tugas yang diberikan oleh guru dalam 97.5 peratus PdPR yang diperhatikan. Murid juga dapat melengkap dan menghantar tugas dengan pelbagai cara antaranya, melalui rakaman video, slaid pembentangan dan *voice call*.

Rumusan daripada tinjauan ini menunjukkan bahawa guru berupaya merangsang murid berfikir dan berkomunikasi dalam PdPR. Guru juga dapat melaksanakan aktiviti pembelajaran yang menyeronokkan dan menarik minat murid untuk belajar.

Untuk makluman Ahli Yang Berhormat, dalam memastikan semua murid mengikuti PdPR, KPM telah membangunkan Sistem Pelaporan Pengajaran dan Pembelajaran di Rumah (SPdPR). Sistem ini membolehkan penyertaan murid dipantau secara *real-time*. Hal ini membolehkan pihak sekolah melaksanakan intervensi yang bersesuaian bagi memastikan keterlibatan murid adalah secara optimum.

Data pelaporan bermula 20 Januari hingga 30 Ogos 2021 menunjukkan peratus murid yang mengikuti PdPR meningkat. Pelibatan murid sekolah rendah meningkat sebanyak 12.1 peratus iaitu daripada 87.1 peratus kepada 99.2 peratus. Pelibatan murid sekolah menengah pula meningkat sebanyak 19.3 peratus iaitu daripada 78.0 peratus kepada 97.3 peratus.

Secara kesimpulannya, dapatan kajian menunjukkan pelaksanaan PdPR berhadapan dengan pelbagai cabaran dan kekangan pada peringkat awal. Namun, intervensi yang dilaksanakan oleh KPM telah membantu murid mengikuti PdPR dengan lebih baik. KPM sentiasa komited untuk memastikan murid dapat meneruskan pembelajaran dalam

keadaan yang selamat dan mendapat akses kepada pembelajaran yang berkualiti pada setiap masa.

Untuk makluman Ahli Yang Berhormat, KPM telah membangunkan satu kerangka holistik dalam memastikan PdP dapat terus dilaksanakan dengan berkesan. Di samping itu, KPM akan terus menambah baik pelaksanaan PdPR bagi memastikan keberkesanannya dapat ditingkatkan dari semasa ke semasa.

Bagi memantau penyertaan murid dalam PdPR, KPM telah membangunkan Sistem Pelaporan Pengajaran dan Pembelajaran di Rumah (SPdPR). Sistem ini membolehkan penyertaan murid dipantau secara *real-time*. Hal ini membolehkan pihak sekolah melaksanakan intervensi yang bersesuaian bagi memastikan keterlibatan murid adalah secara optimum.

Selain daripada itu, sewaktu sesi persekolahan dibuka semula sebelum ini, guru telah membuat pengesanan terhadap tahap penguasaan kemahiran murid. Ini membolehkan guru merancang dan melaksanakan intervensi yang bersesuaian sewaktu PdPR.

KPM juga telah melaksanakan penjajaran kandungan kurikulum mata pelajaran. Penjajaran kurikulum mata pelajaran difokuskan kepada Kandungan Asas (KA) supaya murid dapat disediakan untuk pembelajaran peringkat seterusnya. Kandungan Tambahan (KT) dan Kandungan Pelengkap (KP) pula boleh dilaksanakan mengikut keupayaan murid.

Bagi memperkasakan pelaksanaan kurikulum, KPM juga menambah baik sokongan pembelajaran dengan memperkenalkan Program Pemerkasaan Pelaksanaan Kurikulum (KPMPerkasaKU). Program KPMPerkasaKU dirancang dengan tujuan memastikan pembelajaran pemulihan bagi murid yang belum menguasai literasi dan numerasi. Di samping itu juga, program ini menyediakan pelbagai sokongan bagi mengukuh dan memperkayakan penguasaan kandungan mata pelajaran. Program ini melibatkan murid sekolah rendah dan sekolah menengah.

Selain itu, KPM juga telah memperkenalkan semula siaran TV Pendidikan. Murid boleh mengikuti pelbagai rancangan TV Pendidikan melalui saluran DidikTV KPM, TV Okey RTM dan Tutor TV Astro. Kandungan yang disediakan adalah berdasarkan kepada kurikulum peringkat prasekolah hingga ke tingkatan enam. Di samping itu, kandungan rancangan TV Pendidikan turut memuatkan slot yang berkaitan kokurikulum.

KPM turut menambah lebih banyak bahan PdP melalui Digital Educational Learning Initiative Malaysia (DELIMa). Pelantar ini merupakan pusat rujukan sehenti yang mengandungi pelbagai aplikasi, perkhidmatan dan sumber pendidikan digital. Sehingga kini, 3,245 video kurikulum, 324 video pedagogi dan 1,761 video DidikTV telah dimuat naik di pelantar DELIMa. KPM juga telah menaik taraf dan menambah baik pelantar DELIMa (DELIMa 2.0) dengan fitur baharu mulai Ogos 2021. Fitur baharu ini memberi fokus kepada pengalaman pengguna, analitis data, kandungan dan pembelajaran diperibadikan.

Untuk makluman Ahli Yang Berhormat, KPM sentiasa memperkasa program latihan pembangunan profesionalisme berterusan (PPB) kepada guru. Ini termasuklah latihan yang memberi fokus kepada kemahiran digital, pedagogi dalam dan luar talian serta pentaksiran secara dalam talian dan luar talian. Sehingga 17 September 2021, sebanyak 12,048 aktiviti PPB berkaitan PdPR dan 1,949 PPB berkaitan Digital/ICT telah direkodkan.

KPM yakin kerangka holistik yang dirancang dan dilaksanakan ini membolehkan murid mengikuti PdPR secara lebih berkesan. Pada masa yang sama, KPM telah merangka pelan pembukaan semula sekolah yang komprehensif untuk membawa murid kembali ke sekolah dalam keadaan teratur dan selamat.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN NOOR AMIN BIN AHMAD [KANGAR]**

**TARIKH : 23 SEPTEMBER 2021 (KHAMIS)**

**SOALAN**

**TUAN NOOR AMIN BIN AHMAD [ KANGAR ]** minta **MENTERI KEWANGAN** menyatakan apakah langkah-langkah yang dirancang untuk menambahkan hasil Kerajaan dan mengurangkan hutang dalam tempoh RMK-12.

**JAWAPAN**

Tuan Yang di-Pertua,

1. Kerajaan akan terus berusaha memperkukuh dan memaksimum kutipan hasil Kerajaan Persekutuan serta meningkatkan keapungan cukai melalui inisiatif pembaharuan cukai. Antara langkah yang diumumkan semasa Belanjawan 2021 adalah cukai ke atas rokok elektronik dan vape serta penubuhan *Multi-Agency Task Force* dengan penyertaan Suruhanjaya Pencegahan Rasuah Malaysia dan Pusat Pencegahan Jenayah Kewangan Nasional bagi menambah baik kutipan hasil melalui pembasmian aktiviti penyeludupan terutama barangan berduti tinggi.
2. Di samping itu, Kerajaan juga akan menggubal Strategi Hasil Jangka Sederhana dengan mengkaji dan menambah baik sistem percukaian sedia ada, memperluas asas hasil, memanfaatkan potensi sektor tidak formal, mengurangkan amalan terkurang lapor dan isytihar, mengurangkan ketirisan cukai serta menambah baik pentadbiran cukai melalui pengurusan data yang berkesan dan mengintegrasikan data dengan agensi berkaitan.
3. Antara langkah yang akan diambil untuk meringankan beban hutang adalah melaksanakan reformasi fiskal termasuk cadangan penggubalan Akta Tanggungjawab Fiskal dan Rangka Kerja Fiskal Jangka Sederhana untuk memacu langkah konsolidasi fiskal pasca krisis. Inisiatif ini akan mewujudkan ruang fiskal yang mencukupi dan memastikan hutang negara sentiasa berada pada paras terurus dalam tempoh jangka sederhana dan jangka panjang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK WIRA HAJI MOHD. ANUAR MOHD.  
TAHIR [ TEMERLOH ]**

**TARIKH : 23 SEPTEMBER 2021 (RABU)**

**SOALAN**

Minta **MENTERI PENGAJIAN TINGGI** menyatakan kawasan titik tengah Semenanjung, kedudukan strategik serta wujudnya infrastruktur yang baik menghubungkan daerah ini dengan Kuala Lumpur dan daerah-daerah lain tidak mempunyai satu pun Institusi Pengajian Tinggi. Adakah Kementerian ada merancang untuk menubuhkan IPT di daerah Temerloh.

**JAWAPAN**

Tuan Yang di-Pertua,

Selain daripada kedudukan kewangan negara, penubuhan sesebuah Institusi Pendidikan Tinggi (IPT) turut mengambil kira pelbagai aspek seperti lokasi, pertumbuhan ekonomi, strategi pembangunan negara dan wilayah serta keperluan guna tenaga.

Di negeri Pahang, terdapat empat (4) Universiti Awam (UA), tiga (3) politeknik dan sebelas (11) kolej komuniti yang menawarkan pelbagai program dan bidang pengajian untuk menyokong keperluan tenaga kerja mahir dan profesional serta menyokong pembangunan ekonomi negeri dan negara.

Untuk makluman Ahli Yang Berhormat, di bawah *Rolling Plan* Kedua, Rancangan Malaysia Kedua Belas (RP2, RMKe-12) Tahun 2022, Kementerian telah mengemukakan permohonan kepada Unit Perancang Ekonomi, Jabatan Perdana Menteri (EPU, JPM) bagi pembinaan sebuah Kampus Kolej Komuniti Jelai, Pahang dengan kapasiti seramai 240 orang pelajar. Program yang akan ditawarkan di Kolej Komuniti ini ialah Sijil Agroteknologi dan Sijil Teknologi Pertanian Lestari.

Dalam pada itu, Temerloh juga telah mempunyai sebuah kolej komuniti, iaitu Kolej Komuniti Temerloh yang telah beroperasi sejak tahun 2003. Kolej Komuniti ini menawarkan empat (4) program, iaitu Sijil Penyelenggaraan Bangunan; Sijil Fesyen dan Pakaian; Sijil Teknologi Maklumat; serta Sijil Reka Bentuk dan Pembuatan Perabot. Berdasarkan jumlah institusi dan bidang yang ditawarkan tersebut, KPT berpandangan ia adalah mencukupi bagi menampung keperluan semasa pembangunan modal insan di negeri Pahang.

Walau bagaimanapun, KPT menghargai dan memberikan perhatian terhadap cadangan Yang Berhormat Temerloh untuk mewujudkan IPT di Temerloh, Pahang. Pihak KPT akan meneliti keperluan perkara ini dari semasa ke semasa bergantung jua kepada keperluan tertentu termasuk keupayaan semasa kewangan kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN SIM TZE TZIN [BAYAN BARU]**

**TARIKH : 23 SEPTEMBER 2021 (KHAMIS)**

**SOALAN**

Minta **MENTERI PENGAJIAN TINGGI** menyatakan apakah perancangan Kementerian membuka semula universiti dengan pembelajaran secara fizikal. Jika ada, nyatakan secara jelas SOP terbaru pembelajaran di dalam universiti dan ko-kurikulum, supaya siswa-siswi, ibu bapa, pensyarah, pengusaha kantin dan badan aktiviti siswa memahami semua SOP dengan jelas.



**JAWAPAN**

Tuan Yang di-Pertua,

Dalam upaya untuk memastikan kelestarian kualiti pendidikan tinggi negara dan mengambil kira input sesi libat urus bersama Majlis Keselamatan Negara (MKN), Kementerian Kesihatan Malaysia (KKM), pengurusan IPT yang merangkumi Naib Canselor, Timbalan Naib Canselor, wakil persatuan IPTS dan Majlis perwakilan pelajar, maka Kementerian Pengajian Tinggi (KPT) bersetuju melaksanakan kemasukan berperingkat pelajar secara fizikal ke kampus Institut Pendidikan Tinggi (IPT) bermula pada 15 Oktober 2021. Kemasukan pelajar ke IPT kali ini melibatkan semua kategori pelajar di semua IPT di seluruh negara seramai lebih kurang 1.2 juta orang. Dalam hubungan ini juga, Pengajaran dan Pembelajaran (PdP) secara hibrid akan diaplikasikan bagi membolehkan pelajar melaksanakan PdP secara bersemuka di kampus dengan pematuhan SOP yang ketat, dan pada masa yang sama turut menjalani PdP secara dalam talian bagi melengkapkan pembelajaran yang berkaitan.

Bagi tujuan kemasukan pada Oktober 2021, KPT memperkenalkan SOP Sektor Pendidikan Tinggi: Pengoperasian IPT yang mana hanya warga IPT yang lengkap vaksin dan melepasi tempoh keberkesanan selepas divaksin sahaja dibenarkan memasuki kampus. Interaksi komuniti kampus dengan komuniti luar kampus juga akan dipantau secara ketat dari semasa ke semasa. Langkah ini diambil bagi membentuk persekitaran yang selamat dan *herd immunity* di kampus. SOP Sektor Pendidikan Tinggi: Pengoperasian IPT yang telah diluluskan oleh MKN ini merangkumi enam (6) perkara iaitu Pentadbiran IPT; Pergerakan Pelajar IPT Kembali ke Kampus; Pengajaran dan Pembelajaran (PdP); Pelaksanaan Aktiviti Penyelidikan Dalam Makmal/Bengkel; Pengurusan Pelajar di Kediaman dan Fasiliti Kampus; serta Pengurusan Aktiviti Pelajar.

KPT dengan kerjasama Badan Bertindak Imunisasi COVID-19 (CITF) juga sedang giat melaksanakan program vaksinasi warga IPT. Langkah

ini bagi meningkatkan kadar vaksinasi warga IPT termasuk pelajar, staf akademik dan staf bukan akademik sebelum Oktober 2021.

Tuan Yang di-Pertua,

Bagi memastikan kelancaran pergerakan pelajar untuk memasuki kampus, pihak KPT turut mengadakan perbincangan bersama-sama wakil kerajaan negeri, terutamanya Sabah, Sarawak dan Wilayah Persekutuan Labuan; pihak KKM; Polis DiRaja Malaysia (PDRM); Kementerian Sains dan Teknologi (MOSTI) dan syarikat penyedia perkhidmatan penerbangan untuk memudah cara proses pergerakan pelajar dan kemasukan ke kampus secara fizikal.

Pihak KPT juga telah membangunkan soalan lazim yang memperihalkan kaedah dan tatacara yang terlibat bagi kemasukan semula ke kampus. Maklumat ini boleh diakses melalui Portal Rasmi KPT dan juga menerusi hebahan di medial sosial rasmi KPT. Perkhidmatan Bilik Gerakan yang beroperasi 24 jam sehari, 7 hari seminggu turut disediakan bagi membolehkan pelajar, ibu bapa atau penjaga dan pihak warga IPT mendapatkan sebarang maklumat terkini yang sahih dan tepat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : TUAN KESAVAN A/L SUBRAMANIAM  
[ SUNGAI SIPUT ]**

**TARIKH : 23 SEPTEMBER 2021 (KHAMIS)**

**SOALAN**

**TUAN KESAVAN A/L SUBRAMANIAM** minta **MENTERI KANAN PENDIDIKAN** menyatakan status terkini Projek Pembinaan Sekolah Jenis Kebangsaan (Tamil) Heawood, Sungai Siput (U).

**JAWAPAN**

Tuan Yang di-Pertua,

Projek Pembinaan Sekolah Jenis Kebangsaan Tamil Heawood, Sungai Siput (U), Perak telah diluluskan dalam *Rolling Plan* 1 (Tahun 2016) Rancangan Malaysia Ke-11 (RMKe-11) dengan kos projek berjumlah RM13.88 juta. Skop projek ini meliputi pembinaan baharu 12 bilik darjah dan kemudahan lain. Projek ini adalah di bawah seliaan Kementerian Pendidikan Malaysia (KPM).

Untuk makluman Ahli Yang Berhormat, projek pembinaan sekolah ini telah dimulakan pada Jun 2017 dan sepatutnya siap pada 23 Mac 2019, iaitu setelah mendapat kelulusan Lanjutan Tempoh Masa (EOT) sebanyak 108 hari dari tarikh siap asal pada 5 Disember 2018. Walau bagaimanapun, kontraktor gagal menunjukkan sebarang peningkatan prestasi kerja di tapak projek selepas KPM memberikan peluang selama empat bulan melalui Notis Tujuan Penamatan pada 2 April 2019. Susulan itu, kontraktor bagi projek ini telah ditamatkan pada 20 Ogos 2019.

## **SOALAN NO: 50**

Semasa penamatan dibuat, progres terakhir kerja-kerja pembinaan adalah sebanyak 42 peratus berbanding jadual 100 peratus. Pelantikan kontraktor penyelamat hanya boleh dilantik setelah KPM menyelesaikan perakuan akaun penamatan, menilai baki kerja, memuktamadkan kos projek berdasarkan baki kerja, mendapatkan kelulusan Notis Perubahan (NOC) bagi peningkatan kos projek dan menyediakan dokumen kontrak baharu.

Permohonan NOC telah diluluskan oleh Unit Perancang Ekonomi (EPU) pada bulan 11 November 2020 dan penyediaan dokumen kontrak bagi pelantikan kontraktor penyelamat telah diselesaikan pada Mei 2021.

KPM telah menjadualkan tarikh tender semula projek ini pada 1 Jun 2021. Walau bagaimanapun, tender ini terpaksa ditunda susulan pelaksanaan Perintah Kawalan Pergerakan (PKP) kerana syarat wajib lawatan tapak tidak dapat dilaksanakan.

Projek ini akan ditender pada 30 September 2021. Sekolah ini dijangka siap dibina pada tahun 2023.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KE-14**

**PERTANYAAN : LISAN**  
**DARIPADA : Y.B. TUAN WONG CHEN**  
**[SUBANG]**  
**TARIKH : 23 SEPTEMBER 2021 (KHAMIS)**

**SOALAN**

**TUAN WONG CHEN [ SUBANG ]** minta **MENTERI KEWANGAN** menyatakan adakah Kerajaan akan menyemak semula unjuran Keluaran Dalam Negara Kasar (KDNK) bagi tahun 2021 memandangkan unjuran *Fitch Solutions* adalah amat rendah pada 0%.

**JAWAPAN**

Tuan Yang di-Pertua,

1. Kerajaan mengambil maklum akan unjuran pertumbuhan ekonomi Malaysia tahun 2021 pada kadar 0 peratus oleh Fitch Solutions baru-baru ini. Kerajaan berpandangan bahawa unjuran tersebut adalah terlampau pesimis berbanding unjuran terkini oleh pelbagai penganalisis dan pakar ekonomi, iaitu di antara 2 dan 6 peratus. Selain itu, Tabung Kewangan Antarabangsa (atau IMF) mengunjurkan ekonomi Malaysia bagi tahun 2021 berkembang sebanyak 4.7 peratus manakala Bank Dunia sebanyak 4.5 peratus. Namun, setelah mengambil kira momentum pertumbuhan ekonomi tahun 2021 yang terjejas berikutan pelaksanaan semula langkah pembendungan pandemik yang lebih ketat mulai Mei 2021, Kerajaan telah menyemak semula unjuran pertumbuhan KDNK negara kepada antara 3 dan 4 peratus berbanding anggaran awal iaitu antara 6 dan 7.5 peratus.

2. Semakan semula rasmi tersebut juga adalah berdasarkan andaian pembukaan semula sektor ekonomi dan sosial pada suku keempat 2021 berikutan kemajuan dan keberkesanan pelaksanaan program imunisasi COVID-19 yang memberangsangkan. Sehingga 16 September 2021, jumlah populasi dewasa yang telah lengkap divaksinasi melepasi 100 peratus bagi Lembah Klang dan hampir 77 peratus bagi seluruh negara. Jangkaan pencapaian imuniti kelompok pada Oktober 2021 berdasarkan kemajuan kadar vaksinasi terkini serta pembukaan semula sektor ekonomi secara berperingkat sepanjang fasa PPN akan turut mendorong sentimen positif dalam kalangan perniagaan dan pengguna.

3. Kini, sebahagian besar kes positif COVID-19 merupakan kes tidak bergejala atau bergejala ringan dan kadar kemasukan hospital bagi kes COVID-19 juga telah menurun. Pelaksanaan pelbagai pakej rangsangan, bantuan ekonomi, plan pemulihan dan langkah Bajet 2021 yang berterusan serta disokong oleh pemulihan ekonomi dan perdagangan global dijangka membantu mengekalkan momentum pertumbuhan KDNK sehingga tahun 2022.

Tuan Yang di-Pertua,

4. Kerajaan telah dan sedang melaksanakan pelbagai inisiatif bagi memulihkan ekonomi yang terjejas akibat pandemik COVID-19 di samping melindungi nyawa dan kehidupan rakyat. Antara inisiatif utama untuk terus menyokong sektor yang terkesan dan merancakkan semula aktiviti ekonomi adalah melalui:

- Pertama, pelaksanaan sejumlah lapan pakej bantuan rangsangan ekonomi dan bantuan yang komprehensif bernilai RM530 bilion sejak bulan Mac tahun 2020 (2020: RM305 bilion; 2021: RM225 bilion);
- Kedua, pengenalan inisiatif-inisiatif dalam Belanjawan 2021 dengan peruntukan berjumlah RM322.5 bilion; dan

- Terakhirnya, pelaksanaan Pelan Pemulihan Negara (atau PPN) yang merupakan strategi peralihan keluar secara berfasa daripada kemelut pandemik COVID-19.

5. Berikutan pelaksanaan pelbagai pakej, pelan dan langkah berkenaan, trend pemulihan ekonomi telah dapat dilihat di mana ekonomi negara telah berkembang sebanyak 7.1 peratus pada separuh pertama tahun 2021 berbanding penguncupan sebanyak 8.4 peratus pada tempoh yang sama pada tahun 2020. Setakat ini, lebih daripada 200 bilion ringgit daripada pakej rangsangan ekonomi telah disalurkan dan memanfaatkan lebih daripada 20 juta orang dan 2.4 juta perniagaan sejak Mac 2020. Lebih daripada 300 bilion ringgit juga masih tersedia untuk tahun ini bagi terus menyokong aktiviti ekonomi sepanjang pelbagai fasa PPN selaras dengan pembukaan semula sektor ekonomi dan sosial secara berperingkat.

6. Walau bagaimanapun, Kerajaan akan terus memantau perkembangan ekonomi global dan domestik terkini dengan teliti bagi mengenal pasti sebarang risiko yang boleh menjejaskan prospek pertumbuhan KDNK negara pada tahun 2021. Sekiranya terdapat keperluan untuk menyemak semula unjuran antara 3 peratus dan 4 peratus tersebut, Kerajaan akan mengumumkan unjuran terkini semasa pembentangan Bajet 2022 pada bulan Oktober 2021 kelak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN SYED SADDIQ  
BIN SYED ABDUL RAHMAN [MUAR]**

**TARIKH : 23 SEPTEMBER 2021 (KHAMIS)**

**SOALAN**

**TUAN SYED SADDIQ BIN SYED ABDUL RAHMAN [ MUAR ]** minta **MENTERI KEWANGAN** menyatakan perkembangan terkini usaha mengembalikan ketirisan hasil pendapatan negara akibat penyeludupan rokok tidak sah yang dianggarkan bernilai sebanyak RM5 bilion setahun.



**JAWAPAN**

Tuan Yang di-Pertua,

1. Untuk makluman Ahli Yang Berhormat, melalui Belanjawan 2021 Kerajaan telah mengumumkan beberapa strategi bagi mengurangkan ketirisan hasil yang disebabkan oleh aktiviti penyeludupan rokok tidak sah, antaranya dengan memperkasa penubuhan dengan izin, *Multi-Agency Task Force* melalui penyertaan Suruhanjaya Pencegahan Rasuah Malaysia dan Pusat Pencegahan Jenayah Kewangan Nasional dalam pasukan penguatkuasaan sedia ada. Pasukan kerja berkenaan dianggotai oleh pelbagai agensi penguatkuasaan yang berkerjasama rapat dalam meningkatkan usaha dan perkongsian maklumat di antara agensi untuk memastikan aktiviti penguatkuasaan dapat dilaksanakan dengan lebih berkesan di seluruh negara.

2. Selain itu, pelbagai langkah membendung aktiviti penyeludupan rokok tidak sah telah dilaksanakan oleh Jabatan Kastam Diraja Malaysia berkuatkuasa mulai 1 Januari 2021 seperti berikut:

- a. Membekukan lesen import baharu bagi rokok;
- b. Memperketatkan pembaharuan lesen import rokok sedia ada dan mengenakan kuota import;
- c. Mengehadkan dengan izin, aktiviti *transshipment* rokok kepada pelabuhan tertentu sahaja;
- d. Menganakan duti dan cukai ke atas rokok yang diimport bagi tujuan eksport semula, dengan kemudahan pulang balik duti dan cukai selepas rokok dieksport semula;
- e. Tidak membenarkan aktiviti *transshipment* dan eksport semula rokok menggunakan bot-bot kecil termasuk bot kumpit dan hanya dibenarkan melalui penggunaan kontena ISO sahaja; dan

- f. Menjadikan rokok dan produk tembakau sebagai barangan bercukai di semua pulau bebas cukai dan mana-mana zon bebas yang dibenarkan jualan runcit.

3. Melalui Jawatankuasa Pemandu dan Jawatankuasa Teknikal di bawah pasukan kerja yang sama, Jabatan Kastam Diraja Malaysia juga berperanan untuk memperkemaskan dasar, fasilitasi dan kawalan sempadan berhubung dengan aktiviti penguatkuasaan. Antara tindakan penguatkuasaan yang telah dijalankan adalah seperti berikut:

- a. Menyertai Operasi Portcullis dengan menghantar *Alert Notification* dengan izin, kepada pihak Kastam di negara jiran seperti Thailand bagi membuat pengesahan dagangan eksport syarikat;
- b. Merangka kaedah operasi yang lebih dinamik seperti Operasi Sepadu Marin Kastam, mengikut tempoh masa tertentu dan memberi fokus kepada sektor operasi laut;
- c. Mengadakan Ops BENTENG melalui pelaksanaan sekatan jalan raya bersama agensi penguatkuasa di sepanjang Pantai Timur Semenanjung bagi menyekat rantai pergerakan barangan di jajaran tersebut;
- d. Melaksanakan Ops PACAK di tempat-tempat yang telah dikenalpasti sebagai *hot-spot* dengan izin, bertujuan untuk memutuskan rantai penyeludupan;
- e. Menyediakan mesin pengimbas bagi setiap proses keluar masuk sempadan di seluruh negara, yang dikendalikan oleh pegawai kastam ataupun kendalian bersama dengan pegawai operator yang ditugaskan, bagi tujuan mengesan aktiviti penyeludupan;
- f. Menjalin kerjasama dengan pelbagai agensi penguatkuasaan dan keselamatan serta pihak industri melalui perkongsian maklumat dan operasi bersepadu; dan

- g. Menjalin kerjasama antarabangsa melalui perkongsian maklumat perisikan antarabangsa dan operasi antarabangsa yang berkaitan rokok.

4. Berdasarkan statistik perolehan kes penyeludupan rokok tidak sah oleh Jabatan Kastam Diraja Malaysia bagi tahun ini, sehingga 30 Ogos 2021 sebanyak 1,645 kes penyeludupan dengan nilai rampasan sebanyak 26.42 juta ringgit telah direkodkan, yang melibatkan sejumlah 231.81 juta ringgit nilai hasil cukai.

5. Jabatan Kastam Diraja Malaysia juga akan terus mempergiatkan aktiviti dan tindakan penguatkuasaan walaupun negara sedang menghadapi pandemik COVID-19, melalui aktiviti serbuan, rondaan darat dan air, sekatan jalan raya, pemeriksaan kapal, bot atau kenderaan, Operasi Khas serta Operasi Outlet Rokok.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KETIGA,  
PARLIMEN KEEMPAT BELAS**

**PERTANYAAN : LISAN**

**DARIPADA : TENGKU ZULPURI BIN RAJA PUJI  
(RAUB)**

**TARIKH : 23 SEPTEMBER 2021 (KHAMIS)**

**SOALAN**

**TENGKU ZULPURI BIN RAJA PUJI [ RAUB ]** minta **MENTERI PERTANIAN DAN INDUSTRI MAKANAN** menyatakan usaha-usaha yang dicadangkan oleh Kementerian dalam mempergiatkan pengeksportan durian sejuk beku khususnya jenama "*Musang King*" dan adakah cadangan meluluskan lebih banyak bilangan lesen pengeksport untuk mengelakkan sesetengah pihak memonopoli pasaran ini.

**JAWAPAN**

**Tuan Yang Di Pertua,**

Sejak tahun 2003, durian telah berjaya menembusi pasaran luar negara seperti Australia, China, Amerika Syarikat, Kesatuan Eropah, Taiwan, Korea Selatan dan Singapura. Durian dari Malaysia dieksport dalam bentuk buah segar (*whole fruit*), buah sejuk beku (*frozen whole fruit*), ulas dan pes sejuk beku (*frozen pulp and paste*) dan ulas sejuk (*chilled pulp*). Permintaan terhadap durian Musang King dari negara luar semakin meningkat, kesan positif hasil daripada inisiatif-inisiatif berterusan yang telah dilaksanakan oleh Kementerian Pertanian dan Industri Makanan (MAFI) bagi menghasilkan dan memasarkan durian yang berkualiti tinggi ke luar negara. Secara perbandingan, jumlah nilai eksport durian pada tahun 2016 ialah sebanyak RM69.9 juta,

manakala RM144.7 juta pada tahun 2020. Ini menunjukkan berlaku lonjakan jumlah nilai eksport durian ke luar negara sebanyak 107 peratus atau RM74.8 juta dalam tempoh lima (5) tahun.

MAFI terus komited untuk memperkasakan industri tanaman buah-buahan di bawah Rancangan Malaysia ke-12 (RMKe-12). MAFI telah diluluskan peruntukan bagi Projek Pembangunan Tanaman Buah-Buahan Jangka Panjang berjumlah RM45 juta bertujuan untuk pembangunan infrastruktur ladang, pembekalan input dan jentera pertanian, keperluan bagi pensijilan serta kemudahan lepas tuai. Jabatan Pertanian Malaysia (DOA) telah memperuntukkan sebanyak RM27 juta atau 60 peratus daripada jumlah keseluruhan projek tersebut untuk pembangunan tanaman durian. Bagi tahun 2021, seramai 742 orang peserta tanaman durian dengan keluasan 1,258 hektar telah diluluskan peruntukan sebanyak RM2.4 juta.

Usaha untuk mempergiatkan pengeksportan durian khususnya Musang King dilaksanakan oleh MAFI dengan memperkukuhkan rantai nilai pengeksportan buah durian. Di peringkat penghasilan, DOA mempergiat usaha untuk meningkatkan keupayaan dan pengetahuan petani dengan memperkenalkan kaedah penanaman baharu bagi menambah bilangan pokok dan buah yang berkualiti seperti Musang King. DOA menyasarkan kira-kira 50 peratus pokok durian Musang King ditanam di seluruh negara menjelang tahun 2022. Sehingga Ogos 2021, terdapat 576,000 pokok durian Musang King atau 36.5 peratus daripada 1.576 juta pokok durian di seluruh negara.

Bagi memastikan pengusaha memenuhi piawai antarabangsa dan protokol eksport, aktiviti pengembangan seperti Pelaksanaan Amalan Pertanian Baik (GAP), Pengurusan Perosak Bersepadu (IPM), serta program-program penerangan berkaitan protokol eksport durian kepada para usahawan tani dilaksanakan secara berterusan. Ladang-ladang serta fasiliti pemprosesan durian yang bersedia untuk menceburi pasaran eksport akan diaudit dan didaftarkan dengan DOA dan pihak berkuasa di negara pengimport. Sehingga kini, DOA telah mendaftarkan sebanyak 91 ladang durian dengan jumlah keluasan 683 hektar dan 49 buah fasiliti pemprosesan bagi tujuan eksport ke luar negara.

Di peringkat antarabangsa, MAFI juga sentiasa mempergiat usaha untuk memperluaskan akses pasaran, mempromosi durian di pasaran baru dan sedia ada, serta memperkukuh kaedah pemasaran di luar negara. Antara pasaran baru yang sedang diteroka adalah Australia untuk buah durian segar, New Zealand dan Rusia. Bagi mempromosi keistimewaan durian dan meningkatkan kesedaran pengguna di peringkat antarabangsa, MAFI bersama-sama Lembaga Pemasaran Pertanian Persekutuan (FAMA) aktif menjalankan program-program promosi di luar negara.

MAFI turut melaksanakan *Targeted Durian Diplomacy Program* dengan mempromosi durian Musang King sebagai buah-buahan *premium* kepada individu berprofil tinggi di luar negara. Selain daripada itu, program promosi *in-store* dan di media sosial juga giat dilaksanakan. Bagi mempelbagaikan saluran pemasaran durian di luar negara, MAFI juga turut bekerjasama dengan platform e-dagang luar negara, untuk memasarkan Durian Musang King secara atas talian kepada pengguna di luar negara. Ini sekaligus telah meningkatkan penerimaan dan permintaan masyarakat antarabangsa terhadap durian khususnya Musang King dari Malaysia.

MAFI tidak mengeluarkan lesen pengeksportan durian kepada mana-mana syarikat. Oleh itu, tidak ada sebarang unsur monopoli di dalam pengeksportan durian. Permohonan untuk mengeksport durian ke luar negara adalah terbuka kepada semua pengusaha yang berminat, dengan syarat perlu mematuhi protokol eksport yang ditetapkan oleh negara pengimport, serta melaksanakan pemprosesan di fasiliti yang berdaftar dengan DOA dan diluluskan oleh negara pengimport.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : PUAN ALICE LAU KIONG YIENG [ LANANG ]**

**TARIKH : 23 SEPTEMBER 2021 (KHAMIS)**

**SOALAN**

**PUAN ALICE LAU KIONG YIENG** minta **MENTERI KANAN PENDIDIKAN** menyatakan jumlah unit komputer riba, tablet dan peranti mudah alih yang telah diagihkan kepada pelajar di Sarawak (terutamanya di Sibu) dan apakah syarat syarat kelayakan untuk mendapat bantuan tersebut serta cara permohonan/rayuan sekiranya mereka yang layak tercicir untuk mendapatkan bantuan tersebut.

**JAWAPAN**

**Tuan Yang di-Pertua,**

Untuk makluman Ahli Yang Berhormat, inisiatif Tabung CERDIK seperti yang diluluskan dalam Belanjawan 2021 adalah satu inisiatif pemberian peranti digital kepada 150,000 orang murid B40 yang dilaksanakan oleh Yayasan Hasanah, sebuah yayasan di bawah Khazanah Nasional. CERDIK merupakan satu inisiatif tanggung jawab sosial korporat (CSR) oleh syarikat berkaitan kerajaan (GLC) dan syarikat pelaburan berkaitan kerajaan (GLIC) bertujuan menyediakan peranti digital dan pelan data kepada murid B40 yang dikenal pasti.

Yayasan Hasanah menguruskan sumbangan peranti digital termasuk pelan data daripada GLC dan GLIC serta menyelaras penghantaran peranti berkenaan ke Pejabat Pendidikan Daerah (PPD), Kementerian Pendidikan Malaysia (KPM).

Peranti digital yang diterima oleh KPM akan terus diagihkan kepada murid B40 yang telah dikenal pasti. Sehingga 20 September 2021, sebanyak 112, 356 unit peranti digital dilengkapi dengan pelan data telah diserahkan kepada murid B40 di 910 sekolah seluruh negara. Manakala, 16, 577 unit telah diterima daripada Yayasan Hasanah dan akan diagihkan kepada murid dalam masa terdekat. Baki 21, 067 unit lagi akan diagihkan sebaik sahaja diterima daripada Yayasan Hasanah.

Bagi daerah Sibu, sebanyak 884 unit peranti dilengkapi dengan pelan data telah selesai diagihkan kepada murid B40 di empat (4) buah sekolah.

Peranti CERDIK diagihkan kepada semua murid warganegara Malaysia golongan B40 kohort Tahun Empat (4), Sekolah Rendah dan Tingkatan Tiga (3), Sekolah Menengah di Sekolah Kerajaan (SK) dan Sekolah Bantuan Kerajaan (SBK) di bawah Kementerian tahun ini. Pemilihan sekolah adalah berdasarkan peratus murid golongan B40 tertinggi di setiap pejabat pendidikan daerah (PPD) dan negeri. Kementerian mengenal pasti senarai murid golongan B40 berdasarkan data murid di Kementerian dan senarai murid ini akan disahkan semula oleh sekolah sebelum agihan dilaksanakan bagi memastikan tiada keciciran murid layak terjadi.



**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN WONG CHEN [SUBANG]**

**TARIKH : 23 SEPTEMBER 2021 (KHAMIS)**

**SOALAN**

**TUAN WONG CHEN [ SUBANG ]** minta **MENTERI KEWANGAN** menyatakan impak negatif pengeluaran Kumpulan Wang Simpanan Pekerja (KWSP) i-Sinar dan iCitra terhadap kemampuan KWSP untuk membeli Sekuriti Kerajaan Malaysia (MGS).

**JAWAPAN**

Tuan Yang di-Pertua,

1. Untuk makluman Ahli Yang Berhormat, pengeluaran i-Sinar dan i-Citra tidak memberi impak negatif kepada kemampuan Kumpulan Wang Simpanan Pekerja (KWSP) untuk membeli Sekuriti Kerajaan Malaysia (MGS) dengan jangkaan pembelian bersih MGS untuk tahun 2021 konsisten dengan purata pembelian bersih tiga tahun yang lepas tertakluk kepada kedudukan pelaburan dan keperluan pengimbangan portfolio serta peluang pasaran dan isuan semasa. Keperluan tunai untuk pengeluaran oleh ahli KWSP ini ditampung oleh baki tunai pembukaan KWSP pada tahun 2021, aliran tunai daripada kutipan caruman ahli, aliran masuk instrumen pelaburan yang telah matang, pendapatan pelaburan dan pendapatan-pendapatan lain.
2. Aktiviti pembelian dan penjualan instrumen pelaburan termasuk MGS adalah sebahagian daripada aktiviti pengimbangan semula portfolio pelaburan berpandukan Alokasi Aset Strategik (SAA) yang bertujuan untuk menguruskan kecairan serta menjana keuntungan untuk pembayaran dividen kepada ahli. Pendekatan pelaburan yang berdisiplin ini telah membantu KWSP untuk mengurangkan impak pengeluaran yang besar ke atas pelaburan serta memastikan prestasi pelaburan yang kukuh dapat dikekalkan.
3. KWSP kekal komited untuk melindungi simpanan persaraan ahli dengan memelihara dan meningkatkan nilai simpanan mereka, dan pada masa yang sama memainkan peranan yang aktif sebagai sebagai pelabur utama dalam pasaran modal domestik.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN AHMAD FAHMI BIN MOHAMED FADZIL  
[ LEMBAH PANTAI ]**

**TARIKH : 23 SEPTEMBER 2021 (KHAMIS)**

**SOALAN**

**TUAN AHMAD FAHMI BIN MOHAMED FADZIL** minta **MENTERI KANAN PENDIDIKAN** menyatakan jumlah pelajar Tahun 1 hingga Tingkatan 5 yang telah tercicir sejak bermulanya pandemik COVID-19 pada 2020, serta strategi yang akan dilaksanakan Kementerian untuk memastikan pendidikan anak-anak ini tidak ditinggalkan.

**JAWAPAN**

**Tuan Yang di-Pertua,**

Kementerian Pendidikan Malaysia (KPM) mendefinisikan keciciran daripada sistem pendidikan sebagai situasi dimana murid warganegara Malaysia yang berada dalam sistem pendidikan (bersekolah) tetapi keluar daripada sistem sebelum tamat/menghabiskan tempoh pendidikan.

Kadar murid cicir di Malaysia pada peringkat sekolah rendah menurun daripada 0.15 peratus pada tahun 2018 kepada 0.12 peratus pada tahun 2019. Manakala kadar murid cicir peringkat sekolah menengah menurun daripada 1.21 peratus pada tahun 2018 kepada 1.14 peratus pada tahun 2019. Data murid cicir tahun 2020 menunjukkan bahawa kadar murid cicir pada peringkat sekolah rendah adalah 0.10 peratus. Manakala kadar murid cicir pada peringkat sekolah menengah adalah 1.13 peratus. Data keciciran bagi tahun 2021 akan dikeluarkan sebelum akhir tahun ini.

Untuk makluman Ahli Yang Berhormat, KPM menyedari bahawa pandemik COVID-19 memberi kesan kepada pembelajaran murid terutamanya apabila mereka tidak dapat hadir ke sekolah secara bersemuka. Oleh yang demikian, selain daripada keciciran daripada sistem pendidikan, KPM turut melihat keciciran dalam konteks penguasaan pembelajaran.

Bagi memastikan tiada murid yang tercicir dalam pembelajaran semasa penutupan sesi persekolahan bersemuka, KPM telah melaksanakan Pengajaran dan Pembelajaran di Rumah (PdPR). PdPR dilaksanakan melalui tiga pendekatan iaitu secara dalam talian (*online*), di luar talian (*off-line*) dan *off-site* mengikut kesesuaian guru dan murid.

Bagi memantau penyertaan murid dalam PdPR, KPM telah membangunkan Sistem Pelaporan Pengajaran dan Pembelajaran di Rumah (SPdPR). Sistem ini membolehkan penyertaan murid dipantau secara *real-time*. Hal ini membolehkan pihak sekolah melaksanakan intervensi yang bersesuaian bagi memastikan keterlibatan murid adalah secara optimum.

Selain daripada itu, sewaktu sesi persekolahan dibuka semula sebelum ini, guru telah membuat pengesanan terhadap tahap penguasaan kemahiran murid. Ini membolehkan guru merancang dan melaksanakan intervensi yang bersesuaian.

KPM juga telah melaksanakan penjajaran kandungan kurikulum mata pelajaran. Penjajaran kurikulum mata pelajaran difokuskan kepada Kandungan Asas (KA) supaya murid dapat disediakan untuk pembelajaran peringkat seterusnya. Kandungan Tambahan (KT) dan Kandungan Pelengkap (KP) pula boleh dilaksanakan mengikut keupayaan murid.

Bagi memperkasakan pelaksanaan kurikulum, KPM juga menambah baik sokongan pembelajaran dengan memperkenalkan Program Pemerkasaan Pelaksanaan Kurikulum (KPMPerkasaKU). Program KPMPerkasaKU dirangka dengan tujuan memastikan pembelajaran pemulihan bagi murid yang belum menguasai literasi dan numerasi. Di samping itu juga, program ini menyediakan pelbagai

sokongan bagi mengukuh dan memperkayakan penguasaan kandungan mata pelajaran. Program ini melibatkan murid sekolah rendah dan sekolah menengah.

Selain itu, KPM juga telah memperkenalkan semula siaran TV Pendidikan. Murid boleh mengikuti pelbagai rancangan TV Pendidikan melalui saluran DidikTV KPM, TV Okey RTM dan Tutor TV Astro. Kandungan yang disediakan adalah berdasarkan kepada kurikulum peringkat prasekolah hingga ke tingkatan enam. Di samping itu, kandungan rancangan TV Pendidikan turut memuatkan slot yang berkaitan kokurikulum.

KPM turut menambah lebih banyak bahan PdP melalui *Digital Educational Learning Initiative Malaysia* (DELIMa). Pelantar ini merupakan pusat rujukan sehenti yang mengandungi pelbagai aplikasi, perkhidmatan dan sumber pendidikan digital. Sehingga kini, 3,245 video kurikulum, 324 video pedagogi dan 1,761 video DidikTV telah dimuat naik di pelantar DELIMa.

Untuk makluman Ahli Yang Berhormat, KPM menyedari bahawa sesi persekolahan secara bersemuka untuk tahun 2020 dan tahun 2021 tidak dapat dilaksanakan sepertimana kebiasaan. Justeru, KPM telah membuat ketetapan untuk melanjutkan sesi persekolahan tahun 2021 sehingga bulan Februari 2022. Pelanjutan sesi ini membolehkan pihak sekolah merancang dan melaksanakan aktiviti pemulihan, pengukuhan dan pengayaan secara intensif bagi meningkatkan kesediaan murid untuk mengikuti tahun persekolahan berikutnya.

KPM yakin kerangka holistik yang dirancang dan dilaksanakan ini membolehkan murid mengikuti PdP secara berkesan, seterusnya dapat menangani keciciran murid dan memastikan mereka kekal dalam sistem pendidikan negara.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN TAN KOK WAI [CHERAS]**

**TARIKH : 23 SEPTEMBER 2021 (KHAMIS)**

**SOALAN**

**TUAN TAN KOK WAI [ CHERAS ]** minta **MENTERI KEWANGAN** menyatakan sebab Ericsson dipilih berbanding dengan Huawei Technologies untuk mereka dan membina jaringan telekomunikasi 5G.

**JAWAPAN**

Tuan Yang di-Pertua,

1. **Kerajaan tidak terlibat dalam proses pemberian kontrak 5G bernilai RM11 bilion.** Sebagai sebuah entiti undang-undang yang berasingan, proses tender rangkaian 5G telah dilaksanakan di peringkat syarikat. Dalam hal ini, Digital Nasional Berhad (DNB) telah mengambil langkah untuk melaksanakan amalan tadbir urus perolehan terbaik dan menjamin ketelusan dalam penilaian, cadangan serta proses keseluruhan tender.

2. Proses Tender 5G telah bermula pada April tahun ini dengan **empat belas (14) buah syarikat pembekal perkakasan rangkaian (“Network Equipment Provider” atau NEP) global telah dikenalpasti** melalui tinjauan pasaran. Daripada senarai tersebut, **lapan (8) buah NEP telah dijemput untuk mengemukakan Pelawaan Tunjuk Minat (“Expression of Interest” atau EOI)** berdasarkan dua (2) kriteria, iaitu:

- a) Pengalaman melaksanakan rangkaian 5G yang telah terbukti; dan
- b) *Local presence* dengan izin atau mempunyai operasi di Malaysia.

3. Daripada lapan (8) buah NEP yang dijemput untuk mengambil bahagian dalam Pelawaan Tawaran (“Request for Proposal” atau RFP), **hanya empat (4) buah NEP yang telah mengemukakan tawaran.**

4. **Proses penilaian tender** telah dilaksanakan pada Mei dan Jun 2021 berdasarkan nasihat daripada firma perunding antarabangsa Ernst & Young Consulting Sdn Bhd melibatkan lebih daripada 50 para profesional industri dan pakar bebas daripada lebih 10 buah negara.

Tuan Yang di-Pertua,

5. **Tiga kriteria iaitu teknikal (55%), komersial (30%) dan sosio-ekonomi (15%)** telah ditetapkan untuk menentukan pembida yang berjaya. **Ericsson telah mendapat penilaian tertinggi bagi ketiga-tiga kriteria tersebut.**

6. Dari segi **teknikal**, Ericsson telah mencadangkan rangkaian yang kalis masa depan ("*future-proof*") dan mampan, dengan fungsi-fungsi siber keselamatan yang jitu untuk memenuhi objektif DNB mencapai liputan 80% kawasan berpenduduk pada tahun 2024.

7. Dari segi **komersial**, Ericsson telah menawarkan harga paling kompetitif manakala dari segi **sosio-ekonomi**, Ericsson telah memberi komitmen kepada program pembangunan sosio-ekonomi paling berimpak, termasuk penggunaan vendor tempatan dan Bumiputera.

8. Perancangan, pembinaan dan penyelenggaraan rangkaian 5G nasional dengan penglibatan Ericsson sebagai NEP dianggarkan **melibatkan kos sebanyak RM11 bilion**. Jumlah ini adalah kira-kira **RM700 juta lebih rendah berbanding jumlah kos pembida terhampir selepas Ericsson**. Walau bagaimanapun, **harga perbandingan kesemua pembida tidak boleh dinyatakan secara terus atas obligasi kerahsiaan yang telah ditetapkan dalam tender yang telah dijalankan**.

9. Daripada RM11 bilion kos rangkaian 5G, sebanyak **RM4 bilion melibatkan kos perkakasan rangkaian, perkhidmatan pelaksanaan, serta penyelenggaraan berterusan dan pengurusan rangkaian oleh Ericsson yang merupakan kos terendah dalam kalangan pembida**. Sementara itu, baki sebanyak kira-kira **RM7 bilion pula adalah berkaitan dengan kos infrastruktur rangkaian daripada pihak-pihak yang lain seperti kos menara telekomunikasi, gentian telekomunikasi, kuasa elektrik serta lain-lain kos bagi tempoh sepanjang 10 tahun**.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : PUAN HAJAH NATRAH BINTI ISMAIL  
[ SEKIJANG ]**

**TARIKH : 23 SEPTEMBER 2021**

**SOALAN**

**PUAN HAJAH NATRAH BINTI ISMAIL [ SEKIJANG ]** minta **MENTERI KANAN PENDIDIKAN** menyatakan jumlah guru khusus yang mengajar anak-anak autisme di sekolah-sekolah yang menyediakan kelas pendidikan khas. Adakah jumlah guru dan peralatan am yang diperlukan mencukupi untuk kelas tersebut.

**JAWAPAN**

**Tuan Yang di-Pertua,**

Kementerian Pendidikan Malaysia (KPM) menyediakan pendidikan khas kepada murid berkeperluan khas (MBK) yang terdiri daripada enam kategori berdasarkan Peraturan-Peraturan Pendidikan (Pendidikan Khas) 2013, iaitu:

- a. ketidakupayaan penglihatan;
- b. ketidakupayaan pendengaran;
- c. ketidakupayaan fizikal;
- d. ketidakupayaan pertuturan;
- e. masalah pembelajaran; atau
- f. mana-mana kombinasi ketidakupayaan atau ketidakupayaan dan masalah, yang disebut dalam perenggan (a) hingga (e).

Autisme merupakan sub-kategori masalah pembelajaran. Dalam hal ini, KPM menyediakan guru opsyen masalah pembelajaran bagi mengajar MBK autisme. Data pada 30 Jun 2021 menunjukkan seramai 195 orang guru pendidikan khas mengajar di kelas prasekolah masalah pembelajaran, 8,278 orang guru mengajar kelas masalah pembelajaran di sekolah rendah dan 5,758 orang guru mengajar kelas masalah pembelajaran di sekolah menengah.

Analisis keperluan guru pendidikan khas pada 1 Julai 2021 bagi kategori masalah pembelajaran menunjukkan kekurangan guru di sekolah rendah sebanyak 360 orang dan 786 orang bagi sekolah menengah. Pengisian guru tersebut akan dapat dilaksanakan selepas pengambilan guru secara *one-off* pada tahun ini selesai.

KPM juga memastikan MBK autisme mempunyai peralatan yang mencukupi bagi membantu mengoptimumkan potensi mereka dengan mengambil kira aspek sosial, komunikasi dan tingkah laku. Di antara peralatan khusus yang diperlukan adalah seperti *Go Talk*, *Dr. Speech*, *Picture Exchange Communication System* (PECS), kusyen, trampoline, bola gim, pundi kacang, blok, pemasa visual, *fidget toys*, bola pelbagai tekstur dan saiz, puzzle, papan condong dan papan magnetik.

Bagi tujuan ini, KPM membekalkan peralatan tersebut menggunakan peruntukan harta modal. KPM juga menyalurkan peruntukan bantuan Geran Per Kapita (PCG) kepada sekolah untuk membeli peralatan mengikut keperluan dan kesesuaian MBK autisme.



**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT  
PARLIMEN KEEMPAT BELAS**

**PERTANYAAN : LISAN**

**DARIPADA : DR. LEE BOON CHYE [GOPENG]**

**TARIKH : 23 SEPTEMBER 2021 (KHAMIS)**

**SOALAN**

**DR. LEE BOON CHYE [ GOPENG ]** minta **MENTERI KEWANGAN** menyatakan bagaimana Kerajaan melaksanakan cukai ke atas e-rokok sedangkan perjualan e-rokok sebagai komoditi masih belum diluluskan.

**JAWAPAN**

Tuan Yang di-Pertua,

1. Untuk makluman Ahli Yang Berhormat, penggunaan rokok elektronik termasuk vape telah bermula di Malaysia seawal tahun 2013 dan semakin berleluasa pada tahun 2015. Berikutan itu, sejak tahun 2016 Kerajaan mengambil pendirian untuk mengawal selia rokok elektronik dan vape tanpa nikotin berdasarkan kawal selia rokok dan produk tembakau yang dilaksanakan oleh Kementerian Kesihatan Malaysia (atau KKM) di bawah Peraturan-Peraturan Kawalan Hasil Tembakau 2004.

2. Kementerian Perdagangan Dalam Negeri dan Hal Ehwal Pengguna juga telah mengeluarkan Garis Panduan Aktiviti Pengeluaran, Pendedaran Dan Peruncitan Peranti Serta Cecair Rokok Elektronik Tanpa Nikotin yang berkuatkuasa mulai 1 April 2018 sebagai panduan kepada pihak yang terlibat dalam aktiviti pengeluaran, pendedaran dan peruncitan peranti serta cecair rokok elektronik tanpa nikotin di negara ini. Selain itu, Jabatan Standard Malaysia turut berusaha membangunkan

standard bagi peranti rokok elektronik termasuk vape, bateri dan pembungkusan cecair tanpa nikotin.

3. Seterusnya melalui Belanjawan 2021, Kerajaan telahpun mengumumkan pengenaan duti eksais ke atas peranti dan cecair rokok elektronik termasuk vape berkuatkuasa mulai 1 Januari 2021. Peranti rokok elektronik dikenakan duti eksais pada kadar 10 peratus. Manakala cecair atau gel tanpa nikotin yang digunakan dalam rokok elektronik termasuk vape dikenakan duti eksais pada kadar 40 sen per mililiter. Kedua-dua produk peranti dan cecair tanpa nikotin ini juga adalah tertakluk kepada cukai jualan pada kadar 10 peratus.

4. Cecair atau gel mengandungi nikotin yang digunakan dalam rokok elektronik termasuk vape tidak dikenakan duti eksais kerana nikotin merupakan racun Kumpulan C di bawah Akta Racun 1952. Sehingga kini, penjualan cecair bernikotin kekal dilarang dan dikawal selia oleh KKM di bawah Akta Racun 1952 dan Akta Jualan Dadah 1952. Penjualan cecair bernikotin pula hanya dibenarkan oleh ahli farmasi berlesen dan pengamal perubatan berdaftar untuk tujuan rawatan perubatan.

5. Namun sekiranya Kerajaan berhasrat untuk mengawal selia rokok elektronik dan vape yang bernikotin secara menyeluruh termasuk melalui medium percukaian, kajian terperinci perlu dilaksanakan terlebih dahulu yang meliputi aspek kawal selia penjualan, penggunaan dan keselamatan produk serta penyediaan garis panduan yang jelas sebelum sebarang cadangan pengenaan cukai dapat dilaksanakan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATUK SERI SHAMSUL ISKANDAR @ YUSRE  
BIN MOHD AKIN [ HANG TUAH JAYA ]**

**TARIKH : 23 SEPTEMBER 2021 (KHAMIS)**

**SOALAN**

Minta **MENTERI PENGAJIAN TINGGI** menyatakan apakah status pengajaran dan pembelajaran untuk mahasiswa di IPTA dan IPTS dan apakah perancangan Kementerian untuk mengembalikan semula sesi pembelajaran agar mahasiswa dapat kembali di universiti masing-masing dengan pengamalan norma baru memandangkan ramai mahasiswa berhadapan dengan masalah tekanan susulan isu kematian mahasiswa yang berlaku baru-baru ini.

**JAWAPAN**

Tuan Yang di-Pertua,

Kementerian Pengajian Tinggi (KPT) sentiasa prihatin terhadap kebajikan dan kesejahteraan pelajar dalam melaksanakan Pengajaran dan Pembelajaran (PdP) dalam talian. Sebagai respons strategik kepada perkara ini, KPT komited dalam memberikan perhatian terhadap pengukuhan infrastruktur dengan menambah baik rangkaian yang melibatkan liputan internet dan pelan data serta peranti yang berpatutan. KPT turut mengambil langkah menaik taraf *Malaysian Research & Education Network* (MYREN) dengan meningkatkan kebolehcapaian internet sehingga 10Gbps.

Selain daripada itu, KPT melalui MQA telah menyediakan panduan pengendalian PdP kepada semua IPT untuk membantu memudah cara proses PdP semasa pandemik. Dengan adanya panduan ini, IPT mempunyai fleksibiliti untuk melaksanakan PdP secara dalam talian sehingga 100% kandungan program, tertakluk kepada kesesuaian kursus bagi semua program yang ditawarkan. IPT juga boleh merangka aktiviti praktikal atau amali dalam talian yang bersesuaian seperti *virtual simulation*, *virtual lab*, *augmented reality*, *virtual reality* dan sebagainya.

IPT turut dibenarkan untuk menganjukkan pelaksanaan PdP secara bersemuka yang tidak boleh digantikan dengan kaedah dalam talian ke minggu pembelajaran atau semester lain. Pada masa yang sama, usaha pemerkasaan IPT dalam memperkukuh program akademik berbentuk *Open Distance Learning* dan penawaran kursus secara *micro-credential* turut sedang dilaksanakan.

Dari aspek kebajikan serta kesejahteraan mental dan emosi mahasiswa, KPT telah dan sedang melaksanakan beberapa inisiatif yang bersesuaian seperti menyediakan perkhidmatan kaunseling; mengadakan program berkaitan kaunseling dan pengurusan emosi; melaksanakan program sokongan psikososial; serta membangunkan modul kesihatan mental pelajar IPT sebagai garis panduan menangani kes kesihatan mental.

Dalam upaya untuk memastikan kelestarian kualiti pendidikan tinggi negara dengan meletakkan keselamatan dan kebajikan pelajar sebagai keutamaan, KPT akan melaksanakan kemasukan berperingkat pelajar secara fizikal ke kampus bermula pada 15 Oktober 2021. Kemasukan pelajar ini adalah seperti yang diluluskan oleh Majlis Keselamatan Negara pada 2 September 2021. Untuk makluman, kemasukan pelajar ke IPT kali ini melibatkan semua kategori pelajar di semua IPT. Kebenaran melaksanakan PdP secara bersemuka ini sekaligus diharap dapat mengurangkan tekanan terhadap emosi dan psikologi pelajar kesan daripada pelaksanaan PdP dalam talian yang berpanjangan selama tempoh pandemik ini.

Dalam hubungan ini, KPT, dengan kerjasama Badan Bertindak Imunisasi COVID-19 (CITF), sedang giat melaksanakan Program VACC2Campus bagi meningkatkan jumlah warga IPT yang mendapat vaksinasi lengkap sebelum kampus dibuka. Melalui langkah ini, bilangan pelajar IPT yang telah lengkap vaksin akan ditingkatkan dan ini memberikan mereka peluang untuk segera kembali ke kampus.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN NGA KOR MING [TELUK INTAN]**

**TARIKH : 23 SEPTEMBER 2021 (KHAMIS)**

**SOALAN**

**TUAN NGA KOR MING [ TELUK INTAN ]** minta **MENTERI KEWANGAN** menyatakan adakah Kerajaan berhasrat memperkenalkan semula cukai GST dan jadual masa yang sedang dirancang untuk mengatasi masalah defisit kewangan negara yang semakin meruncing.

**JAWAPAN**

Tuan Yang Di-Pertua,

Untuk makluman Ahli Yang Berhormat, Kerajaan masih mengkaji kesesuaian melaksanakan Cukai Barang dan Perkhidmatan (atau GST) dan model-model cukai kepenggunaan yang lain dengan mengambil kira semua aspek. Ini termasuklah kelemahan sistem cukai jualan dan cukai perkhidmatan sedia ada serta kelemahan sistem GST yang dilaksanakan pada tahun 2015.

Kajian ini akan meliputi kesan ke atas ekonomi, kos sara hidup, kesan cukai ke atas harga barang serta keupayaan menangani kegiatan ekonomi gelap. Cukai baharu tersebut jika dilaksanakan juga perlu bersifat mudah ditadbir dan tidak meningkatkan kos perniagaan di samping dapat mengukuhkan kedudukan fiskal negara.

Sepertimana Ahli Yang Berhormat sedia maklum, ekonomi negara sedang dalam fasa pemulihan. Kerajaan memahami bahawa pengenalan sebarang bentuk cukai baharu dalam keadaan ekonomi sedemikian bukan sahaja akan membebankan rakyat, malah berisiko untuk merencatkan momentum pemulihan ekonomi yang sedang berlangsung. Untuk itu, pelaksanaan sebarang bentuk cukai kepenggunaan perlu mengambil kira senario semasa. Di samping itu, ia juga memberi ruang bagi persiapan dan persediaan yang rapi di kedua-dua pihak Kerajaan dan pembayar cukai. Bagi mengurangkan tekanan ke atas defisit kewangan negara, pelbagai langkah alternatif sedang diambil oleh Kerajaan untuk memperbaiki kutipan hasil berdasarkan pengenalan cukai sedia ada, dan dalam masa yang sama berusaha mengurangkan ketirisan hasil Kerajaan.

**PEMBERITAHUAN PERTANYAAN JAWAB LISAN  
DEWAN RAKYAT MESYUARAT PERTAMA, PENGGAL KEEMPAT  
PARLIMEN KEEMPAT BELAS**

---

**PERTANYAAN : JAWAB LISAN**

**DARIPADA : YB TUAN CHANG LIH KANG  
[ TANJONG MALIM ]**

**TARIKH : 23 SEPTEMBER 2021 (KHAMIS)**

**SOALAN**

**TUAN CHANG LIH KANG [ TANJONG MALIM ]** minta **MENTERI PEMBANGUNAN WANITA, KELUARGA DAN MASYARAKAT** menyatakan prosedur JKM dalam memantau keadaan kanak-kanak atau remaja OKU dalam penjagaan rumah kebajikan. Nyatakan berapa tenaga kerja yang terlibat dalam membuat lawatan berkala ke rumah-rumah kebajikan tersebut.

**JAWAPAN**

Tuan Yang di-Pertua,

Kementerian Pembangunan Wanita, Keluarga dan Masyarakat (KPWK) melalui Jabatan Kebajikan Masyarakat (JKM) sentiasa melakukan pemeriksaan pemantauan ke atas Pusat Jagaan yang berdaftar sekurang-kurangnya sekali bagi setiap 6 bulan. Ini bagi memastikan semua pusat jagaan ini sentiasa mematuhi standard minimum yang telah ditetapkan sebagaimana dinyatakan di dalam Akta Pusat Jagaan 1993 dan Peraturan-Peraturan Pusat Jagaan 1994. Mulai Januari hingga Julai 2021, sebanyak 868 kali pemeriksaan telah dilakukan ke atas pusat jagaan berdaftar.

Seramai 1,313 orang Pegawai Diberi Kuasa yang dilantik sebagaimana peruntukan Akta Pusat Jagaan 1993 terlibat dalam membuat pemeriksaan berkala ke atas pusat jagaan berdaftar. Pegawai Diberi Kuasa ini adalah pegawai yang telah diberikan latihan dan kepakaran bagi melakukan pemeriksaan, pemantauan dan penguatkuasaan ke atas pusat jagaan.

Selain daripada itu, JKM telah melaksanakan Sistem Penilaian Kendiri Pengendali Pusat Jagaan (mySACC) bagi mengawal kualiti dan standard minimum sesebuah pusat jagaan. Sistem ini bertujuan membolehkan pengendali Pusat Jagaan membuat penilaian kendiri terhadap pengurusan dan pengoperasian Pusat Jagaan mengikut suatu tempoh yang ditetapkan iaitu sekurang-kurang dua (2) kali setahun. Sehingga kini, seramai 1,401 pengendali pusat jagaan telah melaksanakan penilaian kendiri melalui sistem mySACC ini.

JKM menjalinkan kerjasama bersepadu bersama agensi teknikal seperti Pihak Berkuasa Tempatan, Jabatan Bomba dan Penyelamat dan Jabatan Kesihatan dalam memastikan pengoperasian Pusat Jagaan menepati semua syarat yang telah ditetapkan. Mesyuarat inter agensi di peringkat Negeri dan Daerah turut diadakan dua kali setahun bagi menyelesaikan isu-isu berkaitan pendaftaran dan penguatkuasaan ke atas Pusat Jagaan.

Bagi memastikan penghuni terutama kanak-kanak termasuk remaja OKU yang ditempatkan di pusat jagaan mendapat hak dan kebajikan yang sewajarnya pemeriksaan yang dijalankan akan melihat kepada pelbagai aspek sebagaimana dinyatakan di dalam Peraturan-Peraturan Pusat Jagaan 1994. Antara aspek utama yang terkandung dalam peraturan ini adalah:

- i. rekod kesihatan setiap penghuni hendaklah direkodkan;
- ii. program aktiviti harian meliputi kemudahan latihan, aktiviti agama dan rekreasi, kemudahan rawatan dan terapi; dan
- iii. penyediaan makanan dan minuman yang disediakan hendaklah sempurna, bersih dan mencukupi.

Mana-mana pengendali pusat jagaan yang melanggar atau gagal mematuhi mana-mana peruntukan Peraturan ini adalah melakukan suatu kesalahan. Apabila disabitkan, boleh didenda tidak melebihi sepuluh (10) ribu ringgit atau dipenjarakan selama tempoh tidak melebihi enam (6) bulan atau kedua-duanya sekali. Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KETIGA,  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : PUAN JUNE LEOW HSIAD HUI  
[ HULU SELANGOR ]**

**TARIKH : 23 SEPTEMBER 2021 (KHAMIS)**

**SOALAN**

minta **MENTERI KOMUNIKASI DAN MULTIMEDIA** menyatakan usaha Kementerian meningkatkan akses kepada pengajaran atas talian isi rumah B40 yang tidak mampu menyediakan kemudahan pintar untuk kanak-kanak sepanjang tempoh Perintah Kawalan Pergerakan (PKP).

**JAWAPAN**

Tuan Yang Dipertua,

Untuk makluman Ahli Yang Berhormat, pandemik COVID-19 ini telah mewujudkan kebergantungan kepada Internet yang tinggi di kalangan rakyat terutamanya para pelajar sama ada di kawasan bandar mahupun luar bandar. Kerajaan dengan kerjasama Suruhanjaya Komunikasi dan Multimedia Malaysia (SKMM) telah mengambil beberapa inisiatif dalam menghasilkan sebuah rancangan yang dapat menangani isu akses kepada Internet berkualiti bagi perkhidmatan tetap dan mudah alih termasuk Pengajaran dan Pembelajaran di Rumah (PdPR).

Pihak SKMM bersama-sama dengan syarikat telekomunikasi telah pun menjalankan pelbagai program dan inisiatif supaya rakyat Malaysia terus berpeluang menikmati perkhidmatan internet. Antara lain, pemberi perkhidmatan mudah alih utama menawarkan internet secara percuma sebanyak 1GB setiap hari (bersamaan 30GB data percuma setiap bulan) bermula dari 1 April 2020 di bawah Pakej Rangsangan Ekonomi Prihatin Rakyat (PRIHATIN), yang kini dilanjutkan sehingga akhir tahun 2021 di bawah Pakej Perlindungan Rakyat dan Pemulihan Ekonomi (PEMULIH). Penggunaan data percuma 1GB ini terhad kepada aktiviti produktiviti dan khusus untuk tujuan pengajaran dan pembelajaran atas talian.

Sebanyak 873 Pusat Internet Komuniti (PIK) yang telah tersedia di kawasan miskin bandar, pinggir bandar dan luar bandar juga boleh dimanfaatkan oleh orang ramai terutamanya para pelajar dalam memastikan proses PdPR berjalan lancar sebagai persediaan menghadapi peperiksaan besar seperti SPM dan STPM. Untuk makluman Yang Berhormat juga, terdapat 42 PIK sedang beroperasi di negeri Selangor.

**Inisiatif-inisiatif Peranti semasa Pandemik Covid-19**

Bagi memastikan golongan pelajar dari kumpulan B40 tidak ketinggalan dalam mengharungi arus digitalisasi, Kerajaan turut melancarkan **Pakej Jaringan Prihatin** yang dirangka bagi membantu

mengupayakan seramai 8.5 juta rakyat Malaysia dari kumpulan B40 termasuk para pelajar untuk mengadaptasi dan terlibat dalam agenda transformasi digital negara. Keluarga kumpulan B40 mampu memiliki telefon pintar ataupun menikmati bantuan pelan jalur lebar Internet untuk digunakan bagi aktiviti seharian dan pendidikan. Bantuan RM180 atau RM300 untuk keluarga kumpulan B40 yang mempunyai anak berusia bawah 18 tahun boleh digunakan sebagai deposit mendapatkan telefon pintar atau sebagai subsidi langganan data RM15 sebulan bagi tempoh 12 bulan yang akan disalurkan melalui akaun-akaun prabayar atau pasca bayar yang berdaftar dengan syarikat telekomunikasi. Sokongan berterusan untuk pakej Jaringan Prihatin ini telah dilanjutkan sehingga 30 September 2021 ini untuk golongan B40.

**Pakej Peranti RM1 Malaysia Prihatin** yang diperkenalkan oleh Kerajaan baru-baru ini merupakan satu lagi inisiatif yang akan membolehkan semua warganegara Malaysia untuk memiliki/menaik taraf peranti mudah alih terpilih yang bertaraf 4G VoLTE, pada harga mampu milik bermula dari RM1.

Selain itu, pembekalan 150,000 unit peranti digital kepada 150,000 orang murid B40 sedang giat dilaksanakan melalui **inisiatif CERDIK**. Inisiatif CERDIK ini dilancarkan supaya penyampaian pembelajaran dalam talian dapat dicapai oleh semua golongan murid dan seterusnya merapatkan jurang digital di kalangan generasi muda negara. Peranti digital di bawah Inisiatif CERDIK ini dibiayai penuh oleh syarikat berkaitan kerajaan (GLC) dan syarikat pelaburan berkaitan kerajaan (GLIC).

**Inisiatif MYBAIKHATI** turut dilaksanakan bagi mengumpul dan membaik pulih peranti komunikasi terpakai untuk keluarga dari B40. Ia merupakan antara fokus program PEMERKASA bagi memperkukuh daya saing negara untuk mengurangkan jurang digital.

Pada 15 September 2021 lalu, Kementerian telah mengumumkan pakej baharu untuk membantu golongan remaja dan pelajar memperoleh akses Internet dan bagi semua terutamanya golongan yang kurang berkemampuan, peranti pintar yang mampu milik.

Pakej Remaja Keluarga Malaysia adalah pakej prabayar khusus untuk golongan remaja dan pelajar termasuk pelajar pascasiswazah. Dengan hanya RM10/sebulan (Dibayar untuk 3 bulan/RM30), mereka akan mendapat data 20GB untuk tiga (3) bulan. Selain itu, turut diberikan adalah data 1GB (Jumlah 90GB) percuma untuk aktiviti produktiviti setiap hari serta Internet asas tanpa had. Dengan pakej ini, pengguna boleh melakukan aktiviti seperti penghantaran mesej dan melayari Internet. Manakala, bagi data produktiviti, pembelajaran dalam talian serta aktiviti bekerja dari rumah boleh dilakukan tanpa kekangan data.

Turut disediakan adalah pakej baharu untuk mampu milik peranti iaitu Pakej Peranti Keluarga Malaysia. Pakej Peranti Keluarga Malaysia akan membolehkan rakyat Malaysia memiliki atau menaik taraf kepada peranti mudah alih dan VoLTE secara percuma. Peranti tersebut dapat dimiliki dengan langganan serendah RM40 sebulan melalui kontrak selama 12 hingga 24 bulan tertakluk kepada jenis peranti dan perkhidmatan yang dilanggan. Pakej ini termasuk 1GB data percuma untuk aktiviti produktiviti. Setiap pengguna yang layak boleh melanggan sehingga dua (2) pakej dengan mendaftar kad pengenalan yang sama. Adalah diharapkan agar lebih ramai ahli keluarga mendapat manfaat sempurna daripada pemilikan peranti mudah alih 4G dan VoLTE ini, untuk melengkapkan pengalaman Internet mereka. Tempoh mendaftar untuk kedua-dua pakej tersebut adalah mulai 15 Oktober 2021 hingga 15 April 2022.

Kerajaan yakin dengan pakej-pakej yang direncanakan ini, Keluarga Malaysia bukan sahaja akan menikmati kesalinghubungan yang lebih baik bahkan juga harga yang mampu milik dan tahap penyampaian yang lebih berkualiti.



**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN CHA KEE CHIN [ RASAH ]**

**TARIKH : 23 SEPTEMBER 2021 (KHAMIS)**

**SOALAN**

**TUAN CHA KEE CHIN** minta **MENTERI KANAN PENDIDIKAN** menyatakan apakah faktor-faktor yang diambil kira oleh Kementerian dalam membenarkan pembukaan semula sekolah secara fizikal, khususnya dari segi kadar imunisasi, kes harian dan kesiapsiagaan agar tidak berlaku banyak sekolah terpaksa ditutup beberapa hari kerana kes positif seperti mana yang berlaku pada April 2021.

**JAWAPAN**

**Tuan Yang di-Pertua,**

Kementerian Pendidikan Malaysia (KPM) telah merangka satu pelan komprehensif pembukaan semula sekolah bagi memastikan murid dapat kembali belajar secara bersemuka di sekolah dalam keadaan selamat.

Dalam merangka pelan ini, KPM telah mengadakan sesi libat urus yang menyeluruh bagi mendapatkan input, pandangan serta cadangan berhubung pembukaan semula sesi persekolahan. Sesi libat urus ini melibatkan kumpulan pentadbir sekolah, guru dan juga wakil Persatuan Ibu Bapa dan Guru (PIBG) di negeri Perlis, Negeri Sembilan, Sarawak serta Wilayah Persekutuan Labuan. KPM juga telah mengadakan sesi libat urus melibatkan kumpulan pakar dari sektor kesihatan awam, pendidikan, psikologi kanak-kanak dan pediatrik. Sesi tersebut juga melibatkan wakil Kesatuan Perkhidmatan Perguruan Kebangsaan Malaysia (NUTP), Gabungan Majlis Guru Besar Malaysia dan Majlis Pengetua Sekolah Malaysia. Selain itu, KPM turut mendapatkan pandangan daripada calon Sijil Pelajaran Malaysia (SPM) tahun 2021, termasuk calon dalam kalangan Murid Berkeperluan Khas (MBK).

KPM juga telah membuat analisis amalan terbaik pembukaan semula sekolah di negara-negara lain bagi meneliti pendekatan yang berkesan dalam memastikan pengoperasian sekolah secara bersemuka dapat dilaksanakan dalam keadaan yang selamat.

Berdasarkan input daripada sesi libat urus dan dapatan analisis, KPM telah membuat penambahbaikan kepada kerangka asal pelan komprehensif pembukaan semula sekolah. Kerangka ini kemudiannya diperincikan bersama Kementerian Kesihatan Malaysia (KKM) dan Majlis Keselamatan Negara (MKN).

Mengambil kira situasi semasa, termasuk kadar vaksinasi dalam kalangan guru, anggota kumpulan pelaksana dan pekerja perkhidmatan sokongan serta pandangan KKM dan MKN, KPM telah mengumumkan bahawa sekolah akan dibuka untuk pengajaran dan pembelajaran (PdP)

bersemuka mulai 3 Oktober 2021 bagi negeri kumpulan A dan 4 Oktober 2021 bagi negeri kumpulan B. Pembukaan sekolah dibuat secara berperingkat mengikut fasa dalam Pelan Pemulihan Negara (PPN).

Bagi negeri di Fasa 1 PPN, tiada sekolah yang akan dibuka untuk PdP secara bersemuka. Bagi negeri di Fasa 2 PPN pula, kehadiran murid sekolah rendah secara bersemuka hanya melibatkan MBK di Sekolah Kebangsaan Pendidikan Khas (SKPK) dan Program Pendidikan Khas Integrasi (PPKI). Untuk sekolah menengah di fasa ini, MBK di Sekolah Menengah Kebangsaan Pendidikan Khas (SMKPK), Sekolah Menengah Pendidikan Khas Vokasional (SMPKV) dan Program Pendidikan Khas Integrasi (PPKI) hadir secara bersemuka. Selain itu, murid Tingkatan 6 Semester 2, *International Baccalaureate Diploma* (IBD) Tahun 2, kelas peperiksaan antarabangsa (IGCSE O-Level, A-Level, Australia Higher School Certificate dan IBD) dan Program Prauniversiti Semester 3 di Sekolah Sukan Malaysia (SSM) turut hadir bersemuka. Murid lain akan melaksanakan PdPR.

Bagi negeri di Fasa 3 PPN, murid yang akan hadir ke sekolah adalah semua kumpulan murid di Fasa 2. Selain itu, prasekolah juga akan mula beroperasi. Bagi peringkat sekolah menengah, semua murid kelas peperiksaan awam, kelas peperiksaan antarabangsa dan Program Prauniversiti di SSM juga akan mula hadir ke sekolah. Murid lain akan melaksanakan PdPR.

Bagi negeri di Fasa 4 PPN, murid yang akan hadir ke sekolah adalah semua kumpulan murid di Fasa 3. Untuk sekolah rendah, selepas 2 minggu, murid Tahun 1, 2 dan 3 akan hadir ke sekolah. Selepas 2 minggu berikutnya, murid Tahun 4, 5 dan 6 pula akan mula hadir ke sekolah. Untuk sekolah menengah, selepas 2 minggu, murid Tingkatan 3 dan 4 akan hadir ke sekolah. Selepas 2 minggu berikutnya, murid peralihan, Tingkatan 1 dan 2 pula akan mula hadir ke sekolah.

Untuk makluman Ahli Yang Berhormat, KPM juga mengambil ketetapan untuk mengehadkan kapasiti murid di sekolah pada kadar 50 peratus enrolmen keseluruhan. Bagi tujuan tersebut, kaedah yang digunakan adalah dengan mengehadkan kapasiti murid di dalam kelas kepada 50 peratus daripada jumlah murid dalam kelas tersebut. Justeru,

sistem penggiliran murid hadir ke sekolah mengikut minggu akan dilaksanakan. Kaedah ini diguna pakai untuk semua kelas kecuali:

- i. MBK di SKPK/SMKPK/SMPKV dan PPKI;
- ii. murid di Tingkatan 6 Semester 2 dan IBD Tahun 2;
- iii. murid di sekolah asrama sepenuhnya;
- iv. murid kelas peperiksaan antarabangsa;
- v. murid prasekolah/tadika swasta/pusat perkembangan minda (4-6 tahun); dan
- vi. murid di Sekolah Kurang Murid (kurang 150 murid).

Selain daripada pendekatan di atas, KPM juga telah mengambil beberapa ketetapan lain bagi mewujudkan persekitaran sekolah yang selamat. KPM menetapkan bahawa hanya guru dan Anggota Kumpulan Pelaksana (AKP) yang lengkap divaksin sahaja dibenarkan untuk melaksanakan PdP di dalam kelas dan berinteraksi dengan murid. Selain itu, hanya pekerja perkhidmatan sokongan yang lengkap divaksin sahaja dibenarkan memasuki dan bekerja di dalam kawasan sekolah.

KPM juga memantau rapi kadar vaksinasi warga sekolah yang layak divaksin. Sehingga 20 September 2021, seramai 374,552 orang guru (90.5 peratus) telah lengkap divaksin. Manakala, seramai 57,580 orang anggota kumpulan pelaksana (AKP) (85.8 peratus) telah lengkap divaksin. Selain daripada itu, seramai 93,268 orang pekerja perkhidmatan sokongan (79.2 peratus) melibatkan pekerja kawalan keselamatan, kebersihan, dewan makan, kantin sekolah dan pemandu van sekolah telah lengkap divaksin. KPM sentiasa bekerjasama rapat dengan Pasukan Petugas Khas Imunisasi COVID-19 (CITF) bagi memastikan kadar vaksinasi dalam kalangan guru, AKP dan pekerja perkhidmatan sokongan dapat terus ditingkatkan.

KPM turut mewajibkan pemakaian pelitup muka kepada semua warga sekolah termasuk murid. Murid yang bergejala tidak dibenarkan hadir ke sekolah bagi mengelakkan risiko jangkitan dalam kawasan sekolah. Semua sekolah perlu memastikan pengudaraan yang baik di dalam kelas. Murid akan makan di dalam kelas semasa waktu rehat dengan seliaan guru. Bagi kelas yang menggunakan penyaman udara pula, murid perlu makan di ruang terbuka dengan seliaan guru.

Pada masa yang sama, prosedur operasi standard (SOP) yang telah ditetapkan oleh KKM seperti kerap mencuci tangan, saringan suhu badan serta penjarakan fizikal akan terus dilaksanakan di dalam sekolah.

Bagi murid yang akan pulang ke sekolah asrama sepenuhnya, KPM akan melaksanakan ujian saringan COVID-19 menggunakan kit ujian sendiri COVID-19 ke atas murid sebanyak 3 kali, iaitu semasa pendaftaran masuk, hari ke-6 dan hari ke-14. Bagi murid asrama harian, ujian saringan COVID-19 menggunakan kit ujian sendiri COVID-19 akan dilaksanakan semasa pendaftaran masuk. Selain itu, kit ujian sendiri COVID-19 akan disediakan bagi kegunaan sekolah harian untuk membuat saringan awal sekiranya terdapat murid yang menunjukkan gejala ketika di sekolah.

Bagi memastikan kelancaran pengoperasian sekolah, KPM telah menyediakan Garis Panduan Pengurusan dan Pengoperasian Sekolah 3.0 sebagai rujukan kepada jabatan pendidikan negeri (JPN), pejabat pendidikan daerah (PPD) dan pentadbir serta guru.

Kerangka pelan pembukaan sekolah ini adalah satu perancangan komprehensif KPM bagi memastikan pengoperasian sekolah secara bersemuka berjalan dengan teratur dan selamat.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KE-14**

**PERTANYAAN : LISAN**

**DARIPADA : YB DATO' HAJI MAHFUZ BIN HAJI OMAR  
[POKOK SENA]**

**TARIKH : 23 SEPTEMBER 2021 (KHAMIS)**

**SOALAN**

**DATO' HAJI MAHFUZ BIN HAJI OMAR [ POKOK SENA ]** minta  
**MENTERI KEWANGAN** menyatakan : -

(a) projek jalan dan JPS yang diluluskan secara rundingan terus di bawah JANAWIBAWA dan berapa bilangan surat setuju terima tender, surat niat dan proses runding harga; dan

(b) berapa bilangan yang telah dikeluarkan Surat Setuju Terima Tender, Surat Niat dan Proses Rundingan Harga.

**JAWAPAN**

Tuan Yang Di Pertua,

Mengambil kira situasi semasa yang memerlukan kesegeraan pelaksanaan projek akibat penularan wabak COVID-19 ke atas aktiviti ekonomi negara dan mempercepatkan pelaksanaan projek, Kerajaan telah memperkenalkan Program Jana Ekonomi Pemerkasaan Kontraktor Bumiputera Berwibawa (JanaWibawa). Kontraktor JanaWibawa dalam program ini bermaksud kontraktor yang dapat berdaya saing, berdaya tahan dan berpotensi serta komited dalam usaha untuk mencapai matlamat memperkukuh Komuniti Ekonomi Bumiputera (BEC).

Semua kontraktor akan dinilai dan diteliti secara menyeluruh daripada pelbagai aspek bagi memastikan pemilihan kontraktor yang berwibawa untuk melaksanakan projek tersebut dan tetap melindungi kepentingan Kerajaan serta tidak menjejaskan kerancakan perkembangan ekonomi. Kerajaan juga melaksanakan *due diligence* yang sewajarnya bagi memastikan hanya kontraktor yang benar-benar memenuhi kriteria yang ditetapkan boleh dipertimbangkan.

Kerajaan telah menetapkan pelaksanaan projek Janawibawa dilaksanakan melalui tender pra-kelayakan atau rundingan terus berdasarkan Pekeliling Perbendaharaan PP/PK7.15: Garis Panduan Permohonan Perolehan Secara Rundingan Terus.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN NIK NAZMI BIN NIK AHMAD  
[ SETIAWANGSA ]**

**TARIKH : 23 SEPTEMBER 2021 (KHAMIS)**

**SOALAN**

Minta **MENTERI PENGAJIAN TINGGI** menyatakan berkenaan isu penempatan mahasiswa untuk praktikal atau latihan industri (LI). Banyak syarikat atau agensi yang ditutup ataupun tidak dapat menjalankan LI kerana PKP. Justeru apakah respon/tindakan pihak Kerajaan khususnya KPT dalam usaha terkait jaminan penempatan LI kepada mahasiswa.

**JAWAPAN**

Yang di-Pertua,

Tahun 2020 dan 2021 merupakan tahun yang mencabar dalam semua sektor termasuklah sektor pengajian tinggi. Pelaksanaan Perintah Kawalan Pergerakan (PKP) mengakibatkan hampir semua aktiviti sosial dan fizikal tergendala serta turut memberikan impak besar ke atas kursus Latihan Industri (LI) bagi pelajar-pelajar di Institut Pendidikan Tinggi (IPT). PKP yang berpanjangan juga telah membataskan keupayaan pelajar untuk menjalani LI secara fizikal di lokasi mereka ditempatkan.

Sehubungan dengan itu, Agensi Kelayakan Malaysia (MQA) melalui *Advisory Note* MQA 2/2021 telah memberi fleksibiliti kepada IPT supaya pelajar menyempurnakan LI bergantung kepada keperluan program masing-masing. Antara kaedah alternatif tersebut adalah:



- i. Kajian kes yang berasaskan kepada permasalahan atau isu di industri;
- ii. Projek penyelidikan dengan kerjasama industri;
- iii. Projek komuniti berasaskan bidang program pengajian dengan kerjasama industri;
- iv. Kertas kajian/projek/geran dalaman berasaskan penyelesaian masalah industri;
- v. Kerja pembaikan dan penyelenggaraan dalaman (*in-house*) yang bersesuaian; dan
- vi. Latihan Industri secara maya (*virtual industrial training*).

Pihak IPT juga telah bersinergi dengan pelbagai rakan kolaborasi industri bagi memastikan penempatan LI berjalan lancar. Sekiranya pelajar tidak dapat meneruskan LI yang asal akibat penutupan industri tertentu, maka pelajar boleh menukar industri serta menyambung latihan untuk tempoh yang berbaki sahaja. Jika pelajar masih tidak dapat penempatan di industri setelah pelbagai usaha dilaksanakan, pelajar diberi pilihan untuk menjalani LI di dalam kampus mengikut SOP yang telah ditetapkan. Usaha yang sama juga telah dilaksanakan di peringkat pelajar politeknik dan kolej komuniti di mana seramai 26,193 pelajar semester akhir sesi Disember 2020 telah menjalani LI tanpa perlu melanjutkan tempoh pengajian mereka.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : DR. MASZLEE BIN MALIK  
[ SIMPANG RENGAM ]**

**TARIKH : 23 SEPTEMBER 2021 (KHAMIS)**

**SOALAN**

**DR. MASZLEE BIN MALIK** minta **MENTERI KANAN PENDIDIKAN** menyatakan berapa kadar keciciran sekolah kebangsaan, termasuk sekolah rendah dan sekolah menengah sejak Ogos 2020 sehingga sekarang. Apakah perancangan KPM untuk menyelamatkan *lost generation* di kalangan murid-murid sekolah.

**JAWAPAN**

**Tuan Yang di-Pertua,**

Kementerian Pendidikan Malaysia (KPM) mendefinisikan keciciran daripada sistem pendidikan sebagai situasi dimana murid warganegara Malaysia yang berada dalam sistem pendidikan (bersekolah) tetapi keluar daripada sistem sebelum tamat/menghabiskan tempoh pendidikan.

Kadar murid cicir di Malaysia pada peringkat sekolah rendah menurun daripada 0.15 peratus pada tahun 2018 kepada 0.12 peratus pada tahun 2019. Manakala kadar murid cicir peringkat sekolah menengah menurun daripada 1.21 peratus pada tahun 2018 kepada 1.14 peratus pada tahun 2019. Data murid cicir tahun 2020 menunjukkan bahawa kadar murid cicir pada peringkat sekolah rendah adalah 0.10 peratus. Manakala kadar murid cicir pada peringkat sekolah menengah adalah 1.13 peratus. Data keciciran bagi tahun 2021 akan dikeluarkan sebelum akhir tahun ini.

Untuk makluman Ahli Yang Berhormat, KPM menyedari bahawa pandemik COVID-19 memberi kesan kepada pembelajaran murid terutamanya apabila mereka tidak dapat hadir ke sekolah secara bersemuka. Oleh yang demikian, selain daripada keciciran daripada sistem pendidikan, KPM turut melihat keciciran dalam konteks penguasaan pembelajaran.

Bagi memastikan tiada murid yang tercicir dalam pembelajaran semasa penutupan sesi persekolahan bersemuka, KPM telah melaksanakan Pengajaran dan Pembelajaran di Rumah (PdPR). PdPR dilaksanakan melalui tiga pendekatan iaitu secara dalam talian (*online*), di luar talian (*off-line*) dan *off-site* mengikut kesesuaian guru dan murid.

KPM telah membangunkan satu kerangka holistik dalam memastikan PdP dapat terus dilaksanakan dengan berkesan. Di samping itu, KPM akan terus menambah baik pelaksanaan PdPR bagi memastikan keberkesanannya dapat ditingkatkan dari semasa ke semasa. Bagi memantau penyertaan murid dalam PdPR, KPM telah membangunkan Sistem Pelaporan Pengajaran dan Pembelajaran di Rumah (SPdPR). Sistem ini membolehkan penyertaan murid dipantau secara *real-time*. Hal ini membolehkan pihak sekolah melaksanakan intervensi yang bersesuaian bagi memastikan keterlibatan murid adalah secara optimum.

Selain daripada itu, sewaktu sesi persekolahan dibuka semula sebelum ini, guru telah membuat pengesanan terhadap tahap penguasaan kemahiran murid. Ini membolehkan guru merancang dan melaksanakan intervensi yang bersesuaian sewaktu PdPR.

KPM juga telah melaksanakan penjajaran kandungan kurikulum mata pelajaran. Penjajaran kurikulum mata pelajaran difokuskan kepada Kandungan Asas (KA) supaya murid dapat disediakan untuk pembelajaran peringkat seterusnya. Kandungan Tambahan (KT) dan Kandungan Pelengkap (KP) pula boleh dilaksanakan mengikut keupayaan murid.

Bagi memperkasakan pelaksanaan kurikulum, KPM juga menambah baik sokongan pembelajaran dengan memperkenalkan

Program Pemerkasaan Pelaksanaan Kurikulum (KPMPerkasaKU). Program KPMPerkasaKU dirancang dengan tujuan memastikan pembelajaran pemulihan bagi murid yang belum menguasai literasi dan numerasi. Di samping itu juga, program ini menyediakan pelbagai sokongan bagi mengukuh dan memperkayakan penguasaan kandungan mata pelajaran. Program ini melibatkan murid sekolah rendah dan sekolah menengah.

Selain itu, KPM juga telah memperkenalkan semula siaran TV Pendidikan. Murid boleh mengikuti pelbagai rancangan TV Pendidikan melalui saluran DidikTV KPM, TV Okey RTM dan Tutor TV Astro. Kandungan yang disediakan adalah berdasarkan kepada kurikulum peringkat prasekolah hingga ke tingkatan enam. Di samping itu, kandungan rancangan TV Pendidikan turut memuatkan slot yang berkaitan kokurikulum.

KPM turut menambah lebih banyak bahan PdP melalui pelantar *Digital Educational Learning Initiative* Malaysia (DELIMa). Pelantar ini merupakan pusat rujukan sehenti yang mengandungi pelbagai aplikasi, perkhidmatan dan sumber pendidikan digital. Sehingga kini, 3,245 video kurikulum, 324 video pedagogi dan 1,761 video DidikTV telah dimuat naik di pelantar DELIMa. KPM juga telah menaik taraf dan menambah baik pelantar DELIMa (DELIMa 2.0) dengan fitur baharu mulai Ogos 2021. Fitur baharu ini memberi fokus kepada pengalaman pengguna, analitis data, kandungan dan pembelajaran diperibadikan.

KPM yakin kerangka holistik yang dirancang dan dilaksanakan ini membolehkan murid mengikuti PdPR secara lebih berkesan. Pada masa yang sama, KPM telah merangka pelan pembukaan semula sekolah yang komprehensif untuk membawa murid kembali ke sekolah dalam keadaan teratur dan selamat.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT,  
PARLIMEN KEEMPAT BELAS**

**PERTANYAAN : LISAN**

**DARIPADA : DATUK ROBERT LAWSON CHUAT  
(BETONG)**

**TARIKH : 23 SEPTEMBER 2021 (KHAMIS)**

**SOALAN**

**DATUK ROBERT LAWSON CHUAT** minta **MENTERI PERTANIAN DAN INDUSTRI MAKANAN** menyatakan apakah usaha dan halatuju Kementerian bagi membantu petani yang terjejas akibat pandemik COVID-19 bagi memasarkan hasil pertanian mereka.

**JAWAPAN**

**Tuan Yang Di Pertua,**

Pada awal fasa Perintah Kawalan Pergerakan (PKP), aktiviti pengedaran hasil pertanian agak terjejas disebabkan oleh sekatan perjalanan serta penutupan beberapa premis pemborongan, peruncitan dan sektor hotel, restoran dan katering. Untuk mengatasi isu tersebut, Kementerian Pertanian dan Industri Makanan (MAFI) melalui agensi-agensi pemasaran di bawahnya telah melaksanakan beberapa langkah bagi membantu petani memasarkan hasil pertanian mereka. Antara langkah-langkah yang dijalankan termasuklah bantuan khidmat pemasaran, pembukaan Pasar Segar Terkawal, pengukuhan jualan dalam talian, penyediaan insentif pemasaran serta pembangunan infrastuktur logistik dan pemasaran.

Melalui inisiatif khidmat pemasaran, Lembaga Pemasaran Pertanian Persekutuan (FAMA) telah membeli sebanyak 34,155 metrik tan tanaman buah-buahan bermusim (durian, cempedak, rambutan), timun, nangka, cili dan tembikai dengan nilai RM136.07 juta bagi tempoh 18 Mac 2020 sehingga 31 Ogos 2021. Di samping itu, di bawah Program Khidmat Pemasaran MAFI (Ladang Kontrak 2.0), agensi-agensi pemasaran MAFI turut membantu mengaturkan pasaran petani dengan segmen pasaran seperti pasaraya, kedai runcit, kilang pemprosesan dan pemborong. Sehingga 31 Ogos 2021, seramai 1,737 petani telah dibantu melalui program ini dengan nilai jualan sebanyak RM70 juta. LKIM juga telah membantu mengaturkan pasaran sebanyak 13 metrik tan udang harimau yang bernilai RM340,000 bagi mengatasi isu udang harimau tidak terjual di Melaka pada bulan September 2021.

MAFI juga telah membuka Pasar Segar Terkawal (PST) dan Pasar Nelayan bagi menyediakan ruang pasaran kepada pengeluar untuk memasarkan hasil pengeluaran terus kepada pengguna. Sehingga 31 Ogos 2021 terdapat 84 PST dan 92 Pasar Nelayan di seluruh negara yang telah berjaya memberi manfaat kepada 9,790 pengeluar dan 640 orang nelayan dengan jumlah pengguna seramai 25,390,000 orang.

Dalam masa yang sama, MAFI turut mengatur pelbagai program bagi memperkukuh pemasaran digital sebagai kaedah pemasaran alternatif. Antaranya termasuklah kerjasama strategik dengan platform e-dagang swasta seperti Shopee, Lazada, AirAsia Farm, Mukmin Mart, Grab dan Foodpanda. Melalui *online store* Agrobazaar Malaysia di Shopee dan AirAsia Farm, FAMA telah mencatat nilai jualan sebanyak RM675,177 bagi tempoh 16 April 2020 sehingga 31 Ogos 2021. Selain itu, Agrobazaar Online yang diuruskan oleh FAMA telah mencapai nilai jualan sebanyak RM3.17 juta dalam tempoh yang sama. AirAsia Farm turut menjalin kerjasama dengan MAFI dalam memasarkan Mangga Harumanis ke Sabah. Melalui kerjasama ini, sebanyak 10 metrik tan Harumanis bernilai RM306,000 telah dapat dipasarkan. Lembaga Kemajuan Ikan Malaysia (LKIM) melalui Pertubuhan Nelayan Kebangsaan (NEKMAT) turut melaksanakan inisiatif pemasaran secara digital melalui laman web nekmatbiz serta media sosial dengan menawarkan perkhidmatan penghantaran pesanan terus ke rumah pengguna. Melalui platform nekmatbiz.com.my, LKIM telah mencatat nilai jualan RM231,540 bagi tempoh Mac 2020 sehingga 31 Ogos 2021.

Melalui inisiatif PRIHATIN, MAFI telah menerima peruntukan untuk menambahbaik peralatan serta infrastruktur pemasaran seperti pusat pengumpulan, pusat pengedaran, bilik sejuk dan depoh penyimpanan. Sebanyak RM6.6 juta peruntukan bagi inisiatif ini telah disalurkan ke Lembaga Perindustrian Nanas Malaysia, RM40 juta ke FAMA, RM30 juta ke LKIM dan RM10 juta ke Lembaga Pertubuhan Peladang. Dengan penambahbaikan ini, lebih banyak infrastruktur pemasaran dapat disediakan di seluruh negara untuk memastikan bekalan makanan yang mencukupi dapat disediakan dan seterusnya disalurkan kepada pengguna dengan lebih berkesan. MAFI akan terus mengambil segala tindakan bagi memastikan pemasaran hasil pertanian tidak terjejas supaya kepentingan dan kelangsungan perusahaan kumpulan sasar sektor agromakanan terus terjamin.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEEMPAT  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' WIRA HAJI AMIRUDDIN  
BIN HAJI HAMZAH [KUBANG PASU]**

**TARIKH : 23 SEPTEMBER 2021 (KHAMIS)**

**SOALAN**

**DATO' WIRA HAJI AMIRUDDIN BIN HAJI HAMZAH [KUBANG PASU]** minta **MENTERI KEWANGAN** menyatakan pelan Kerajaan dalam membantu peniaga kecil yang sudah mula gulung tikar akibat PKP yang berpanjangan. Adakah akan ada sebarang suntikan tambahan khusus untuk peniaga kecil untuk membantu mereka memulakan semula perniagaan mereka.



**JAWAPAN**

Tuan Yang di-Pertua,

1. Kerajaan sentiasa prihatin dengan situasi dan kesusahan yang dihadapi oleh peniaga dan pekerja mereka yang terjejas ekoran pandemik COVID-19. Sehubungan itu, bantuan kepada peniaga kecil menerusi Geran Khas Prihatin (GKP 4.0) telah disalurkan sejak COVID-19 melanda tahun lepas.

2. Dan yang terkini, di bawah Pakej Perlindungan Rakyat dan Pemulihan Ekonomi (PEMULIH) yang diumumkan pada 28 Jun 2021, Kerajaan terus komited untuk menyokong sektor perniagaan khususnya usahawan mikro melalui GKP 4.0. Lebih 1 juta PKS mikro melibatkan penerima sedia ada GKP sebelum ini, serta penerima baharu bantuan GKP, telah mula menerima 500 ringgit pada 21 September 2021 melalui bayaran Fasa 1. Bagi bayaran Fasa 2 berjumlah 500 ringgit, ini akan dibuat pada bulan November 2021, menjadikan keseluruhan bayaran GKP 4.0 sebanyak 1,000 ringgit untuk penerima yang layak.

3. Jumlah keseluruhan pembayaran GKP 4.0 ini melibatkan implikasi kewangan sebanyak 1 bilion ringgit, di mana bayaran dikreditkan terus ke akaun bank yang didaftarkan di dalam sistem GKP.

4. Secara keseluruhannya, sejumlah 6.08 bilion ringgit dimanfaatkan oleh lebih 1 juta usahawan mikro melalui empat siri bayaran GKP semenjak wabak COVID-19 melanda negara.

5. Selain GKP, Kerajaan juga telah mengumumkan beberapa bentuk bantuan seperti berikut:

- i. BSN Pemerkasa Mampan – bantuan skim mikro kredit bagi menampung kos tetap operasi perniagaan sehingga enam (6) bulan seperti gaji pekerja, bil utiliti dan sewaan;
- ii. Skim Pembiayaan Informal (SPIN) dan Skim Pembiayaan Informal (SPIN 2.0);

- iii. Skim Pembiayaan Perniagaan Prihatin Mikro (S3P);
  - iv. Skim Pembiayaan Pemulihan Perniagaan Mikro 2.0 (CBRM 2.0);
  - v. Go-eCommerce Onboarding Campaign; dan
  - vi. Malaysia Co-Investment Fund (MyCIF).
6. Kerajaan komited untuk terus memberikan bantuan kepada peniaga supaya terus beroperasi di kala penutupan sebahagian sektor ekonomi. Sektor ekonomi dijangka akan dibuka secara berperingkat pada suku tahun keempat 2021 dan diharapkan bantuan yang diperuntukkan kepada peniaga kecil serba sedikit dapat mampu mengurangkan beban.
7. Sehubungan itu, pemerkasaan ekonomi golongan peniaga kecil akan terus diberi perhatian dan dipertimbangkan di dalam Bajet 2022.

Sekian, terima kasih.